

Литература Дагъистан

16+

# Гьалмагъдеш


ЛИТЕРАТУРНО-ХУДОЖЕСТВЕННЫЙ И ОБЩЕСТВЕННО-ПОЛИТИЧЕСКИЙ ЖУРНАЛ

**Салам, школа!**



**5/2019**

сентябрь - октябрь





# Гьалмагъдеш



## ЛИТЕРАТУРНО-ХУДОЖЕСТВЕННЫЙ И ОБЩЕСТВЕННО-ПОЛИТИЧЕСКИЙ ЖУРНАЛ

Учредитель: Министерство информатизации, связи и массовых коммуникаций  
Республики Дагестан

---

**РУКОВОДИТЕЛЬ - БЕКИ РЕДАКТОР**  
Мурад МяхИяммадович ГЯХИМАДОВ

**ЖАВАБЛА СЕКРЕТАРЬ**  
Т. ЗУРГЪАЛОВА

**РЕДАКЦИЯЛА КОЛЛЕГИЯ**  
XI. Кьурбанов (журналла редактор)  
Кь. Мигърабов  
Т.СягИдов

**ЖАМИГИЯТЛА СОВЕТ**  
А. Гябдулманапова  
И. Ибрагъимов  
Ш. МяхИяммадов  
Х. ХИябидова  
Х. Юсупов  
И. МяхИяммадов

**5**  
**2019**

**сентябрь - октябрь**

---

Кел бази гьачам  
дурабулхъан

Выходит один раз в два месяца

1952 ибил дуслизиб  
акIахъубси саби

Журнал основан в 1952 году

Государственное бюджетное учреждение  
Республики Дагестан “Редакция республиканских литературных  
журналов “Соколенок” и “Литературный Дагестан”.

**ЖУРНАЛЛИЗИР ЛЕР:**

**ПРОЗА**

**Ибрагъим ИБРАГЪИМОВ.** Цализиб ва хилизиб.....3

**НУШАЛА ТАРИХ**

**МяхИяммад ТАХСУРМАНОВ.** ГПякъакъала дѡв 100 дус биънилис.....11

**ГЪУНИБАЪНИБИ**

**Дагъиста халкъла поэт Аминат ГПЯБДУЛМАНАПОВА.** Нургъби гъудурси байрам.  
Даргала булбул чатIа. ВегIла мез – гIямрула давла сари. Мяммауллизиди архIя.....20

**ПОЭЗИЯ**

**ШанигI МЯХИЯММАДОВ.** ГехIел тугъла назмурти.....24

**Дагъиста халкъла поэт Аминат ГПЯБДУЛМАНАПОВА.** Назмурти.....30

**НУШАЧИР ГПЯХЛАДЛИ**

**Дагъиста халкъла поэт Залму БАТИРОВА.** Назмурти.....39

**ПОЭЗИЯ**

**ТавсултIан СЯГИДОВ.** ГПякъакъара, гамъала кIуркIурра, къзакъла чягъирра.....43

**Хамис МАЛЛАЕВА.** Назмурти.....49

**ХАБУРТИ**

**Аминат ХИЯПИЗОВА.** Бисуси аргъ... Даршубиъни. УркIецIила дехIибала, Разила къузри.....61

**МяхИяммад КЪАРАТОВ.** ГIур дий хIебутIиб. Чаплинхъалигъунти. Музыкала цIакъ. Расулличила.....68

**ПОВЕСТЬ**

**ГПяли-АсхIяб МЯХИЯММАДОВ.** Къисмат.....72

**ОЧЕРК**

**Дагъиста халкъла писатель Къасум-Бег МИГЪРАБОВ.** ВагIайс ва адамтас гIяхIдешуни  
дирули.....83

**ФОЛЬКЛОР**

**МяхИяммад ТАХСУРМАНОВ.** Сабурла ва сахаватдешла къадри.....91

**ГПяйша КЪУРБАНОВА.** Багъираби.....94

---

Регистрационный номер: серия ПИ №ТУ05-00416  
выдан Управлением Роскомнадзора по Республике Дагестан от 22.04. 2019 г.

**Типография:** ООО «Издательство «Феникс-пресс»  
**Адрес типографии:** 367018, РД, г. Махачкала, пр. Петра I, 61

**ГЪАЛМАГЪДЕШ №5 2019 г.**

*На даргинском языке*

Выход в свет 2.10.2019 г. Тираж 374 экз.  
Заказ № 441 Цена свободная.  
Печать офсетная. Бумага офсетная.  
Формат 70x108 <sup>1</sup>/<sub>16</sub>.  
Усл. печ. л. 8,4.  
Усл. изд. л. 8,7.

*Редакция и издатель: Государственное бюджетное учреждение Республики Дагестан "Редакция республиканских литературных журналов "Соколенок" и "Литературный Дагестан".  
Адрес редакции и издателя: 367000, РД, г. Махачкала, ул. Даниялова, д. 55.*

**Электронный адрес редакции:**  
litdag@mail.ru

# Проза

**Ибрагим ИБРАГЪИМОВ**



## ЦИАЛИЗИБ ВА ХИЛИЗИБ

(Хърахъуд)

ХІямзатли чехІебаэс хІейри ХІялиматла гІуркъбяхъ бухІнаси хІер.

– ЦацахІели нешличи лехІхІейхъулира вирус, – чебатур илини ришхант-личил.

Сукникъяна Хадижат-адайла жагъилтала ихтилатличи лехІахъес ва хІерли кариэс къас аги.

– Эй, гъармукаби! ХІушала хабурти ціикурла хъулир дурути ахІен. Гъарушла хъаба баили саби хІушачи. Гъанна хъярхъли дашеная!

Бурушла «хужаимти» къалабахІебикІули чебаили, «Се саби, гъари, ишди, хІядяркъурти бугънигъунти» или, сукникъяна ХІямзатличира ПалхІятличира, бацІбиубси гъунгелтала таврали рирхъули, черухъун. ИлхІели юлдашунас, някъбара гъабурцули, тавханализибад гъаббухъес ахІенси селра кахІелун...

ГІергъила бархІи савлиличибад Зелимха ва Гъидаятла мекъ гъарли-марли бемжур. Дам-дядла агурба Хала хІеркІла кІух гІянцІбариб, алавти муза-къада, вацІурби чераргъахъиб. Мекъла авид Гъазагала шилизибад ва махъурби-гІя-ябазибад бакІибти гІяхІлани бягІубариб.

Ихтилат хІери гІергъи, ціикури гІинзи рукили, таманкабирусир.

Зелимханхъала азбарлизибад гъала-гъала дамрухъя ва дяднучІа, гІур, тугъбарили, кІалтІни-гажунтира дарх касили, чехъери рурсби дурабухъун. Илди-ургар ціикури Гъидаят шиниша дукІумила хІеваличил ва цІуба декІаличил хІисабраресли декІаррулхъулри, илала хъуцІарличибра гарала кІалтІа лебри.

Дам-дядли делхъла аги каиб. Мекъла агълу булхъули, жургъбикІули Дибга гІяяла удибси, Хала хІеркІла къадалабси, арсаварла бегІ халаси гІинзи багълали гъамбиуб. Илар накъра гІурра демжахъур, чехъери рурсби делхълизиб сабемцІур.

Гъанна илдаци хІерикІуси къапІа бихан ца сайри – ХІямзат. Илра Хала хІеркІла итил дублабси баягъи Буйрала бяхІлизи ваэс бажардиикибси. ГІядат хІясибли, ціикури гІинзи аркухІели, гІулухъаби барх башути ахІенри. Иличила

балули, ХІямзат рурсби гІинзи дурабухъайчи Буйрала бяхІлизи ваилри. Мекъ-личир ХІялиматличил чуйнарил делхъ дариб виалра, черхІейсули хІулбира, иличи хІерикІи виалра, хІяланазив велкъи ахІенри. ГІурра ХІялимат чераэс, чераэсцунра ахІенну, гъайра кавхъес дигули ила ваибси сайри. Делхъ дирухІели ил бажардиикибсири ХІялиматлизи шивкІивбарес: «Ит хІуни гІяхІил балуси Буйрала бяхІлизив хІерли вирус. РакІи буреси лебну...»

Илини я ляркъяс я хІякъяс или жаваб чархІебариб риалра, ХІямзатли рурсила хІулбала хІерлизиб аргъиб сунени бурибси бетарни: ХІялиматлис сай вигахънира гІячихъси анцІбукъ сабри.

БерхІи гІелабикес балкъаурси манзил кункти гунзри чехиб, байла диштІати галгуби вяшардухъун, ва диркъбикличи ХІялимат дурарухъун.

Ил чераибмад, ХІямзатра харчизур, рурсилис гъунивиули, чумал ганз кацІиб. Илис сецад ХІялимат кІапІруцес, уммай рарес дигулихъар, – яхІбариб. Ил адабли асухІебирахъулри.

– КъаннирегІ ракІири: хІечи хІерли хІяниэс вири.

– Балулра: хІела куц къалли хІяниубсилагъуна ахІен. Я илцад язихъвиъни чебиули ахІенра.

– Мекъ жявлил таманбиубли ахІенрив?

– Сабри.

– ГІур гъатІи?

– Се «ГІур» бируси? ХІед бурес гъамадли саби. Рурсбас уршбасван гъамадли вяшбикІес бетарули биалри...

– Гъу, иргъулра, гъиммаруркІуд.

– ГъимруркІули ахІенра. ГъимрукІес-декІар талхъа уршиличи дила ихтияр лебу?

– Паргъатрии... Житала дурхІяван хъябшмарикІуд. Се хабар бурида?

– Хубурти хІунира далулри: нушала гІяялизиб мекъличиб халаси хабар гІур се бирара?

– Цикруми сен сабри?

– ХІуни чебаибхІеливан хІулкІули, берхІира бацра чучирад дулхъухІеливан, разили сабри.

– Ахирра Зелимха мурад бетаур къалли?

– Зелимхацун биалри...

– Гъидаят къабулхІериркули ахІенрив?

– Гъайрарибси замана сарри ил пурхуррикІуси, гІур мекъличи хІерли, кариэс мер бургули ахІенри.

– Цалис ца дигахъули биалли – ил саби илдала талихІ.

– Нура карцІли рирус илдигъунтачи...

– Зиланти шери башахъули, хІу руулрив?

– Ну аркуси агара.

– Иш ну?

– ХІу – талхъа урши, ну – гІяякан цІуръа. ХІела неш Издагайли ну къабулхІериура.

– ХІуни, ХІялимат, заманалис гъалаб илгъуна хІукму дурайсули хІериши?

– АхІенра, гъар секІал далулра, чедиулра, дикъулра... Зелимха мекъличибра хІуни ил секІал аргъахъиригу?

– Се сабри аргъахъибси?

– Нешла амруличивад хІу чевхІелхъни. Ну гІянцІли-мага хІериша?

ХІямзат бара-бара гъинчІизур.  
 – ХІу хІядурлирив?  
 – ХІядурли? Селичи?..  
 – Гъзагала талхъа уршилис шери раКес? Яра ну хъумартес бажардири-килрив?  
 – ХІела гъай сен-сен иргъути? ХІу хъумартес багъандан даршал дус ветахъилрив? Ну цІуръа рурси риублихъар, кІибяхІян ахІенра. ХІуша мурул адамтаничиб умули гъайра бихІуси саби.  
 – ХІялимаат, къачагъунала урдализир урЧемал бархІи наб дусван духъандигІун... Амма хІу пикрумазир агарси ца зимла манзилра хІебиуб.  
 Ил жаваб аргъибХІели, ХІялимаатла чурхдешра, чедаахъес илини гужли дакІудирути авараагардешра кІундаЦиб, уркІи дяхІила кашван кІантІибакІиб.  
 – Чевверхи, ХІямзат. Ну се рикІулихъар, хІу набра гъаниркади. Вай, цаКъли гъаниркади! КъакъараКІира, хІушачил детаурти хабурти аргъибХІели. Дугели Аллагълизи хІу чарухъахъес рулгира, хІерели нешлизирад дигІяй дезна ручІира. Вай, уркІи пІякъбикесцад пикруми лерри. ЦацахІели хІед гІергъи раКес биалри или, гъанра бирки, амма балули ахІенри чина ляркъусирил. Вирхаи, ХІямзат, хІечи хІерли уркІи-дулекІ карилаб къацІван дуцІули, хІу агарти бурхІни ардякъун...  
 Илди малхІямти ва мар-марли уркІи бурути рурсила гъайли ХІямзатла ари кебасибсиван бетаур. Ва илини някъби гъадатур, ХІялимаат михъирличи кІапІруциб. Рурсила къаршидеш дарес я ахъри я къас лебрив? ИлкІун жявлил хІядурлири ХІямзатла михъирличир, ил ляжи кІибутІбиубси талхъа уршила янашар, гІямру керхайчи кІапІрикили калес яра, ягълавлизиб буцІуси мукъарла гІяшван рацІили, илала чархІлизи гІяйкариес.  
 Или биалра, ХІямзатла дагърилизиб хІяланачиб гІякълу цаКълири, уркІила жилис ва чархла гъирлис, сецад мурили диалра, гІергъихІевхъес ва сабурбарес ахъри бургулри. Илбагъандан илини ХІялимаат ратаиб, гІур гІяшли шивкІивбариб:  
 – Черрерхи...  
 ХІятта рурсилис илала «черрерхи» ибси девра тамашабизур. ГІяхІцадхІи, ил цацун девли се иргъахъусирил гІячихъбарес хІерирули, калун. ГІур шакрикиб ва иличи гъатІира ванаси, диги-карцІили лагъбикІуси хІерли хІерризур.  
 ХІямзатли сунела сукъбан чеббатур, диркъбикла дублабси къасиличи убушиб. Рурсилис кариахъес маслигІятбариб, гІур сайра илала мякъла кайиб.  
 – ХІялимаат, хІу дила неш багъандан зигармарикІуд. Нуни дила бегІти балути саби... Гъай лугулра: ил масъалара гъунчибурушис.  
 Рурсили дубхІехъиб. ИлхІели ХІямзатли гъай даимдариб:  
 – ХІела неш гъатІи? Ил се рикІули? Белики, илала хІулбазив ну гъаннара душмай кали виша?  
 – Юх, илкъяйда ахІен.  
 – Наб хІела неличил гІурра ихтилатбарес дигахъира.  
 – ГІягІнили ахІен, ХІямзат, неш рарскарриубли сари.  
 – Муртличирад?  
 – Нушачи гІяхІли бакІиб... Нешла шанти, уркухъанти... ИлхІейчирад...  
 – Чихъали сабри? Ил дигІяндеш хІебиес?  
 – АхІен гъари! ХІезибад нуни се дигІянбириси? ХІу итхІели шилизив агади... Къазанапла ХІусенхъали хІуни балутив?

– Аргъибсира ахѐн.  
 – Илди ца ити гѐхѐлад бакѐибти ахѐнри...  
 – Ну шакикѐулра... Хѐед сукни бакѐибти хѐебииши?  
 – Сабри.  
 – Гѐур се бурида?  
 – Бакѐибси гѐунчибад гѐелабяхѐ бархѐира.  
 – Нешлис къалли дигули рурги хѐу илди Къазанапхѐалачир риахѐес?  
 – Нешра ибкъкахѐеризур: илини дила уркѐи аргъиб.  
 – Хѐу аррукес вализурси чи хѐусбяхѐ сайри? Нуни илра валуси хѐергар?  
 – Юх, илра хѐуни хѐелад. Сягѐидуллагъ бикѐар. Гѐала-гѐала хѐулби набчи ахѐдучес хѐейрули, урузкѐули левригу, кѐинайс, нуни дила пикри аргѐахѐ-ибхѐели, цѐакъиуб. Урехи чебаахѐес хѐулухѐун... Илини сай чила къамла сайрилра хѐумартурли уилри.

– Чидил къамла вирусирив ил Сягѐидуллагъ бихѐибси?

– Къазанапхѐали дила хала дудеш Хѐяжимаммала лугъри-букѐуни би-рутири. Гѐатѐира жявси манзилличибад дила хала бегѐтас къуллукъличиб бирутири... Хала дудешли рягѐятдешлизибад азадбатурхѐели, саби бегѐти маза-масра адилкъули, давлачеббиубли саби. Бурни хѐясибли, гѐанна илдала мазала арагѐер дурзамти лерли сари. Диаб гѐатѐи! Юх, хѐед гѐанмабиркахѐид, Хѐямзат, ну давла-маслис яра даражалис риргѐяриусра или. Гѐанмабиркахѐид, ну хѐечира хѐела дудешла талхѐандешли яра мас-хазнали карцѐарибсира или. Вари, вари, наб ца хѐела хѐулбала хѐер баибси саби. Умуси хѐер, умуси уркѐи, умути хѐялани...

Хѐялиматла дубшабад дурабурхуси илди къугъати гѐайла урунжли талхѐа урши тамашала хѐяйчи викахѐилри: «Гѐанхѐебирки, Хѐялимат илгѐуна дакѐугъаргси рургар или. Уркѐиличиб лебси, ма хѐед каса, ма хѐуни чебаа рикѐухѐеливан, гъаргбирули сари. Урези агарли, вас-васъала агарли, набчи рирхули. Гѐе, гѐе, набчи рирхули. Илини илди дугъби гѐур чизилра хѐедуриб. Я дурхѐедуру. Хѐялиматли мяштѐидирули ахѐен давла-мас. Сари рикѐуливан, ну талхѐа урши хѐейубли, рягѐят хѐубзарла виаслири, илини пикри бехѐсурхѐебири. Набчи илкъяйда дирхалабихѐибси, лебил жагѐилтазивад ну чеввикѐибси гѐякан рурси наб-декѐар ахѐерси ахѐену? Гѐур чили рирара илиниван ну талихѐевси вета-ахѐес? Чи-биалра талхѐа яра узданна рурсили? Давла-масла вегѐла рурсили? Юх, цалра цархѐил рурсили Хѐялиматли наб лугуси гес хѐерирар. Михѐирлизибад уркѐи дурабитѐи пешкешбарес хѐядурли сари ил. Аллагъ, ну сегѐуна игѐбарла вегѐи уилрал, гѐякан ил рурси рагъурси, иличил къаршиикибси, илала диги-хѐер сархес къадарбиубси? Иличи лехѐихѐули, нуни гѐатѐи имцѐабареси балули ахѐенра. Белики, гѐягѐнилира хѐебургар? Илини къяйда бурес-декѐар вирусу? Михѐирлизи дарцѐдикили къугъати гѐай лер, амма нуни дурадатес хѐейрус. Дурадатаслира, илди цѐакъагартили кавлан, илалаван малхѐямтиги хѐедиэсра асубирар. Илбагъандан нуни Хѐялиматлизи дила уркѐила хѐялани гѐайлизир ахѐи, баркъудилизир чедиахѐис ва мардирис...»

Берхѐи жявилл дяхѐили даим кѐапѐдарибти хѐурхѐала мякълабси Майдар дубурла гѐела дигѐянбикилри. Хала хѐеркѐла дуба-карчѐа ва вацѐурби бархѐехѐла гѐурша дяхѐицѐилиур сарри. Дуги чебакѐес ва дунѐя сунела цѐябдешла дукайу хѐурабарес хѐядурбиублири.

– Чардухѐес замана ахѐену? Неш къакъаракѐили рургар? – иб Хѐялиматли.



– Иргъулра, хІу рукъен хъули, ХІялимат, – иличил къабулиркули, жаваб чарбариб ХІямзатли.

– ХІу? Буйрала бяхІлизиб дуги беркІес пикрибарили хІейиши?

– АхІенра: хІу ДибгаГяялизи, хІела хъули, раайчи ишав хІерли уус. ГІур нура чарулхъас.

– Хъура-хъурали? Гъзагала шикІун гърахъли саби?

– КъакъамарикІуд, ХІялимат, хъурали ахІенра. Дила къяшми кункил тази их Хала хІеркІла дублаб урканбяхъили хеб.

– Гъу, гІяхІли кален! – ахирра ХІялиматли талхъа уршилис някъ гъабатур.

ХІямзатлис сунела бяГуси хъатлаб рурсила някъ назиксила, хІебла манзил виштІахІели чуйнара мехІлизи буцибси чатІаван кабизур. Аммаки илала ванадеш, хъатлизибад бикили, илмадан чархлизи гІяйбиуб.

– ХІедра гъунби гІяхІдираб! ХІерли рии...

ХІямзат рурси къяшла дякличирад Хала хІеркІличи карацІайчи гІелавад хІерикІули калун, гІур левси мерличи сагали кайиб.

Илис пикридарести лерри. Гъалаб-гъалаб бегІтачил, хаслира нешличил, ихтилатбарес гІягІнилири. ГІягІнилири илизи аргъахъес гъанна сай хъяша хІейъниличила ва сунела гІямрула челякъла сунени гъунчибуршуси биъниличила...

Буйрала бяхІра Хала хІеркІла къадара таманни цІябдешла арилиур детаурхІели, ХІямзатли аргъиб сунесра шилизи чарухъес замана баили биъни.

ХІера, илала къяшми кункил тазини, алавла чебиргъахъули, никубачил накъра ахъдуциб. Илди гъачамличир гъачам цІакъдикІулри ва ахъли гІерал-гъулри.

Сепайда, ХІямзатлис хабарра аги, сунела хІулбачил малХІямли гъунирратурси ХІялимат ил бархІехъла манзил хъули раэс хІебикнила...

\* \* \*

Пурбанра сасили, ХІямзат бегІтала тавханализи ацІибхІели, дуги сабри. Дудеш, бяГуси тахличирти назбалишуначи хъарихъи, табтарра гъаргбарили, гІяш-гІяшли учІулри. Неш бемжурси анкъила гъала кариилри. Илини дукІумила гъимирлизибад къикІа рургулри.

ХІямзат нешла мякълабси уталичи кайиб, пис къапІара кІелра някъли гъяжбарили, алав-гъалав хІеризур. Чеибсилис ил Гъзагала талхъа тавханализи бегІ гъалав вакІибси урхІла адамван калзи.

Ил пикриикІулри, бегІтачил гъай секъяйда дехІдирхъутил, вирарал дудешлизира нешлизира сунела уркІи аргъахъес, бара гъалабван сунес ахІерси ХІялиматлизи бедибси гъай марбарес. Тавханализибси зугъаси лехІдешли илала уркІи-хІял гъатІира цІакъли гъузгъалдидируси тяхІяр сабри.

Урши ца ити къанси манзил чучи вакІибси хІейъни иргъули ва иличибси хІял балули, Издагай кумекличи музарухъун:

– Гъу, се бурида, дила ХІямзат?

Уршилис лякъир бехІбихъес нешли гъуни гъаргбарилри. ХІямзат паргъатагарли уталичив жункъурухъун, бекІличи къапІа гугбатур, гІур чебасиб, декІли гъигъухъун.

«Ну мурул адам ахІенрав гъари? Се урехи саби ну чекавцибси? – ил сунечи сай гІясилири. – Уъ-муъикІес хъяша урши ахІенра, я урузкІес рурси ахІенра. Дудеш викІуливан, дев – дяхІлизи, тур – хъяблизи. Душманталара вайнукъя-

балара гъалаб бекІ гІяшхІебуцибси наб сецад гІядаблил бегІтачил дяхІ-дяхІли гъайикІес? Белики, илкъяйда бирусира бургар хъалибаргла бухІнаб?...»

– Ду-деш, ди-ла хІур-мат-ла талхъан... ахІер-си не-е-ш... – чебчебудуси тІама дурабатур ХІямзатли. – Чердерхирая... Наб дигулра хІуша камси манзиллис набчи лехІдизурли...

Гъазагала талхъай, уршиличи ласирхъули, табтар назбалишличи кабихъиб. Издагайлира урсуси кьикІа тІашаиб.

– Бурес дигулра... наб гІяякан Хачабала рурси ХІялимаг дигахъулра... Иличи хъайчикайэсра дигулра, – ХІямзат гъигъ чеббатес тІашизургу, кІинайс чебатур: – Ил секІайс хІушани наб пурбанбарили дигахъира...

ХІямзатли, гъатІи цалра дев имцІахІебарили, бекІ гІяшбуциб. Биалра, илмадан илис, наб гІягІниси аргъахъес виубра кьалли или, кункдеш акІуб. Чархла биркІантира, урги-дергаван дямдизурти, даткадухъунсиван бетаур.

«Биэси бирар: нуни дила пикри аргъахъира, – викІулри ил, – гъанна бехІбирхъу бегІтани набчи гъужум. Нешли кьалли – сеннира. РехІрирхъур, мехІуриублирив, ил се хабар саби, рикІули. Душма рурси... ГІяякан цІуръа рурси... Талхъа уршилис нушала улгу-миналичир риэси гІур рурси агарлив? ХІезикІун нушани гъалабра аргъахъибсири: жанай вавни мякълар датурли, хІянзанзбачи сен хъямвашусири? Галгаличи хІеръили бирар барда някълити кайсуси. Машааллагъ, талхъа анкъи ванабареси издаг раргили валанри? ЦІахси хабар ахІену? Нушала у чярлизиб ганзбарес пикрибарилрив? Марли, гІяякан цІуръа рурсили хІела бекІ жургъбухъахъив? ИшбархІи-жягІял хІукІун Гъазагала талхъан ветарусири... ХІечи секъяйда хІербикІара нушала талхъандешлиубти махлукъат? Ягъари, ил секІалра пикрибарибси виадри, эй, абдал урши! Юх, хІу умуси гІякълулизив ахІенри, хІу кьагълири. Я буреси я бареси балули ахІенри. Юх, ил секІал биэс хІебирар! Илгъуна баркьудилис Аллагълира нушаб икьалахІебиру. Гъарахъ, гъарахъ! ЛутІи-къама агарти, хІурмат-хатир дуунти адамти хІуни талхъа кІялгІялизи хъурабарес дигулрив? Даража агарти гІядатла адамталара узданталара дарх хъу хІедухъар. Аргъа ил секІал, урши! Аргъа ва паргъатии!.. Дуру нешли гІурра даари! Юх, юх, наб кІантІивакІес асухІебирар...»

Издагайли сунечи гъамли кайибси уршила вяхІличи някъ гъабатур, дахъал дусмас гъалабван, хІянали кІибутІбарибси илала ляжиличибад малхІямли хъат чедиберкІиб.

– Дила ахІерси ХІямзат, нуша кьабуллира... ХІу викІуси бирехІе... Кьакъа-майкІуд...

Нешла гъай аргъибси ХІямзат хІякизур: «Ил се рикІули? Нешли дила гъай масхараличи шурбалтулив? Ил чердукаркІулив? НуникІун хъумуртули ахІенра, секъяйда ил набзи сунела узила рурси кариахъес алаврухъунсирил... Ашкарли, неш дила уркІи хІебячес багъандан, ну паргъатварес багъандан, илкъяйда рикІуси рургар...»

Издагайла малхІямси тІама гІурра чехиб:

– ЖягІял бархІи-дигара ну Дибга гІяялизи сукни аркъяс, дила урши. ХІела мурад бирехІе...

– Неш, нуни иргъулра, хІед гъамадли ахІен набчил кьабулрикес...

– Вари, майкІуд, абас ват! Гъар-урла пикруми набзир кали ахІен: наб хІу талихІчевли виубли дигулра...

Ишдани набчила лебГлеб хьумартурли хЛебиалли, набра илдала лякьирлизи гьудурухъес замана ахЛену или, Амирбег тахличичи кайиб. Илала михьирлизи-бад хир–хирбикЛуси тАма дураберхур:

– Нешра уршира хЯбилра кункли вяГдаладирули хЛедишира? Гъзагала талхъа пикри хЛушаб хЯжатлира хЛебиэс?

Издагай уркЛухъун. Муруй илкьяйда бурнила гьанбик аги илис.

– ХЛу аллагъли араваркъ, дила талхъан! ХЛу къаршилирив, гъари, илгъуна вяГдаличи?

– Гъайгъай, разили ахЛенра!

УркЛухъун ХЯмзатра: илкЛун дудешли гЛевурцура или хьуликЛусири.

– Жан Амирбег, уршила уркЛи мабялчад. Илини царХил рурси къабулхЛериру. Нура, хЛуни балуливан, гьалар Ханичала рурси гьанрушахъес разиси ахЛенри. Аммаки гЛур гъар секЛал аргъира, пикридарира...

– Илгъуна масъала къалабали ирзуси хЛебирар. Ца пикрибарили, итил хЛебарили асухЛебирар. ХЛуни пикрилизи кайсулрив нуни буруси, Издагай?

– Аллагъличира, иргъули ахЛенра! ХЛу ахЛенрив мурталра гЯрзикЛуси? Арадеш усалбикили саби, талхъандешра уршилизи аманатдарес дигулра викЛуси? ХъайчикахЛетурси урши Гъзагала талхъан варахъес уцуми РяхИмхан къабулхЛеркур хЛейкЛадив? Иргъули ахЛенра, дила Амирбег, селра иргъули ахЛенра...

Нешли буруси ахирличи хЛебикили лебай, ХЯмзат уталичивад харчизур, гъамиубли дудешла гъала къукъмусикиб.

– Дила ахЛерси дудеш! ХЛурматла талхъан! Мабирхъид хъилизибси дила талихЛ... Се–дигара хЛу викЛуси барес хЛядурлира. ХЛядурлира, дудеш, хЛу багъандан жан къурбандаресра. Пурбанбара наб ХЯлимат кариахъес...

Амирбегли, гЯшиубли, кЛелра шайчирад уршила хъуцЛруми цЛадариб, хЛяндешли дерхъибти дяхЛра иличи гъамдарили, иб:

– Нуни балулра, урши, ну ташмишикЛули ахЛенра... Нуни къяш кацЛибихЛи, хЛуни бекЛ кабирхъид. Баркалла хЛед... ХЛуни черрикЛибси гЯякан рурсиличира къаршили ахЛенра. ЧЯнкЛили ца анцЛбукъли, гъачамлис хЛед ашкархЛебарисси ца дигЛяндешли, наб паргъатдеш лугули ахЛен. Ил белгихЛебарили лебай, наб хЛу ХЯлиматличи хъайчикайили дигули ахЛенра, сенкЛун марка барили гЛергъи варгъи чегънилизибад пайда лебси ахЛен. ХЛед багъес гЛягЛили саби...

Муруй гьанбушибси дигЛяндеш се сабил аргъибси Издагай гъала-гъала цЛубрухъун, урехили руржескаиб: «Се саби муруй бируси? ИтцадхЛи къаркъа чекабихъибси анцЛбукъ гъанна дакЛубирулив илини? Талхъа гЛякълу таманни барскабиубли бургар? Нушала вяГда се сабри?»

Харчризурли Издагай илдачи гъамриуб.

– Дила Амирбег, белики, ил хабар уршилис аргъес гъачамлис жявли биэс? Тилади саби хЛези, гъала-гъала нуша-ургаб ихтилатбирехЛе. Жан гЛямал, дила Амирбег, нуни буруси барагу?

Талхъан, уршила хъуцЛрумира датаили, Издагайличи шуряхъиб.

– ХЛу рикЛусира бархъси саби, дила хабчаб... Гъари, хЛебиалли, ХЯмзат, камси манзиллис хЛу гъаргала дуравхъен...

Ил се дигЛяндеш сабил, сунела талихЛис гъалабизли бетаурси, ХЯмзатлис аргъес дигулригу, дудешла амру аргъибмад, дуравхъес хъярхъикиб.

Тавханализиб сабицун калунхЛели, Издагай талхъа мякъла тахличичи карииб, мурул малхЛямли кЛапЛуциб, циила паргъатли гъигърухъун.

– Ва дила Амирбег, хІу Аллагъли ват, мабирид ил секІал... Гъанбуши-лихъар, къанни ахІен хабар чебарбукес. Ил дигІяндешли ХІялиматла дудеш нушала уршилис душман виъницун ахІен белгибируси. ИлхІели ХІямзатли нуша сунела гъарли-мрти бегІти хІедиънира бала. Гъу, илхІели се бетара-ра? Илгъуна гъанагардеш ХІямзатли сен-сен къабулбиру? Ил нушачи гІур секъяйда хІерикІара? Гъалавван набчи «аба», хІечи «ада» или дугъаилзану? Вай, дила Аллагъ! Жан Амирбег, иличила хІу пикрихІевхъунрив?

– Паргътрии, дила ашна, пикриухъунра. Пикриухъицун виасри: ил ан-цІбукъ се заманара набчибад тйидибикибси ахІен. Аммаки багъи, дила ахІерси Издагай, ил дигІяндеш нуни хІябла барх арбукес хІейрус. Аллагъли ну ахи-ратлизи дяхІшалали къабулхІейрура. Агара набзиб илгъуна ихтияр. Агара я хІезиб. Къанни яра жявли нушани ХІямзатлизи бархъдеш хІебурес гІямал аги, – Амирбег тІашизур, къярдаличибси бакиличи някъ гъабатур. – Наб гъанбиркули саби, гъанна дигІяндеш гъаргбареси замана гъамбиубли саби или. ХІуни пикрибара, сирилав левой кавшес или шушкІа ахъбуцибси дуде-шла рурсиличи ХІямзат хъайчикайэс дигули сай. Нуша паргъатли двахІелра, уркІби паргъатли хІедуар: я – дила, я – хІела. Нушала хІяяла гъалар нуша умули дирехІев? ДигІяндешуназиб белшунси нушала уршила талихІ-декІар талихІла биэсара? Виэсара ил талихІчевли? Гъанна хІу гъайрикІен?!

– Ну се рикІиша, хІуни гъар секІал бекІдарили виадли? Наб урши ветахъ-или хІейгахъира...

– ВетхІейхъур. КъакъамарикІуд, дила Издагай, ХІямзатли нуша лайхІе-дикІура.

– Дурхъаси Аллагъ, хІела ряхІмулиур нуша хІердараба!..

ХІямзат бегІтани бурибси хабарличи сабурличил лехІизур. Сунела гІямрула дигІяндешличи илала халаси тамашавиънира бетхІеур: илгъуна анцІбукъличи ил жявлил хІерсигъуна калири.

Илини нургъбазир кягІибти хІулбачил сунечи умутличил хІеррикІуси неш гъала-гъала кІапІруциб, гІур – дудешра.

– Дила хІурматла дудеш! Дила талхъан Амирбег! Дила ахІерси неш Изда-гай! Баркалла биаб хІушаб наб гІямру гибти неш-дудеш багъахънилис. Че-вахІси Аллагъли илди алжанала агълулабараб. Аммаки дила жан дерцахъибти, набзи дунъя багъахъурти, ну къяшмачи катурти, набзи цаибси ганз кацІахъибти дила гІязизти неш-дудеш хІуша саррая. ХІушачил барх сабри абалтуси дила гъарил гъигъ, илкъяйда бирар калунти гІямрулизибра... Чердерхирая, дила дигути, нагагъладан хІушаб хІейгуси бирули виасли... Сегъуналра дигІян-дешли, сегъуналра кахси хабарли гІяякан рурси ХІялиматличи дила хІялани дарсхІедиру. ХІятта ну кавшес някъ ахъбуцибси, дила минала бегІтала хІила душман ветаурси илала дудеш Сайдухан хІяблавад айзаллира, наб ахІерси ил рурси хъумартес хІейрус...


*(Хъарахъуд гІурла номерлизиб бирар)*



# *Гякьабала дявлис -100 дус*

---

**МяхІаммад ТАХСУРМАНОВ**



## **ГЯЯКЪАЛАЛА ДЯВ ВА ИЛИЗИБ МИКІХІЕНТИ**

*ЗурхІябла гумиличир  
Заклизи адицІанти,  
Чақнала дуклумахир  
ЦуцІла делхъли дулхъанти,  
Даргала багдаурти.*

*Даргала гъаб-убла далайлизибад*

Гякьабализиб дяв бетаурсири 1919 ибил дусла августличиб. Дагъиста тарихлизиб Гякьабализиб бетаурси дяв – Дагъистайзир детаурти граждан дургъбазиб – бегІлара мягІничебси, машгурси дяв сабри. Дагъистайзибцун ахІенну, цахІнабли Северный Кавказлизибра.

Дагъиста партизантала тарихлизибра ил бегІлара халаси анцІбукъ сабри.

Гякьабала дявлис халаси кымат бедибсири Совет хІукуматла бекІ В.И. Ленинни.

– Дагъистайзир Деникинничи къаршители дургъби цІала ламиван алкири. «Дубурланта Дагъистайзивад зулмукар Деникин дянгаиб», – белкІун Ленинни 1919 ибил дуслизиб.

... 1919 ибил дусла май базлизиб Дагъиста халкъла цаибил пунт Деникинни уркецІагарли бячІунсири, дахъал шими делтІунтири, цІали дигубтири, халкъла лебдеш хъям-къацІбарибсири.

Ил пунт бячІи, цІубабани Дагъистан чула арилизи буцили, чІумати низам-къяйда, гІядлу-зегъа кадизахъес дигулри.

Гъар шилизи чула хІякимти, набти кабатуртири. Дебали пунтдиубти халагигъунти шимази гарнизонти кадатуртири. Илдала арилизиб сабри лебилра Северный Кавказра.

Дагъиста халкъличи дирути гуж-зулму бархИиличи бархИи дахъдикІулри, цІакъдикІулри. Илбагъандан Дагъиста обком ва оборонала Совет Бакулизи гечдиубтири.

Деникинна зулмукартани гъар шилизирад унци, варгъни, варъа, цІубабала гІяскарлизиб къуллукъбарахъес жагъил уршби тІалабтурулри. Илди дучили дедес староста къаниалри, ил танбихІлаирусире.

Шимала жамигІятли хІукму барибсири, деникинцыбала тІалабуни урдяхъес, илдала гІяскуртазиб къуллукъбирахъес цалра жагъил ведхІедес.

– Дагъистайзиб июль базла пунт бячИи гІергъи, халкъли къаршидеш хІедиру, бургъес илдала гъав агара, илди шими дучес, халкъ гъарали белтІес, шими хъям-къацІдарес ва нушаб гІягІнити гъар се-секІал тІалабдарес гъамадли бирар, – илгъуна гъармукадешла пикриличил ва халаси пахруличил дубурла шими дучес Деникин ватихъибсири.

Халкъ биалли, Деникинна гъармукабачи гъимили рурхъулри. Дубурланти душмайчиб чеббицІес къасанани гарчли бицІилри, ярагъ дучили, душмайс гъалабизес хІядурбиублири. Лерил секІал дявила агиличи душилри.

Лавашабси дявила штабли балулри, илаб ахъбуцибси пунт бячІес цІубабала гІяскар бурхъни, амма Шурагъабад – Пилавла дубуртачибад яра ДешлахІярличибад – ГІяккъакъалабад бурхъул балули ахІенри.

Илди чинабад лябкъулил белгибарес микІхІента хІялумцІахъес, баянти дучахъес адамти бархъиб

МикІхІила жагъилтала отрядуни цаладяхъиб. Илдас командирти бариб дявила мягІни-хІял гІяхІил далути, дявила устадеш лерти, дунъяла цаибти дявтала бутІакъянчиби ГІяхІмадов Даудра БяхІяндов Алхилавра. МикІхІента тала разведқали багъахъур, душмантала карательный отряд Ванашидиркъа бицІили, ЧяхІилизи абиули хеб или.

Деникинна гІяскурти ГІяккъакъализирад лаг ляркъухІели, бегІ гъалабси ши МикІхІила саби. Илбагъандан душмантала, бяхъяни чекасес бегІ гъалар микІхІентачи чевкъулри.

МикІхІента чула хъархІерагардеш гъар мурталра далтахъутири ва нана хІуливан дихІутири.

1919 ибил дуслу августла 19-личиб МикІхІила шила хъариб Деникинна зулмукартала колонна багъарбиубли саби. Къукъя шила цугдайни кабиухІели, гІелала шила дублабси ЛихІбаран къякълизиб буили саби. Илцадла зузбитІунсири ил 300 солдатлизибад цалабикибси отряд.

МикІхІила шилизи бухІнахъили, Деникинна зулмукартани шантазирад унци, урчи, маза, нерх, варъа ва гІурра жура-журала секІал тІалабдариб.

Илала дурабад, Деникинна къуллукъчи генерал Халиловли гІяскарлизиб къуллукъбарахъес 30 микІхІен жагъилра тІалаббариб.

ХъархІерагардешкІун арцван керасес хІейрар.

«Лезми чеббирхъяллира,

Гъай къянахІебарибти,

ХІулби адилтІаллира,

ХІер бехІсурхІебарибти».

МикІхІента илгъуна цІахдеш чекасес хІебири.

Тупангуначил, тупанчибачил, пулеметуначил, тупачил бегІбиубси Деникинна отряд МикІхІила шилизи бухІнаберхурли 2-3 сягІятла духІнар чедир гъандушибти секІал тІалабдирулри. Къандиахъалли, танбихІлабтурулри.

МикІхІента зулмукартала ил буйрухъ бекІлил къабулхІебариб: тур-турли илдачи къаршили кабизур.

Ил инсапагар буйрухъли гымбукІахъибти микІхІенти азирличибра им-цІали адам къукънадли полковник ГІямазила юртла гъала, базарла майдайчи дурабухъун.

БуцІарси август баз биалра, жагъилти хІякничебли, варгъничебли дурабухъири.

ГІямазила юртла бегІла чедибси ганзухъличи тІашизурли, Деникинна халахар, наиб НурбяхІяндли микІхІентас урехи балахъулри:

– Эгер Деникинна тІалабунира илала гІярмиялизиб къуллукъбарахъес 30 жагъилра хІебедадалли, хІуша уркІеци агарли танбихІладируая! Чебиулярав сегъуна цІакъ лебал ишала?! Ил цІакъли хІуша дялчІарая!

«ЦІахдешлизир деркІибти духъянти гІямруличир, ламусличил деркІибти къантІти дурхъяти дирар» (Цицерон).

Ил замана сунечибси варгъира ца шайчи лайбакІили, патиранта баршибси вайра лямцІбикІахъули, някълизиб хІябал кадирхъанра сайра Азила БяхІяндгІяли, хІяйна тІяхІухъи, хъямики михъири буцили, цІубабала урга тІашизурси НурбяхІянд хъяшаван тямхъярвариб, гІур къазакъуначи шурухъун.

– ХІушаб нушани селра лугули ахІенра! ДубкІехІе, амма хІелугехІе, – тІамадарили сай. ГІурра илини иб:

– Нуни хъя барибсира, Дагъистан Деникинна хъямчибазибад умубарайчи ургъес. Жагъилти! Набчил чихъали саррал, иша дурадухъеная!

Къукърачирти варгънира хІякнира ца шайчи лайдакІили, дурабухъун някъбазир тупангунира, илди агартани чяхІдарили ханжултира «Нуша хІечил сарра, БяхІяндгІяли! Шира шантира батахъес жан дедес нушара хІядурлира!»

БяхІяндгІялини наиб НурбяхІянд ганзухъличивад хъяша къяйда халкъла гъала тІашватур.

–Туснакъварая! – вявбикІесбяхІиб шанти. Амма ил катес МикІхІиб туснакъ аги.

Къазакъунани багъур, микІхІенти чус мутІигІхІебикІни, чула тІалабуни детхІерахъни. Ил гъабзадешла баркъудили цІубаби урухбиахъуб.

Чула мурад бетхІеурли, илдани ши бархъбатур ва ДешлахІярлизибяхІ батбихъиб.

Илала гІергъи къазакъуни микІхІентазибад урухлири. Жиндразиикибси Деникинни МикІхІила шилизи карательный отряд бархъили чеббирциу или микІхІента гъар дуги ва гъар бархІи МикІхІи лябкъуси гъунчиб сахъси къараул бирулри. Шила лебилра цІакъ лябкъуси урехилис чІумаси жаваб бедес халаси сахъдешличил хІядурлири.

1919 ибил дусла августла 23-личиб шилизибад гъарахъли ахІенси Пасте бикІуси мерличибра микІхІенталара деникинцыбалара дяв бетаурсири. Шихяли Азини, МяхІяммадов ГІябдулкъадирли ва Ненила Ибрагъимли бекІдеш дируси къукъя Ахъуша-ДешлахІяр гъуйчи укабиили, илад аркъуси цІубабала взвод кабушибсири, ца офицер калайчи. Илра Ахъуша аркъути уркрала урга дигІяникили верцибсири.

Сагати цІакъаначил душмантИ ДишляхІярличибад лябкъули саби ибси хабар МикІхІи дягІван абаиб.

Ил хабар баянбарахъес МикІхІила отрядунала букІрани БяхІяндов Байгиши вархъиб. «ЦІубаби Ванашидиркъаличи абаили саби. Гъалаб урчала

15-20 мурдабазибад цалабикибси кьукьялис г'ергъи халаси отряд лябкьули хебри», – буриб Байгишини.

Ил хабар бурахъес, дергъличи адамти х'ядурбарахъес, ярагъ дучахъес Мик'х'Ии вархъили сай.

Илх'ели Мик'х'Иила шила юзбаши сайри Сулайба Алхас.

Юзбаши шантаци дугъаизур:

– Душман Дега къадала аили сай. Нушала шилизи ух'наверхес, нушачиб чеббиц'ес, мукъарличи бец'Иван гъаргъли сай. Ярагъ някълар дихес вируси – ил чи дигара виаб – дурадухъеная! Зулмукарлис гъуни гъабарая! Бяхъя халкьла х'Иили х'Ебелкъунти къазакъунас! Гъабзадешла х'Ялумц'уси манзил бак'Иили саби!

– Дубк'ех'е, амма душман дукарвах'яхъее х'елтех'е!

Юзбашила жили урк'ичеббарили, Деникинна хурачи къаршили жагъилти ах'енну, бухънабира, хъунул адамтира, дурх'Инира балли дурабухъун.

Мик'х'Иенти варачанван Г'Яякъакъализи, Дегала къадала батбихъиб. Г'Ях'Имадов Даудли, Бях'Ияндов Алхилавли, Султ'анбеков Г'Ялини бек'Идеш дирути Мик'х'Иила халкьла кьукъни бег'И гъалар Зуримахъилизи, Г'Яякъакъализи, Дегала къярдлизиде кадаибтири, зулмукарлис гъуни гъабарес. Илдала някъбазир тупангунала, тупанчабала дурарад, ханжулти, дисби, миршби, галми, къялкъни, бардни лерри. Г'Ях'Имадов Даудли, Бях'Ияндов Алхилавли, Султ'анбеков Г'Ялини бек'Идеш дирути 400 адамлизирад цаладяхъибти отрядни гъуни буцес Чях'Имахъилизидях'И датдихъиб.

Дергъла цаэсил барх'Ии душа бяхъяни мик'х'Иента чейсулри. Лавашала шилизибад халкъ гъачамлис Г'Яякъакъала кабаили ах'енри. Дергъла цаибил барх'Ии 37, к'Иибил барх'Ии 26 мик'х'Иен кабушибтири.

Мяг'Инибирахъуси Г'Яякъакъала цаибил дявлизиб бахъал мик'х'Иенти «Я дубк'ех'е яра ц'убаби къирбирех'е!» ибси жилиуб гъабзадешличил бургъи, душа вец'Инали халаси ц'акълис мук'урх'ебак'иб.

Хасданра халати гъабзадеш чедиахъули бургъи отрядунала бук'Ири Г'Ялибег Багъатиров, Г'Ях'Имадов Дауд, Бях'Ияндов Алхилав, Султанбеков Г'Яли. Илкъяйда жан хъябла дигъи гъабзадешличил бургъи Зазала Къурбан, Х'Ясанов Арслан, Г'Ялиев Жамалудин, Мустапаев Бях'Иянд, Ражбадинов Мусалав, Мях'Ияммадов Ярях'Имад, Г'Ялиханов Мух'Иидин, Халимбеков Г'Ямар, Шях'Ибанов Ибрагъим, Чамкуров Мях'Ияммад, Дяг'Ияла Бях'Иянд ва царх'Иилти мик'х'Иенти.

«Биалра кабили

Хъябличи хъанц'а ханжал,

Чевухъунси гъабзала

Дях'Ила ранг дарс'Иедирар».

**Г. Б. Бях'Ияндов**

Цаибил барх'Ии мик'х'Иентачил барх' гъабзадешличил бургъиб Жангамахъила, Мик'х'Иила, Лябхъула, Дегала, Чебях'И ва Убях'И Мулебк'Иала, Хажаламахъила ва Ахъушала партизанти.

Душмантала ц'акъ вец'Инали халасири:



- 1. Офицртазибад цалабахъибси хасси отряд.**
- 2. Хьурали башути къзакъунала 2 батальон.**
- 3. Красная ГЯрмияла ясиртала батальон.**
- 4. Дагъиста мурдабала полклат отряд, къзакъунала мурдабала отряд.**

Илдазир 37 пулемет лертири. Полковник Лавровла карательный полк 1200 бургъайзибад цалабикибсири.

Гяякъакъала дявла цаэсил бархИи – августла 24-эсил бархИи – ихдигъунти сарри душманталара Лавашала районна халкълара дявила цаакъани.

Цаэсил бархИи 300 белогвардеец кабушиб биалли, кИэсил бархИи ханжултала гъазализиб 1700 кабушибтири. Дагъиста тарихлизиб мажахИят леббиз ца дуги-хИерила бухИнаб 1600 душман къирбарибси дяви!

– Дявила устадеш агарти, пIанкъбикIес хIебалуги, къяйк-къуйк чехIедаибти партизанти, нушала цаакъ чебаалли, гъандуцесхIебиубли бубшар, – Цубабала пикри ил сабри. Къзакъунала чус урехи лебниличи бекIлил пикри аги, лякъирлизи ахъилри, гIеларад ляркъуги душмантала гIяскурти гъачамлис хIеркIличи уряхИдугъи ахIенри.

Душманти Дегала къадакад гъайбиублири, партизанта хIеркIла кIелра шайчирти дубуртала вацIурбазир чус къулайти мерани дуцилри ва чус ункъси замана бикайчи хIерлири ва, ил бархибдеш пайдалабарили, ца гъакIли партизантани кIелра шайчирад ца чекъур. Илди челис-че зумадикIулри. Умути хIеркIла шин кабушибти къзакъунала хIили хIунтIендарибтири. ХIеркIла кIелра дуб душмантала жаназуна дицIилри. Ил секIал чебаибхIели, отрядла командованиели тупи ва пулеметуги ахътигъунти мераначи гечдариб, партизанти дигIанбикибси мерличи ца чекъур. 1400 тупангла, 37 пулеметла, 7 тупла къяйк-ала МуцIи къярдла кIелра шайчирти шурмазир гIер-гIералгъули, кIухла ца тIамаличи шурдугъун. Къзакъунани дяви бехIбихъиб.

Биалра деникинцыбала цаакъ вецIнади халасири: мурдабала эскадрон, къзакъунала мурдабала отряд, авал урчи дибгити 7 туп, пулеметунала 37 тачанка, ярагъли дицибти пургъунти, гужли дуцибти унцала уркири.

Разведкаличибси партизантала къукъя, гъандуцес хIебиубли, гIелабахI хихбиуб. Дегала чедибси вацIала бяхIяназир чус чихъти мерани дуцили мерлабиуб. ЧяхIимахъи душмантани буциб. Лебилра мурул адамти, хъулиб балбикибси ярагъра хапбарили, бемжурси дергълизи каберхур.

Къадалабти душманти гIяхIил чебиулри. Партизанти гъар игъубси хIярхIя заяли харжхIебихъес хIяракатлизибри.

Цубабани партизанти дигIанбикили бургар или гъанбикибси мер хIярхIубалабарили гIергъицун сабри гъалабахI ганз кайцIуси. Чапарта шимала халкъ ахъбирулри:

– БекIличи къапIа чебируси гъарил мурул адам душмантаци къаршили дурадугъеная! Гъубзнала хIял балуси бархИи саби ишбархИи.

Шилизиб лебтигъунти мурул адамти, някъбази ярагъра касили, дергълизи кабурхулри.

Цубабани къасбарилри чула пулеметуги кадихъес ахъти мерани дуцес. Партизантала командирти илдала хIиллаличи шакбикиб. ГIяхIтигъунти бургъантаци хъарбариб душмантала пулеметчикуни кабушахъес. АхIмакъ

партизанти и губти хІярхІуби кѣдала итил бяхІлизи дигІяникибси пулеметчикла михърлизи чейгутири.

Душмантала цалра пулеметчиклис пулемет бузахъес ахъри бакІахъибси ахІенри. Лебилра кабушибтири. Партизанти гѣлабяхІ башулири, душманти гѣлабяхІ – шимазибад кумек кабаили ахІенри. ИлхІейс дегантала ва микІхІентала 21 партизан дявила майдайчиб алхири. Илдала жаназуни Зуримахъилизи дурасибтири. Иларад уркрачир шилизи дархъиб.

МикІхІила ва цархІилти шимала бургъантас микІхІила бухънабани, хъунул адамтани, дурхІнани халаси кумек бариб: илдас кѣуцІри, диѣби, шин дихутири, илди зявдикІули урцути хІярхІубала заблиур бургъантаци диахъутири, бяхъибти гѣлабяхІ хъусбирутири, илдала дяхъурби дилгъутири, жаназуни шимази ардухес кумекбирутири.

Цаибил дявлизиб гѣабзадеш, яхІ, цІакъ, чІумадеш чедаахъили, бургъи микІхІенти СягІидов Рашид, Чамкуров Амирчупан, ШейхбяхІяндов МяхІяммад, ГІямаров Ибрагъимбег, НурбяхІяндов ХІясанхІусен, МяхІяммадов ЯряхІмад, Къурбанов БяхІямма (Алагай), ДаудхІяжиев ГІяхІмад, КъурбанбяхІяндов ГІисакъ, ГІяхІмадов ГІябдулжалил (Абчила), БяхІяндов Жамалудин, Абакаров ХІясан, ГІябдулхалилов ГІисабег, ГІябдурашидов ГІямар, ГІялиев Идрис, ГІяхІмадханов ГІялибег, БяхІяндов МяхІяммад (Шиндан), ХІяжибахІяндов Уцуми, Гъазиев Элмирза, КъицІаев МяхІяммад, БяхІяндов Муртазали, Будаичиев Жамалудин, Бадшиев МяхІяммад, ГІисаев ХІясан, МяхІяммадов ГІялисултІан, Ражбадинов Мирза, Рамазанов Рамазан ва цархІилти.

Чи-биалра душмантазивад урхІухъи гѣлабяхІ витІакІалри, тІамадири «Чина?! – ши, жинс цІахъирид!» Урузиубли, цІахъизурли, сунела дагърили ил сагали къяйкІесирхІи.

...ХІерейс цаэсил кумек бакІиб. Ил мулебкІила махъурбала гІяхІгъубзнала кѣукъя сабри. Дегала шиличи бяхІчиси вацІализи мерлабиубли бургъули илдани гъарли-марти гѣабзадеш чедаахъиб.

ХІери гІергъи Ашал МяхІяммадли бекІдеш дируси Хажаламахъила 70 адамлизибад цалабикибси кѣукъя кабаиб. Шамха дубурличибад илди душа тъллизи кабацІиб.

ГІергъила бархІи савлилис ахъушантала отрядра кабаиб. Илдани Дегала шила чеди чула пулемет кабизурли, кѣдаларад лаг ляркѣути тупира, пулеметунира, уркира, кѣзакъунира гѣаладяхІ вяшдухъахъес хІедатур.

Ахъушала отрядла пулеметчик Басирла ГІябдуллагъли душа пулеметуни даргусири. Душмантани ил дигІяникибси мер багъурли, пухІлизи гѣлабушиб.

ГІябдуллагъли сунела пулемет цархІил мерла барсбариб ва душмантаци сагали цІа чекъур.

Ахъушан Басирла ГІябдуллагъла биштІаси отряд кІел бархІи бургъи, лебилра душманти кърбарайчи. Даршал гѣабзализи бухъун.

БархІехълис нушала бургъантас къиянбулхъесбяхІиб: патиранти тамандирулири, калунтира лерилра тупангуначи далдиркули ахІенри. Бахъалгъунтала шел кадирхъан тупангуни сарри. Мажарли игъубси мерлабад гавла гулум ахъбирусири. Душмантани ила тупи ва пулеметуни дяхІчиутири. 80 дус виубси микІхІен Даудов ГІяхІмадхІяжини тупанг игъубси мерларад гав ахъдиубхІели, душмантани ила тупи дяхІчаиб.

Урегал микІхІен декІли бяхъиб. Уреглизивад ца ГІябдушарипов Чамсадин сайри мицІирли калунси. Пелабти: БяхІяндов Муртазали, ГІямаркъадиев Мажид, Даудов ГІяхІмадхІяжи, Киласханов ПалхІят, Сулагъаев ПалхІят дяхъурбазибад алхунтири.

БархІехълис душманти Абджал гІинизличи абаиб. Партизанти вацІализира шимазира ибкъаиб. Заб къяйда зумали дашути хІярхІубани бекІ ахъбуцахъес мугълат лугули ахІенри.

МаркІачІила дехІиба заманалис Шамха дубурличибад Зуримахъилизи гІяхІил ярагъли бегІбарибти ГІямарла МяхІяммадла отряд убяхІяхъиб ва бархъли дергълизи бухІнаахъиб.

ЛугІи камти даргала партизантала къукъяличи чебашути душманти тІашаэс ахъри аги. БархІахъайчи къяйкбикІути партизантала патиранти тамандирулри. Гъарилла ца чумал патиран сарри калунти. Илди мяхІкамдирулри илдани.

ЦІакъ камли биъни, ярагъ хІедиъни, гъачамлис партизанти камли биъни багъандан партизанти уркІхІебухъи, анарханархІебиубли низамличил гІелабяхІ башулри, цІубаби чебашулри.

Пур даргала шимазибад халкъ башесбяхІиб. ЧяхІимахъилара Дегалара шими душмай дуцилри.

Ил бархІи МикІхІила шилизибад – 35, Дегала – 11, ЧяхІимахъилизибад – 3 адам шагъидла бекІали алхун. Савли шалалис Зуримахъилизи убяхІбухъун ЦІудхъурла шилизивадси Шапиев ГІябдуллагъли гъуни чебиахъуси партизантала отряд. Илра бархъли дергълизи каберхур.

Ахъушан ГІялихІяжи-устадли дархъибти Хъар Даргала отрядунира савли дубурла варачанван къадала уряхІдухъун ва дергълизи кадерхур. Лавашала дявила штабра кабаиб. Фронтлис гъуни чебиахъулри ГІусман ГІусмановли.

Сагали дакІибти отрядуни штабли урехи лебсигъуна мерличичи дурхъулри. Дяв бемжур.

ЦІубабас ахърибакІиб пулеметуни къадала бяхІлизи, музализи ахъдучес. Къзакъунала пулеметчикунани гъар ургъуси партизан лишайзи кайсули, вяшухъахъес хІелтулри. Дявила штабли партизантаци хъарбарибсири, душмантала пулеметчикуни убасахъес. Штабла хъарбаркъ партизанта камси заманала бухІнаб таманбариб – пулеметчикуни кабушиб, илдала дуцибти пулеметуни чучи къаршили иртесдахІиб.

Даргала шимазирад кумеклис дакІибти лерилра отрядуни дергълизи кадерхурли гІергъи, нушала бургъантала лугІира душманталайчи абикиб.

Дявила цаибил бархІи хІерейс партизанти шурмази дебабиублири. ХІеркІла дубларти диркъурбачибти къзакъуни партизантала лишайубри. Кабушибти къзакъунала жаназуна къярдла дубра гъунира дицІилри.

Гъанна душманта балулри чула аги вайтІабикни. Дурабухъунти халкъли саби мицІирли хІебалтни.

Ахъти мерани партизантани дуцилри. Лявхъала дубурара илдазиб сабри.

Командованиели ярагъли, берк-бержли дицІибти пургъунти ва унцала урки гІеладахІ чардарахъес буйрухъбариб.

Лявхъала дубурличибад ахъси тІамаличил микІхІен ХІяжибяхІяндов Сулайбай тІамадарили сай:

– Душманти гъаббулхъули саби! Цалра душман калахъес асухІебирар, гІяхІгъубзни!

ИлхІели партизанти харчбизур, ханжулти чІяхІдариб, хІеркІла дубла пяхъбикибти душмантаци варачанван кабухъун.

Къада гарчли бицІили «Ура-ра!» зайбухъун. Партизанти къалабали

дубурличибад, дубурла бяхІназибад, вацІурбазибад убяхІбухъун. Ханжулта бахъал душманти кабушиб. МицІирли калунти цІубаби гъаббухъун. МулебкІала, ХІурхъила махъурбала партизантани илдазибадра бахъал кабушиб.

Берцибти душманти чарбиубли ЧяхІила къадализибяхІ гъаббухъун. Къадала кІелра шайчир – ахъти лусенти, гъалаб – Ханихла къада, гІелабад – ханжулти гъакІдикІахъули гІеббиути партизанти.

ЧяхІила къадала къавкъавтази ибкъаибти душманти дубурлантала ханжултазибад хІебевкІес къадала тІяхІбикІутири. Удир, хІеркІлизир, жаназуни куртІдикІутири.

ЦІубабала гІяскарла 1500 солдатлизибад берцес бикибти чІянкІли ца-чумалцун сабри.

Илкъяйдали цахдешличил таманбиуб Поповла дарганти мутІигІбарес дураберкІибси чябхъин.

Деникинцыбани Дегала къадалис «Ажа къада» бихъили саби. ЦІудхъурла ва хажакунтла отрядунас устадешличил бекІдеш дирули гъабзадешличил бургъиб хажакан ГІусман ГІусмановра Мусултивадси Рабадан Нуровра.

ГІяккъакъала дявзиб Деникинна гІяскар бячІнилизиб отрядунала командирти микІхІенти, империалист дургъбала Австро-Германияла фронтлизиб бургъули калунти, дявила халаси опыт лебти бургъанти ГІяхІмадов Даудли ва БяхІяндов Алхилавли лебгІеб халаси пай кабихъиб.

Халати гъабзадеш, устадеш, ВатІан багъандан гІямру, гъунарти чедаахъиб илдани.

ГІяккъакъала дявтазиб, жан хъябла дигъи, гъабзадешличил бургъиб МикІхІила, ГІяялахъябла, Зуримахъила, Дегала, Жангамахъила, МикІхІила, Лябхъула, Лавашала, Хажаламахъила, ЦІудхъурла, Къуппала, Убекила, Ахъушала ва Сергокъалала районтала цацадехІ шимала гІяхІгъабза халкъ.

Душмантази даргала шими хІедуцахъес, халкъличирти гуж-зулму уркасахъес, халкъ рягІятхІебарахъес, халкъла лебдеш хъям-къацІхІебарахъес багъандан бахъал даргала партизанта чула гІязиз жан къурбандариб.

Бунагъ-хатІаличивад Аллагъ чеверхаб чула. Алжанала агълула баркъаб лебилра ГІяккъакъала дявлизир бутІакъяндеш дарибти партизанти.

ГІяккъакъала дявлизир 382 микІхІей бутІакъяндеш дариб ва гъабзадешличил бургъиб. Илди лебилра хІунтІена партизанти сабри.

Дегала къадалар, ДешлахІярличир диубти дургъбала гІергъира микІхІента Темир-Хан-Шурала, Манасла, УбяхІ Къазанишла, Хайдакъла, Баршли шимазир детаурти дургъбазирра бутІакъяндеш дариб.

ГІяккъакъа гъалмагъ-тянишлис, гІяхІял-шайс гъарзаси, сахаватси саби, амма душмантас – къакъаси.

ХІера иличила се лукІулил Дагъиста поэт Сулайбан Рабадановли:

– Къакъали къакъасирив

Бурагу, ГІяккъакъа?!


– Душманти хІебакІахъес

Биубсири хІу къакъа!

Пагъмучевси даргала поэт микІхІен Газим-Бег БяхІяндовли даргала партизантас дахъал цІакъти, мягІна мурхъти, назмурти делкІун.

Дебали лайикъси саби ГІяккъакъала дяв даршал дус биънила байрамлис, хІурматлис Газим-Бегли белкІунси назму.

**Газим-Бег БЯХІЯНДОВ**



**ДАРГАЛА ПАРТИЗАНТИ**

**Бурямти хІулбазирли  
Ахъ хІурхъазир акІубти,  
Дубурти уркІбазирли  
Даргар халадаибти.**

**Сабур кахІеберхахъес  
Санга шурми деркунти,  
Хи гъалакли дузахъес  
Варачанти держибти.**

**Шанда шяхІрумар шушкни  
Хъахъли дугадиранти,  
Бидавтас лутИи-гІябул  
Хъатнякъба адирхъанти.**

**Тупангла хІяралабад  
ХІяйран далай бучІанти,  
Мисри турла бехІличир  
БехІ гумлачир дулхъанти.**

**ЛямцІла ургилизибад  
Къалиян улкахъанти,  
ХІярхІяличил хІярхІяла  
Дяхъи гъалабиранти.  
УркІби цІала, яхІ шанда,  
Даргала партизанти.**



# Тъундъаъниди



Дагъиста халкъла поэт  
**Аминат ГИЯДУЛМАНАПОВА**

## НУРГЪБИ ГЪДУРСИ БАЙРАМ

МяхІячкъалализиб дурабуркъуси Чедибдешла БархІила байрамличиб гІяхІцад бутІакъянчиби лебри. Ленинна уличилси площадьличи цалабиклири декІар-декІарти организациябала хІянчизарти, студентуни, пенсионерти, дявила бутІакъянчиби ва бахъал цархІилти.

Гъайгъайра, дургъбала бутІакъянчибала лугІи дусличи-дус камкабирули саби. Амма дургъбала бутІакъянчибала уршби-рурсеби ва дургъбазибад чархІебухъунти игитунала, бургъантала суратуни ахъдуцили, «БекІаагарси полк»-лизиб къунзбухъун.

Рурсила уршиличил дарх, дургъбазивад къел-хІерзи агарли веткахъибси дудешла узила суратра ахъбуцили (ГІябдулкарим ХІяжиев бикІи илис), нушара илдала къянази цахІнадикили гъайдиубра. Тамашала пашмандешличил барх уркІилизи разидешра пахрура адицІулри, сенкІун дила дудешла узбанира ВатІан балтахънилизи мекелли халаси пай кабихъибхІели. Дудешла кІиибил узи ХІяпиз ХІяжиевра дергълизив къел-хІерзи агарли веткахъиб, Рабадан ХІяжиев дургъбазивад чулахъиубли чарухъун.

Илгъуна байрам гІямрулис чилилра хъумхІерту.

Адамта шагъарла къакъурби дицІилри. Ва гъарилли чула бургъантачила пикруми дурулри.

## ДАРГАЛА БУЛБУЛ-ЧАТІА

БархІехъла замана КІарахъала театрла гъала шагъарланти чукурбикиб. Дагъиста лебилра районтазибад, шагъуртазибад бегІлара черикІла далайчиби ва делхъчиби бакІилри байрамлис хасбарибси концерт дураберкІес. Бахъал гІяртистуни, делхъчиби, ансамбльти лерри. Дила ва цархІилтала пикри битІакІиб сарерхурси, жагаси дарган далайчи рурсили. Иличил тянишриубра ну.

Лавашала районна ЧебяхІ Убекирадси 8-ибил классла ручІан Сабина Идрисова сарри ил. Илала далайли ва жагаси тІамали, гІяртистдешла устадешли лехІихъути паргъатли хІебатур, ва далай таманбиубхІелира хъат лебтанилра

тIашиули ахIенри. Иличила гIяхIил багъес хьулриубра: севан илизир далай-рикIес илдигъунти устадеш акIубтил, чили далайрикIахъес бурсирарибсил.

ЧебяхI Убекила шилизиб 2005-ибил дуслизиб акIахъубси искусствола школа лебли саби. Илав дурхIни делхъличи, далуйтаци, дам бирхъяхъес бурсибурси хореографли узули сай ГъазимяхIяммад Идрисов – Сабинала дудеш. Илдала уршира машгъурси далайчи сайри, ва школализив учIухIели дипломти сархибтири.

ГъазимяхIяммад, МяхIячкъалализиб «Культпросветучилище» таманаили, сунела шилизи чарухъун, дубуртала «урунжуни» гIурра хабарла детаахъес ибси къасличил. ГъазимяхIяммадра урибси далайчира делхъчира сай. Сунени касибти искусствола шайчирти багъудлуми дурхIназира далахъули, чумал дус узули сай ил.

Сабинала сархибдешуни дахъал сари. «Нушала ВатIан Россия» бикIуси конкурсличиб илини цаибил мер сархиб. Цаван дарган ва урус мезли ункъли далуйти дучIули сари илини. «Дусла далай» конкурсличирра ил чедирикиб. «Челябкъалализи ганз», «ДалайрикIусири ва рулхъусири районти-ургартти, республикала ва дурала мераначир дурадуркIути конкурсуначир илини сархибти дипломти дахъал лер. Ил делхълара гIяхIси уста сари. Сабина школализирра ункъли ручIули сари, илис хаслира математикала ва англиялан мезла дурсери дигахъу. Нешлисра гъарил бируси хIянчилизира сарерхурси кумекчи сари.

Ил бархIира, Хъаргаблизиб лерилра районти-ургаб дураберкIибси конкурсличир чедирикити, диплом сархити, МяхIячкъалализи ракIесра бажардикилри Сабина. Ишабра диплом сархиб.

ЧебяхI Убекила шилизибти дурхIнала гIямру тамашала сари. Илабси искусствола школализиб 23 дамрухъа ва 17 делхъчи леб. Ила башес гъалакли саби школала имцIатигъунти дурхIнира. Далайчибира бегIлара чеббикIибти саби. Ил хабарли нуша разириахъубра.

«Дерхъаб пагъмурти!» – эс дигулла. ГъазимяхIяммадлисра илала дурхIнасна гъарбизуницун диаб мурталра!

### **«ВЕГIЛА МЕЗ – ГIЯМРУЛА ДАВЛА САРИ»**

Наб бекIлил гъанагарсири ил гъунибаъни. Агъулла районнизи кабурхуси Чинар бикIуси шилизираб набчи зангъ дакIиб. Нуни бекIлил хIералуси дарган мезла литературала учительница Рабазанова Марият МяхIяммадовначирад. Ил сунени бучIахъути дарган дурхIначил гъунираахъес набзи жирикIулри. Дарган мезла мугIяллимтани жирарибхIели рашусира, «Лачин» журналла редактор сарлинра ва писатель-поэт сарлинра. БегI гъалар сарри ну ила рякъунси. Биалра пашманхIериубра. Мариятла балбуц гIеббуцилри бегI гъалаб школала директор Мусаева Умижат МяхIяммадовнани ва мезанала учительтани. Халаси гъунибаъни-шадлихъ бетерхур. Балбуц лебгIеб гIяхIил балкъаахъурлири, дила жузала выставка барилри, видеоби хIядурдарили, суратуначилси стендра лебри. Гъайбухъун школала дурхIни, делчIун назмурти дарган мезли ва урус мезли. Ил гъунибаъниличиб лебри дурхIнала бегIти, гIяхIцад учительти ва набчил ДГПУ-лизир цахIнар ручIули калунси рахъIила гъалмагъ Айна Ибраилова.

Ил гъунибаъни набра школала дурхIнасна байрамличи шурбухъун. Директор Умижат МяхIяммадовна МяхIяммадсалихI ХIусаевла рузи руилри. ГIяхIцад гъанбикуни нуни илизира дурира иличила, сунени набзира дуриб.

Марият МяхIяммадовначила гъар секIал дагъес пикрибарира. Чинарла цаибил школализир даргала, табасарантала, азербайжа ва агъулла мез рур-

къяхъули сари. Марият Рабазанова дарган мезла ва литературала дурсри кадирхъули гъанна хІябал дусра-сера илар рузули сари. Авъибил классличирад 11 ибил классличи бикайчи дурхІнани дарган мез руркъули сари.

– Мез дяркъес лебтасалра дигули ахІен. Школализир кадирхъути чумал дарсли илди мезличи бурсибаресра хІейрар. Набзир мезличи диги дила бегІтани адикъур. Сегъунти-дигара далдуцуни пикридирулра дурхІнази мез дагъахъес. ХІязани, тестани, инновациябала гІягІниахълуми пайдаладирулра. ДурхІнази руркъяхълурла даргала писательтала биографияби, илдала назмурти уркІиличир дагъахъес маслигІятбирулра. Сценкаби дирахъес бурсибирулра. Гъайгъайра дурхІни-ургар конкурсуну дурадуркІулра ва чедибикибтас грамотаби ва савгъатуни лугулра. Дербентлизир конкурсуначирра дила дурхІнани гъаларти мерани сархиб. Дахъл къияндешунира лер: методикала материалти агара, ишбархІила тІалабунас далдикибти жузи агара. ЦацахІели урус мезла белкІани шурдалтулра дарган мезличи, дурхІнази чула мезлира дагъахъес. Замана ва адамти барсбикІули саби, тІалабунира заманаличи мешути диэс гІягІнити сари. Учителъла хІянчи гъамадси ахІен, гъар бархІи хІуни сегъуна сагадеш лебхулрил хІечи дурхІни хІерли саби. Школализив узусила дурхІначи диги диэс гІягІнити сари, учитель сунела предмет ункъли балуси виэс гІягІниси сай. ВегІла мез – гІямрула давла сари, – рикІи Марият МяхІяммадовна.

Илдас нунира баркалла багъахъурра, илгъуна гъунибаъни дураберкІинилис. Ишгъуна бархибси манзил, Мариятгъунти учительти биалли, мезра детхІейхъур. Мариятлис гъамадси ахІенси хІянчиллизир сархибдешуни, кулпетлизиб балгундеш, чархлизиб арадеш дулгулра.

## МЯММАУЛЛИЗИ АРХІЯ

Цагъачам нушала редакциялизи Талан Идрисов бикІуси адам вакІиб.

– Нунира назмурти лукІулра, хІушази делчІахъес ва кадяхъяхъес гъаладирхълурла. Акъуси замана назмурта учІес ва лукІес дигахъис, – викІар ил.

Гъайгъай, нуни илала мурад бартаахъурра. Т.Идрисов Сергокълалала районна Мяммаулла шилизивадси сай. Гъаланачи ил узусири гІядлу-зегъа далтахъути органтазив. БусягІят узули сай ДР-ла экономикала министерстволизив.

Бахъл дурхІнар хъалибарглизив халаваибси сай: авал узира ца рузира лебси. Узби Лачин, Горкин, МяхІяммад гІядатла адамти саби. Илдани шанти-ургаб хІурматра сархиб. Рузи Зубалжат Оренбурглизир дурхІнала анхъллизир воспитательнищали рузули сари. ЯхІ-ламусла, дубурлантала хІял-тІабигІят ункъли дагъурти илди, чула неш ГІяйшатличи шилизи мурталра башар.

Иш гъакІлизир Таланни нура Пирдауз Камаловара чула шилизи дукира.

– Нушала шантас дебали дигахъу назмуртира далуйтира, – викІар ил.

Ну чумал дус гъаларра илдала шилизи рякъунсири ва, клублизи шанти, бучІанти цалабикили, гІяхІси гъунибаъни дураберкІибсири. Далуйтала, делхъл тІамри авадай тІинтІбиубси Мяммаулла шила мер-мусаличир гІералгълурли. Гъаннара, школализир дурхІнала каникулти диалра, бахъл биштІати цалабикиб. Гъунибаъниличиб илкъяйдали лебри учительти, шила жамигІят. Клубла заведующая Муъминат СултІангІяхІмадовна балбуц ункъли бетерхахъес къайгъилизирри. Илис ил барес къияннира ахІенри, сенахІенну ил гІяхІцад дусмазир илар рузули сари ва шила дурхІни-ургар декІар-декІарти далдуцуни дурадуркІули сари: байрумтас, игитунас, спортсментас хасдарибти далдуцуни ва цархІилти.



Гуляят АрслангІялиевани дурхІни ункъли хІядурбарилри: назмурти делчІахъун, уркІиличир дурахъиб.

ДГУ-ла филфак таманбарилри, гІяхІцад дусмазир школализир урус мезла ва литературала учительницали рузули сари СалихІят Мухтаровна. Илинри дурхІнази назмурти делчІахъун. СалихІятли мурталра нушачил бархбасуни дузахъули рирар. Илани аргъбаибти масъулти ахъдурцути белкІани дашахъули рирар.

Балбуц бузахъулри филолог Минара ХІябибуллаевнани. Набзира гъай лугули, Пирдауз Камаловазира далай бучІахъулри. Ил балбуц байрамличи шурбухъун. ДурхІнанири назмуртала дурарад, далуйтири зайдухъахъун, делхъ дариб. ХІяз таманбиубхІелири, илдас нушазибад декІарбикес дигули ахІенри.

Илар нуша тамаша адамтачилра тянишдиубра. Илдала-ургар гъанрушес рирус библиотекала заведующая СалихІят АрслангІялиевара. Илани дурхІназир жузачи диги акІахъес халаси къайгъи дакІубирули сари.

Балбуцличи бакІибтазивад гъарилли савгъатунира касиб. Талан Идрисовли илди гъар дус къулбасдирути, гІур школала бучІантаци ва клубла хІянчизар-таци диахъути сари. Баркалла биаб сунес.

Мяммаул 250 хъалибарглизибад цалабикибси, сунезиб 650 адам хІербириси ши саби.

КІинайс нуша Таланна неш ГІяйшатличил гъунидаира. Илала юрт ахъти ва дерхъибти галгуба алавбарилри. Илаб хъунул адапти кабирахъес барибси гумай леб. ГІяхІцад хъунул адапти ила кабиилри нуша дякъунхІелири, илди-ра гІяхІлачи разибиуб. Илди сабри СягІидла ПатІимат, Умият, Къизбике ва цархІилти. Гъарилли чула пикруми-анцІкъи дурулри: хІукуматла агарти къайгъначила, яшавбарес мурул адапти дура арбашниличила, хІянчи агниличила.

ГІур нушала байрам шила дублабси ХІямри-озень хІеркІла мякълаб, Шамилла фазендализиб даимбарира. Деркести, держести хили ила Мухтар ва илала кулпет, Таланна тухум-агълу цалабикилри. Илдала уркІбала ванадешра някъбала сахаватдешра хІеркІлири чедиутигъунтири, сабира умуги шин ди-хъули, разили кабухъири.

Ил гъунибаъни хъумхІертеси бетаур. ДиштІати шимази дашули, илабти халкъ уркІичеббарес дирухІели, нушабра дигесли саби.

Ахирличиб Саимат МяхІяммадовани наб иш назмура пешкешбариб.

**«ХІулбани хІер бихІули,  
Къяшмани чарх бихули,  
УркІили хІу рихІули  
Калаби дунъя лебай.**

**Телевизорлизирад  
Нушани чериуси,  
Чис гъанбиркиба гъатІи  
Мякълар чериуд или?**

**Азир баркалла диаб  
ХІу нушачи кибсилис,**

**ХІедра азир баркалла  
Нуша мучладарнилис.**

**Нушачи ракІесгъуна  
АхІи къиян мабакІаб,  
ХІела гІямрулизиб хІед  
Вайси бархІи мабакІаб.**

**Дурули дурес хІейрар,  
ЛукІули делкІес хІейрар,  
ХІед баркаллала дугъби  
Я кадерхахъес хІейрар.**

# Поэзия



ШапиГ МЯХІЯММАДОВ

## ГЕХІЕЛ ТУГЪЛА

Чехьертала хІерлиур  
Дигай – вавни ламдикІар,  
ХІеблизир дубуртиван  
УркІби авадандирар.

ГІямрула хьу делГули  
Ванза давлачеббиру,  
Марти дигайли хІурмат  
Гьар адамла ахьбурцу.

\* \* \*

Далай – ил далай ахІен  
ГІямру гІячихьХІейруси,  
Яра дигайла макьам  
Ахьбуцес гьунар камси.

Далай – ил далай ахІен  
Дагьри шалахІейруси,  
УркІбазиб дигайла дард  
БацІахьес хІебируси.

\* \* \*

Вари лерра марикІуд,  
Лерни бала лебтани,  
Хаслира чула уркІи  
ХІезицун атІунтани.

ЦуммарикІуд бахьлизи,  
ЯхІбарес рирухІели,  
ДецІлизиб уркІила цІакь  
ХІезиб халал лебхІели.

\* \* \*

ХІябкІапІи кьарла урgab  
АвкІапІи баргибхІели,  
Ваваличиб дурхьали  
Кабилзи наб жагьхІели.

УсuxІели бекІлиу,  
ГІянайу кабихьили,  
ХІед кьадаррирул рурси  
Чериид бикІухІели.

\* \* \*

Хьунул адамла лявли  
ВицІахьу мурул адам,  
Ца дус ляв камбиалли,  
Бурьахьу илала кам.

Хьунул адамтаницун  
Шадли дуркІахьу гІямру,  
Гьарил талихІли ургу,  
Таманбиралли амру.

\* \* \*

ГяxИси-вайсилИчила  
Пикруми гьудурxИели,  
УркИла аргъ бамкъурли,  
Сабур камбикIухИели.

Гьунираи xIу набчил  
ГяxИси шалкIу буцахъес,  
Арадеш мяxIкамбарес  
Вайси къяшмауб батес.

\* \* \*

Хамдешли уркИи бицIес  
ГьалакмарикIуд, вари,  
Къайгъибара калахъес  
Риубцад чархла ари.

Ламиличи дигайла  
Гьамдирар цIабикъала,  
Къайгъи, къас лер диалли,  
Ил ахъдешличи xИела.

\* \* \*

БегIтачил xIу разили,  
Мекълис вягIда барили,  
Дуслис гIярмиялизи  
Гьалмагъ гьунивватурли.

Цадешла мугъур лебли,  
Чергъахъадив тIулека?  
ХИечи хапли бакIибси  
Дигайла се келека?

\* \* \*

ВирххIеэсил гьунарла  
Адамти бири гьалаб,  
Нушаб дунъя батурти  
ХИекъли мурхъти дагърила.

Аслу-мина xIурматла  
БегIти-хала бегIтала,  
ШалгIеббухъаб, хьумхIерту  
ДяхI-сипат дурхИна чула.

\* \* \*

Щудара доскализи  
ЦIуба мелли хатI лукIа,  
Дигайли гIямрулизи  
ХьумхIертул хабар лукIа.

ДурхИни акIубмад чули  
БегIти талихIчеббиру,  
Илдала марти дигай  
Сагали дебшладиру.

\* \* \*

ХIерла шала, харидеш  
Вавниван гьадурцули,  
Шаддешли уркIби гарчли  
Цала-цали дирицIули,

МуридикIаб дигайлис  
Дархли дирути къайгъни,  
ГIямрулизиб мабухъаб  
ГIяхИси хIялличи дяхIци.

\* \* \*

Бирар цабехI бикIули:  
ЧеррикIаба ну xIуни,  
Хьул ва къас детаахъес,  
ГIямру шадли деркIахъес.

Ригахъаба хIед нуцун  
Дигайла цIа ухахъес,  
Чибара чатIаличил  
Дигалли гIямру деркIес.

\* \* \*

Буцибси бялихълисван,  
ГьигъикIес жапахIели,  
ГIячихъси аргълизивра  
ХIерикIес къиянхИели.

РакIи, ракIи, гьарракIи,  
ДецI дугIаа кIилалра,  
Дигайла гъав, кIелра чарх  
Риубцад мяxIкамдара.

\* \* \*

Нарла духІнар кьумасван  
Наб дунъя кьакъахІели,  
ДецІла чяхІилизибад  
Берцуди агархІели.

ХІела дяхІ чедаили,  
Гъайла тІама аргъасли,  
Хъурабирахъу хапли  
Набчи хІебиуб хІели.

\* \* \*

ХІебла гъарзадеш хили,  
ВавназибхІели ванза,  
Дигив, хІу арацІахъес  
Ибхъис уркІила унза.

ЧяхІ-заблис гІергъи зурхІяб  
Ванзалис рурхІухІели,  
КайрахІе хъябдуцили,  
Дигайла гъе делгІули.

\* \* \*

Савли хІулби абхъасли,  
Илдази карицІулри,  
Някъ буцили, уркІила  
Аги-хІял хІердирулри.

ХІянчила гъунивватес  
Къайгъназир ласрикІулри,  
Сецад къанни вакІасра  
Набчи хІерли рургулри.

\* \* \*

ХІечи карцІси уркІила  
Гумайла карацІили,  
Ил уббатес рахъ жявли  
ГанзухълигІир умцІули.

Дигайла къасанала  
Вавни шулдирахъули,  
Шалати пикрумала  
Урхъу сен буръахъулри?

\* \* \*

РяхІмат зумаси хІебван  
Гъарзаси уркІила регІ,

Ваваличиб мирхъиван  
Балбикиси чархла регІ.

Гъабзаван сабур-яхІла  
Рашадлира бекІ ахъли,  
ЗурхІяблагъуна шала  
Сецад иртІалра хІерли.

АхІенра хІечи карцІли  
Алав рашадра лавцІли,  
ВалхухІели цархІилли  
Ну дигайла шарабли.

\* \* \*

ХІела хІер берхІигъуна  
Ванадеш-шала дархси,  
Гъамли гъайрикІухІели  
ЗурхІябла мер бурцуси.

ХІял ряхІятси идбагла  
КІел уркІи уржахъуси,  
Урgab гъайбикІутала  
Чарх хІерли руржахъуси.

\* \* \*

Исбагъи чераадли,  
ХІер алтІан, ил шадбирар,  
ХІял-табигІятла шала  
ДигІянни багъес хІейрар.

Илис, кацІи уркІила  
ДигІяндешра гъаргбара,  
ХІед игъбарла берхІила  
Шала лебал халбара.

\* \* \*

Дила цаибси игъбар  
БархІи хІу цугрикибси,  
Гъала хІебла зурхІябван,  
УркІилизи атІунси.

Дила цаибси талихІ –  
Манзил тІама аргъибси,  
Чедаили шалал дяхІ  
СягІят ну арцахъурси.

\* \* \*

ДурхІнас гІяхІил дигахъу  
Мурити конфетуни,  
ХатІа бирутас – хъями,  
Динна агълулис – балгни.

Наб хІела мургъи-дугъби,  
БерхІиван ванал хІулби,  
УркІила буцІар лами –  
ТІагІям бизил хурегла.

\* \* \*

Дигайли ламдарибти  
Чарх уржахъул биркІанти,  
ХІечи карцІайли сари  
Изайзи дикахъибти.

КарцІайли дяргІяхъибти  
Чархла тумазирти хІи,  
Изай дуцахъес ахъри  
Агу ца хІезиб ахІи.

\* \* \*

Цунси галга бурямли  
Гъамадли кабиркахъу,  
Гъарил инсан цундешли  
Вахъ кункли хІянирахъу.

Вари, хІуни рирули,  
ВахъхІи цунни малтаба,  
Мякъла карибхІели  
ХІерли ну хІяршвираба.

\* \* \*

Дила сарри хІу  
ХІулба ряхъибла,  
ХІела сайра ну  
УркІи аргъибла.

Дигай – талихІлис  
УркІби аргъибтас,  
Илди – гъарбизлис  
Къуллукъ бирутас.

\* \* \*

Дила гъавла гъайкари,  
ХІер шадбирул цІуэри,

УркІила тимхъ царугли  
ХІербируси ца хІури.

Дигайла зубарири,  
Янилизир вавари,  
Наб халдарес дигути  
Дигайла цІедеш – хІури.

\* \* \*

Гъубзна гъабзадешла цІакъ  
МяштІхІебиру, харжбиру,  
МалхІямдеш, тѧп вававан,  
МяхІкамдиру, хІердиру.

ГІяхІгъубзни дигайлара  
Къараулти гъархІели,  
ХІядурти жан кайхъара  
Исбагъи ралтахъули.

\* \* \*

Сагъдешла шадси гъавли  
Ну хІулкІухІейрухІели,  
Тухтуртачи вашули  
Дармунта ужухІели,

Рирхаи, наб дармунти  
АхІен, ахІен хІяжатти,  
ХІела лявла дугъби сар  
Наб арадеш кертІути.

\* \* \*

Гъагултиван гъамадли  
РарсрикІадлира хІяйзир,  
Ралтулри каратурли  
Нуни хІу уркІилизир.

Къасмабирид лебси хІял  
Барсбарес, бугабарес,  
Къасбара гъар ихтилат  
КІилалра мурибарес.

\* \* \*

Дигайла цІали алкун  
УркІи халхІебируси,

Бура, чила хІерлири  
ХІу илцад хамрарибси?

УркІилаб сагъхІебирул  
ХІури дяхъи барибси,  
Дигайла ца бишахъи,  
Дила чарх биргІяхъуси.

\* \* \*

ХІечила къасана  
Гарчли биціибси,  
Ганзмабирид уркІи  
Шаддешлизибси.

РакІили, хІерла нур  
Гъабуца шадли,  
Катес камси манзил  
ХІечил варх лехІли.

\* \* \*

Беркунси ашарули,  
ХІер набгІибцун умціули,  
Масхуртали, лякъирли  
Даим хІулруркІахъули.

ХІер берхІиван рурхІули,  
УркІи бацван харили,  
Дахъал гІямру деркІаби,  
Дила мурад бирули.

\* \* \*

Дила сабурла дазу  
Кабурхахъис марикІуд,  
Сецад къасбарадлира  
Ахир баргес хІерируд.

Илала хІячми сари  
ХІилизи мурхъдикили,  
Лигала мехІелизи  
Жявлил гъудурдиубли.

\* \* \*

Чумаси хІела ярагъ –  
Ляв гъабурцен гъархІели,  
Ну хІерла лутІилизи  
Ваахъес дигухІели.  
ИлхІели дигайла ца  
Ухар тІякъярбикІули,  
Варъаличир мурили  
КІунтІби гъамдикІухІели.

\* \* \*

ХІу гъанни хІерируси  
Хъябшли сайра, гъарракІи,  
ХІерли, гъайли лявбара  
Анцікъили биціиб уркІи.

ГъарракІи, наб гъанагар  
Харидеш хес дигадли,  
Дигайли хІулукІахъес  
Абалтул гъигъ лебалли.

#### АВАЛ ТУГЪЛА

Дурхъати саб адамти  
Дигайлизиб чебяхІти,  
Ца итилла талихІлис  
ХІербирули калунти.

\* \* \*

Игъбарра хІу, талихІра,  
ГІямрула ахъанайра,  
Сахъси лусенна зайра,  
ЖягІял бучІул далайра.

\* \* \*

Пачалихъ саб хъалибарг,  
Пачни кІел – хІура-нура,

Нушаб давла кІел секІал –  
Арадешра шаддешра.

\* \* \*

Лусейчиб пурс къяцаван,  
Хъалчир хамли тІашси хІу,  
Гумайлабад хІерличил  
Ши умціул гІяюркъя ну.

\* \* \*

Балас цадехІ гІямрули  
ХІечи диги хІейхънира,  
КІидехІ гІямру Аллагъли  
Наб къадархІедирнира.

\* \* \*

МицIир бацIсиван саби  
ХIу агархIели хъали,  
ДецIли бицIахъухIели  
УркIиличибси хIяли.

\* \* \*

Заклизир къургъала цIум,  
Анхълизир кIапIрала заб,  
ГIебшни хъуми хъилизир,  
Шилизиб – мукърала зай.

\* \* \*

Губдалан къуймургъуна,  
ДуцIрумла цIуэргъуна,  
Чарх дигайли алкалра,  
Шанг агар анкъигъуна.

\* \* \*

БукIуна бамсриихъул  
Къаяула лацъуна,  
ХIи, ниъ гъудурли рурхIул  
ДяхI шаласи бацъуна.

\* \* \*

Пикриухъалли, дигай  
Сар анхъличи мешути,

Дигай дихъиб уркIбазир  
Сар вавни пишдирхъули.

\* \* \*

Дигайлис игъбарагар –  
Мешуси цIуръаличи,  
Милигли хIерикIуси  
Мякълабси урунжличи.

\* \* \*

Гъар бархIи дунъя саби  
Давла – гъарзабикIули,  
ХIечил къаршивиркули,  
Дигай дурхъадилзули.

\* \* \*

Исбагъидеш чехъерлис  
Сар бикIар багалати,  
Хаслира мискинхIели,  
ХIянчи, дагъри камхIели.

\* \* \*

ЧигIя дягI агархIели,  
Вирхаи, гъакIхIебикIар,  
Дигай гъардизурхIели  
Чучила цIумхIебикIар.



Дагъиста халкъла поэт  
Аминат ГІЯБДУЛМАНАПОВА

### ГІЯКЪЛУ

Миллионти дусмазиб  
Дунъя къайгъназибсири,  
ХІезив адам акІахъес,  
Дагъриличи вегІварес.

Бахъбаиб адамтира,  
Дургъби адилкъантира,  
ХІу палакатбарес  
Къайгънази бикибтира.

Цябдешлизибадра хІу  
Биубри дурабухъес,  
Дунъялисра кІантІ-кІантІли  
Бузади давла бучес.

Гъанна чизи рулгишав  
Чизи бусраврикІишав?  
ХІу мицирли калахъес  
Се гІямал баришара?

### ХЪУЛАНИ

Дигахъира иш дунъя  
Ца улка бетаахъес,  
Дунъяличир улкнала  
Дазурби агардарес.  
Дунъяла адамтала  
Гъими-къяс агардарес,  
Жалти ва кахти дургъби  
Даимлис кІундацІахъес.

Дунъяла гъарил шайчи  
Дигайла заб кайкахъес,  
Дигайлацун мисалти  
Адамтази ирзахъес.  
ДегІлара гІяхІти балгни  
Дигайлис харждарахъес,  
Дигайлацун хІукмурти  
Дунъяличир калахъес.

### ПАРГЪАТАГАРДЕШ

Дила кахти пикруми  
АхІен аркъниличила,  
Мурт-биалра иш дунъя  
Бархъкабалтниличила.

Шурла шали аурли  
БутІа арас лусенна.

Юргъайур гІянжи-къарла  
КІапІкарирниличила,  
Палда аурли анхълар  
Реткайхъниличила.

Дила паргъатагардеш  
Саби ванзаличила,  
Бухъули ва берхъили  
Калахъес дигулира.

Балас, шуркарулхъасра  
КъатІличи ну ванзала,

Гъарил инсанна игъбар  
Лушули, ласбикІули,  
Балагъуни агарли  
Дила ванза бузули.



## ДАГЪИСТАН

Багъбиубси урхъули  
Къйгуси гамиличи  
Итхелла хелла къисмат  
Мешубиркур, Дагъистан.

Хъямбикунти чум хечи  
Урхла вайти хъямчиби,  
Чумбехи бакибти гъаргъли  
Дурала гъармукаби?

Цяб-цудара пардавити  
Чумли чегъура хечи,  
Чум журала шинжирти  
Даршиба мискинтачи?

Къасбариба чум-чумли  
Ху курлизиб хербарес?  
Чилалра цакъ хебаиб  
Хелла яхи-хиял хярхидарес.

Геналиуб бубкуси  
Вавагъуна итхели,  
Лебилра дунъяличиб  
Зайбиклури ишхели.

Алки шалабарилри  
Игъбарла чирагълира,  
Чумаси къакъбяхъра леб  
Ахерси Россияра.

Дила дурхъал Дагъистан,  
Леб хелла халал багъа  
Рурсбала пагъмуртазиб,  
Уршбала гъунартазиб.

Муртрил уршби алхунти  
Нешанала яхлизиб,  
Жагъхелил хянбиубти  
Аднала сабурлизиб.

Гярбуксила устнала,  
Къалтинтала давлала  
Мягдунтала анхъличи  
Шурбухъири ишхели.

Тяп шанданна баруван  
Яхи чумали калунси,  
Тур хъябличибхелира  
Мутигидеш хедарисби.

Хезир дерхъибти хъими  
Лер багъадур уршбала,  
Хезир лер мурхъти хълчни  
Кагибти гяхигъубзнала.

Хелла шаласи къисмат –  
Урки цала гъубзназиб.  
Ху биалли – байрахъри  
Идала къисматлизиб.

## ХЪЯРБУКЛА БУХЪНАБИ

Дугла къяцнани дуцли  
Ихъути ахъ лусенти,  
Айгъиртачир мурдали  
Муртрил хъярхъли ихъанти.  
Сен хумартира гъанна  
Хякализидергурли?  
Сен паргъаттира гъанна  
Гумайлизи кайили?  
Галгуби геринути  
Бурямтас гъадурцули,  
Гъярцдариллив михъирти  
Дуцдухъунти дусмани?  
Дубура кlapбаресцад  
Дяхли бирул хъуцруми

Назикдалилив гъанна  
Гъанарти бурямта?  
Херли гъалбец дянгиул  
Шавладиублив хулби,  
Зайли кларза тлашиул  
Гянцкадиублив дугъби?  
Къияйзибхели Ватан  
Хъаряхъибси хушачи,  
Хъаряхъилраяв гъанна,  
Дудешуни, гяйсначи?  
Хушачи херъибхели, –  
Урки пахрули бирцини!  
Се гяхиси, дудешуни,  
Нура хушала риъни.

## БАХТУМ АЗАЙЛА НЯКЪБИ

Азирцад дякъ дургулра  
Нуни хІела някъбазир,  
Урла гІямруличила  
Буру илдани набзи.

Ургубала гулвавнас  
Дедиб чули жагадеш,  
Арши шахли хІейгахъес  
Бедиб лебил ванадеш.

Мургъи ранг лугнас бедиб  
БехІ тІулбала назикдеш,  
Карилаб берциб къацІлис  
Чула ранг дариб пешкеш.

ЧумбехІ цІуръа рурсбала  
Чурми чуни демхуртив?  
Ний хІедерхъибти уршбас  
Чумлис къацІ гъабуцибтив?

Чумра ахІерти дурхІни  
Чуни хІярибихъибтив,  
БегІти хІябразибтала  
Чум ятим ахъбуцибтив?

Ванзала азир изайс  
Чуйна дармандиубтив,  
Адамтас гІяхІдеш барес  
Даршал дус хІедамсурти.

Бургар марли дунъяра  
Журугбарибси чуни,  
Ласбирули малхІямли  
Сабалтули тІулбани.

Пурбанбара, рухъна неш,  
Байрикахъес ну чучи,  
Сахаватси ванадеш  
ЛамкабикІахъес набчи.

## ДУДЕШЛА УЗИ

Дургъбазивад чулахъиубли чарухъунси  
дудешла узи Мимма ХІяжила Рабадайс

Гумайла къаркъубачи  
Вергурли хІякализиди,  
Гурра къухІкайзурлирив,  
Дила дудешла узи.

ХІела пашмандеш нуни  
Иргъулра хІерванъили,  
ДигІяндарес набзирад  
Гъай цархІилти дургулри.

ХІярхІяли нана хІули  
БацІахъибхІели хІела,  
Цумалра хІевхъун или  
Аргъибсири хабарла.

Душма ханжай дергълизив  
ДекІли вяхъибхІелира,

ХІял дебшван бихІибси хІу  
КІантІимайкІуд гъаннара.

ХІила хІеркІлизивадли  
МицІирли дуравхъунси,  
Шишимъулала хІеркІли,  
Марли, гъанна архулрив?

АвцІали дус умцІули  
Дергъла гъунби умцІурси,  
ГІязиз узбала хІябри  
Гъаннара хІедаргибси.

Гур къайцІмайкІуд – хІебекІиб  
Узби чархІебухъунти,  
БекІа агарти сабну  
ВатІан гъанни алхунти.

ГЪАЛМАГЪ АЛХУНСИЛА  
ЦІУМ-ЦІУМЪАЛА

«Урхъу дублар чигІяван  
Чиприти руэн, къакъба» –  
Ири хІу урцухели  
Дуклумачив чакала.  
Ташли бамсри ихъули,  
Гугли гъанкІра ихъули,  
Руира хІу лявкъуси  
Гъуни хІулба лукІули.  
Дерьуб къарла мякъиван  
ГІянжи-къарла ухъалар  
ДацІ мургъила биркІанти  
Дехъубли сари айчи.  
Ил аргъибла гумиван  
Рарра децІли арсавар.  
«Чемъур закла шишаван  
ХІулби шявмайрахъида!»  
Ири набзи, къакъличи  
АйцІухели гъуноцІла.  
ХІердарра децІла нургъби  
ХІедацІахъес рулгули.  
ХІу чарулхъути бурхІни

БехІ тІулбачил дуйГули,  
Аргъайчи хІела кІелра  
ДуцІрумли дарайлаван.  
ХъанцІ къаркъала гъангузли  
Ранг двахъи сар айчи  
Аргъила ну мицІирли  
РерцІира децІла цІали.  
ГІярчимагван дуцили  
КІелра чури хІяршдарри:  
«ДихІен, вари, кІилинра  
Думхехе анхълар ГІурра».  
ДихІира дуцІар бурхІни  
ДяхІцІи лебихІи дуцІли,  
УркІила анцІдукъала  
Чузи дархли думхули.  
АрцІили хъуми къяйда  
ХІела цІудар архІяйла  
Хъалтали дерхъиб айчи  
ДухІнар цІудара хІябла.

Аргъила – бархІехъ-савли  
ХІяршдариб цІубил шахли.

НЕСЛИС

УрхІла дурхІнала биса  
Аргъадлири дурарад,  
ДуцІрулхъади хІу дура,  
Неш, баршахъес ургала.

ЦІуръаби хІяршбирули  
Хъутри лугІяндиубси,  
ДурхІни дуклабурцули  
ХІевала хъар бурдибси.

Шанти даршубирули  
Лебдеш харжкабируси,

УрхІла талихІ калахъес  
Дугурбазир рулгуси.

ДяхІили дурар улкни  
Чилра ургахІеркули,  
Рисулра, неш, иргъули  
ЧяхІдухъи дурхІнала хІи.

Гъаннаван хІу хІяжатси  
Замана хІебакІибгу,  
Ва неш, ца дакІурухъи  
Иш дунъя берцахъагу.

НЕС, ХІУНИ АРРИКИРА

Неш, хІуни някъ буцили,  
Чинарил аррикира,  
Арки хІебагъахъурли  
Ну дурхІядешлизира.

ХІязти дархъдатахъурли,  
Геларад рашахъира,  
Гъалакли дяркъяхъурли  
ГІямрула лагра катра.

Хебурили рахъ жявли  
Гямрулизир хІу аркъни,  
Къисматла зугъаси мах  
Хъяшалис декІли бирни.  
Аррикира, лугули  
Дила бачІнази къуват,  
Се сабил хІебурили  
Гямрула къяркъси къисмат.  
Зубрала къукъу-рямкъяр  
Гъандурцахъес ряркъурли,

Гямрула хъябхъя ва заб  
Се сарил хІергъахъили.  
Ханжал кІибяхІян биъни  
Набзи чебаахъили,  
КІибяхІян гъалмагъ вирни  
Гъаналра хІебушили,  
Някъ буцили рикули,  
ХІера, чина рукирал,  
Гямрула азир мисал  
Арзахъес тІашратуррал!

### ДУДЕШЛА ГІЯХІЯЛ

Лявкъули сай гІуррара  
ГІяхІял дила дудешла,  
Гъалавашес гъалавван  
ХІейалра дудеш дила.  
Дурхъали сай ил гІяхІял  
Нушаб убла верхІелван.  
ХІулкІули саб дурхІнира  
Дудеш чарухъунсиван.  
Бухънабаили саби  
Сайван сунна айгъирра,  
Нушаб хиви дихути  
Дурдили сар хунжира.  
Ухъна гІяхІял гІуррара  
Дуру урла хабурти,

Гъандуршули гъар даим  
Дудешлара гъунарти.  
Вашен гІурра зумали,  
ГІяхІял дила дудешла,  
Заманалис биалра  
Дебшахъес анцІкъи нешла.  
ХІу гъар вашуси бархІи  
Ванали саб анкъира,  
ГІяхІли ша башул бархІи  
Биршур акибси аргъра.  
Хабар бурен гІяхІлацун,  
Вайтира лер диалра,  
Нешла уркІилаб хІянбас  
Агарану гІур мерра.

### ДИГАХЪИС ДУБУРЛА ШИН

Дубургала уркІбазир  
Дармайс дурадикибти,  
Къадурбазир къугъали  
Далайван датдихъибти.

Алмас юсрула мачна  
Къуймурла ахъси хъябван,  
Дубургала къадурби  
Къугъали ласдарибти.

Арцла рахажуниван  
Дашукадли делсунти,  
Исбагыла чурмиван  
Дахъ царугли демхурти.

Дарайли цІикуриван  
ЧяхІ-чяхІиби диршанти,  
Ахъли далайдикІули  
АрхІяли ардашанти.

Лусенна ахъдешличир  
Дулхъули тІяхІдикІути,  
Варачанна барглизир  
Цуб мукъриван думхІянти

Дугели ну русахъес  
Нешла лайла бучІанти,  
Чархла азир биркІайзи  
Гъав хъурабирахъанти.

ХъанцІ урхъула майдайчир  
Ругерти ахъдурцанти,  
Урхъула диркъаличи  
Вавнала ранг диханти. –

Дигахъис дубурла шин,  
Шишимала агарти.  
Шила исбагъибани  
ХъайгІи дармайс диханти.

#### ХЪУБЗАРЛИС

Ванзалара хІелара  
БиркІанти цадарибси,  
Ванзалайчил уркІила  
Тимхъ цаван балгахъунси.  
Ургуба итул хъибхъя  
Къаркъайчи чекайсуси,  
ДуцІрум ванза бемжалли,  
УркІи цІали игуси,

Савлила ургубала  
Шах гъигъли бицІахъуси,

Гѐбшнила цІяб дирихъми  
ХІеръили дубшахъуси.  
Ургубализив ахІи  
Бамсри ахъес хІейруси,  
Къарличил гъайикІуси,  
Вавначил дукаркІуси.

ХІела излумас дарман  
Някъ белкъари хІянчи саб,  
Дерхъиб хъум верхІелван,  
Хъубзар, хІела жан дерхъаб.

#### ДИГАХЪИС НАБ АДАМТИ

Дигахъес наб хІеррикІес  
Шагъарла адамтачи,  
Гъарил савли хІянчила  
ХІулкІули башантачи.

БархІехъ хІянчилабадли  
Шадли чарбулхъантачи,  
Адамлис гІяхІдеш барес  
Мурталра гъалактачи.

Дигахъис наб хІеррикІес  
Чула шалал дяхІличи,

Чумлара къаршидиркур  
Мешути дудешлайчи.

Ну хІералуталара  
ЛехІирхъус гІякълумачи,  
Чула жан дат, хІябилра  
Мешутигу нешлайчи.

Дигахъис наб адамти,  
Балути, хІебалути, –  
БегІлара гІяхІси талихІ  
Сабну гІяхІти адамти.

#### ДАРСДИУБ ЛЕРИЛ СЕКІАЛ

Тахъси ну, бара жагъси,  
КъячІниван къяшми гъярцІси,  
Дарили чумал чури  
КъабулдантагІир дуцІси,

Селра чехІебиули  
Дила гъунчир рашуси,  
БерхІи гІелабикайчи  
Хъярхъли хъули рашуси,

Ца камси заманали  
Дарсдариб гъарил секІал,  
Ца шан уршила хІерли  
Рарира марли абдал.

Чуйна шалгІеррухъунрав,  
ХІергъусила дарили,  
Чуйнара къасбарира  
ГІур хІерхІейрисра или.

Ил хІерли гъачам набчи  
БерхІиливан нур чертІи,  
ГъачамхІели забливан  
Балагъуни дяхІии.

ГІур цІакъ агу гъандуцес,  
УрухкІулирагу хІерэс,  
Ил хІерлигІир дилара  
ХІулби дехІдихъиб умцІес.

Тахълира, ца хІерлицун  
Сецад асар бирусив?  
Ребшилра хІебалулра  
ЧинаряхІ рубшусирал?

Муэртазибра нуни  
Ил хІерцун чебиулра,  
Буи лебил паргъатдеш  
Ил хІерли рарсрарилра.

ГІур ил хІерлигІир дигІяй  
Марли нура умцІулра,  
ХІерлис хІерцунри жаваб,  
ГІур лерил хъумкартурра.

Балас, гъачам ца бархІехъ  
Гъайиб набзи уршили,  
Аждагъали гІинизван  
Дила гъуни буцили.

ГІур мутрил гъайли гъайра  
Даргира цали цала,  
Агъ, тамаша, илкъяйда  
Биубара урхІлара.

Дубурлантала гІядат  
Буи къаршидикира,  
ШаладиркухІейс хъайгІи  
Чардулхъесцун дирира.

АкІубла хІедакъибти  
Дигайла гъай аргъира,  
УрхІли дакъесгу или,  
Урехили руржира.

ГІур, нешлицун думхути  
Уршили чурми думхи,  
Гулмендилицун дурцул  
Иганайли хъяб дурци.

ЦІакъти някъба пяхІулван  
Зубрачи ахърурцира,  
Агъ, цІахдеш, гІур хІебалас,  
Уммайта кепрарира.

ЦІакъ агу ну ратрухъес  
РебкІилрав, мицІирлирав?  
Даткавхъи сар биркІанти,  
СихІрулизи рикилрав?

Чераргъира, нуни ну  
ХІериулрагу рагъес,  
Ит бархІири аргъибси  
Ну акІнила дурхъадеш.

ГІядатли детауркъи  
Чумра итгъуна бархІи,  
Амма аргъайзиб саби  
ЧІянкІли ца итцун бархІи.

#### ГІЯДАТУНИ

ДитахІелли къисматли  
Нуша декІардарибти,,  
ДиахІелли гІядатли  
Гъайахъес хІедалтути,

Сен къисматли уркІила  
ХІялани хІярхІейрутив?  
ХІела жагати чарх-бекІ  
Набзи хъумхІертахъутив?

Сен хІулбала хІеранас  
ГІядатла цІакъ агарсив?  
Даим наб гъанарахъес  
ХІела тІама балтусив?

ДиахІелли къисматли  
УрхІ детаахъуртира,  
УрхІван ахІи, ванали  
ХІердикІес далтутирав?

Гядатли ил хїела у  
Бурахьес хїералтули,  
Сен уркіи гьар даим хїу  
Бикїахьес балтусира?

Сен паргьатдеш агарти  
Дугурби сагьхїейрутив?  
Уркіиличирти хїянби  
Селис царугьхїейрутив.

#### УКТЕМДЕШ

Талихїла някъ буилри  
Муртрил наб гьабуцибси,  
Хамли шалгїеррухьунра  
Набчи ну рахь рирхуси.  
Гьари, чинаба ил някъ,  
Наб гьанбик бетаурси,  
Итхїейчирад умцїули  
Гьанна баргес кьиянси.  
Ну релхїехьунси тїама  
Буилири игьбарла,  
Халалра хїебарили  
Кьяркьси жаваб лугира.  
Гьари, чинаба тїама  
Савли чериргьахьуси,

Аргьайзиб хїебелгьули,  
Чїярличи шурбухьунси.  
Итди мурхьти дугурби,  
Паргьатдешла дуилри,  
Чуйна шалгїердатурра  
Пикри бяхїчихїеили.  
Гьари дугила шараб,  
Хуприкес гьачамалра,  
Бержили ца пигьала  
Аргьайзирад рулхьасра.  
Агь, игьбар, гьачамхїели –  
Хїу аждагьа буилри,  
Гьачам халхїебарнилис  
Даимлис чеббирцїулри.

#### ГЪИМРУКІНИ

Дибгїанти хатїабази  
Мурхьли халтїардулхьули,  
Чис гьанбирки итхїели  
Цали ца детихьахьни.

Хьачлизи алкун цїаван  
Сабур агарси нура,  
Кабухьунси бурямван  
Уркіи гьалакси хїура.

Хїебагьурли цали ца  
Мяхїкамдарес итхїели,  
Хїедиубли цалис ца  
Хїеркадиэс мукїурли,

Урхїла някъба гїяраван  
Уцили виадлира,  
Лезмикїун хїезиб саби,  
Ца гьайалра викїенгу.  
Дила даршдехї дардани  
Дурадахї дубшахьидну.

Хїера, гьари се баррал  
Нушаб гьанра агарли,  
Далайра чугурраван  
Цадалгунти, декїарли.

Хїедиубли итхїели  
Цала ца уркіи аргьес,  
Гьанна пикрибара ца  
Сецад кьияннил даргес.

Ца ванзаличиркьїира,  
Хїера, сен гьарахьлирал,  
Итцад цалис ца гьамти,  
Хїера сегьунти урхїрал!

\* \* \*

Цархїилла арилизиб  
Биалра хїела уркіи,  
Хїулбикїун хїезир сари,  
Ца хїералра викїенгу.  
Чархла азир излумас  
Хїер дармабирулину.

## ЧЕВВЕРХИ

Чевверхи хЕед дехІсур гес  
Дигайра агарану.  
Пархдухъи мутрил хІязлис  
Палда детауртину.  
Бишунси цІаван гІурра  
Алкес хЕедирулину.

Юлдаш, тІалабмадирид  
ХЕед карцІайлис карцІайра,  
Ламвандухъи цархІиллис  
ПяхІли деткахъибтину.  
ЦІуб шахлизир кІинякъван  
ХІяляркъни хЕебалира.

## ХІЯЛАЛДЕШ

Вигуйла уркІила ги  
Набцун бучІул биалри,  
Мардешла майдунгачир  
Нура къардхІерулхъаси.

Вигуйла карцІайла ги  
Набцун ухул биалри,  
Бархъдешла берхІилизи  
Нуни дамгъни хІейраси.

Вигуйлизиб мардешла  
Ца кІантІ нуни баргасри,  
Бархъдешла лугІи агар  
МягІдан нуни ибхъаси.

\* \* \*

ХІурмат бирира нуни  
ГІядатуни багъандан,  
ГІядат дигай ахІенгу  
АхІерси хЕебалулрив?





# Нушачир гЯхИлагли

Дагъиста халкъла поэт  
Залму БАТИРОВА



## СЕЛИЧИ ВИРХУСИВ?

Чизи уркИи бурусив?  
Някъ буцеси чи левсив?  
Чи сая дила душман?  
Чи сая дила гьалмагъ?

Гьу, гьалавяхИ вашусив?  
ГьелавяхИ чарирусив?  
Яра, вьшалра хьевхьи,  
ЛевихИив тIашкалзусив?

ВасвасбикIули саби  
Гьарил секIайчи уркИи,  
Гьудурдиубли сари  
Гьямрулизир гьар секIал.

ХIера, хIялалсилизи  
Халарибси юлдашра  
Хиянатуриули сай,  
Къурушлис вегI вицили.

Гьар гьайлизиб къяна саб,  
Баркъуди – илбисла саб.  
ДяхИличир – адамдешла  
ХIерзи детахьили сар.

Чизибад мисал кайсув?  
Чи дигахъес вирусив?  
ВярхIя увхIелхъан или  
Чичи вирхес вирусив?

Нушала ишбархИла  
Игит чи сай викIусив?  
УркИи бархъти адамти  
Сен-сен баргес вирусив?

Къияйс къала сай или  
Чичи пахрубирусив?  
Адамдеш хIедиалли,  
Чис адам сай викIусив?

«Гьунби гьаргли сар», – бикIар –  
Гьаргси дякъра агара.  
«Дунъя халал саб», – бикIар –  
Къяш кацIес мер агара...

Нуша кадушесцун саб  
Заманара бузуси.  
ТубикIуси тяхIяр саб  
Ил нушала дяхИлизи.

## ХІУРА НУРА

Ваши се-биалра  
ПикрибирехІе,  
КІелра бутІаличи  
Дунъя буртІехІе.

ХІурхьи ва цІуб дяхІи  
НабцундирехІе,  
Авлахъуни, сагни  
ХІедцундирехІе.

ХІед – варачантира  
ЧяхІ-чяхІибира,  
Наб – ца шинна чябхъра  
ЧяхІла тІамара.

ХІед диаб цІамира  
Цала шалара.  
Наб – шах-мигъла писра  
ДяхІила лямцІра.

Ца арцан леб бикІар  
Къуйрукъ мургъила.  
ВеГІ левихІиб ахІен,  
Саби цархІиллаб.

Ил баргес или ца  
Ита ватихъиб.  
ИлиГІив умцІули,  
ВацІили, кайкиб.

Гъачам къукъу-лямцІ сари,  
Гъачам бугІардеш саби.  
ХІура аргъван камалзад,  
Вайти дяхІ кадуцили.

Черяркъян къукъу-лямцІра  
ГІяхІси бархІира лябкъян.  
Адамти балбикалли,  
Вайси биэс хІебирар.

ХІу кайи зубрала  
ХъанцІ чятирлиу.  
Наб биур хІякала  
Ца дукалара.

ХІед мурхъти урхънала  
Каса давлуми.  
Наб урхънала гъава?  
Баибси саби

ХІед далтулра нуни  
Паргъатдеш, хІели.  
Набчи чекайсулра  
АнцІкъи-шишимти...

ХІера таманбиуб  
Дунъя бутІили.  
Ну бекІлил бутІала  
РархІерарили.

\* \* \*

Чинаба ил игъбар –  
Леру къел-хІерзи?  
Гъарил «леб» бикІуси  
Биркуру хІези?

Идбагра вирхІейри  
ВеГІла мерличив.  
ТалихІ сен-сен бургув  
Ил агарихІиб?

## ПИШЯХЪНИ

ХІу вирхуси гъалмагъли  
ХІед вершадеш дарилив? –  
Ил хІярхІяли вяхъяхъес  
Тудяхъя ва пишяхъи.

ХІечил ралхІериркули  
Рархкъя аррукъяллира,  
Пишяхъи, хъяб биалли,  
ДукІра камхІебирарну.

Хякимта халкъла лебдеш  
Билгулив дигянали? –  
Даклули хейрулрину,  
Дукаркен дигянали.

Буутира зулмули  
Хебалтули биалли,

Висесличиб гьамадли  
Сабину, ца пишяхъи.

Се бетяхъилив хела,  
Умцусигъунаригу? –  
Ца селра хебаргадра,  
Баргисиван пишяхъи.

#### ДИЛА ХЪУЛ

Пергер Ялтализи  
Я Парижлизи  
Аркъули ахенра  
Бамри ахъес ну.

Гьягьяла гьуникад  
Пухибиклахъули,  
Дила дубургази  
Арцурлира ну.

Илаб набчи шанти  
Лябкъян ца-цали.  
Кьямцаливан бурцу  
Някъра цацали.

Леб бяргибси гиниз  
Буцархелира,  
Кайхъес дигула наб  
Илав вавнази.

Дугели бац лябкъян  
Лямцарбиклули,

Херкайкус иличи  
Гелабикайчи.

Парижла дурибти  
Шарабличibra  
Ширимли супбирис  
Дубурла гьава.

Парижлизир дургар  
Базла гянулби,  
Гянайчиб гелабу  
Мукъарла гули?

Убушили хьалчи  
Мурала бекла,  
Усулра варъаван  
Муриси гьанкли.

Чебиулра нуни  
Жагаси муэр:  
Парижлизиврав ну,  
Ялтализиврав?

#### АДАМЛА ВАЙДЕШ

Бахъ жагасигу аргъ  
Шаладиркуси.  
Тяхяр саб сагаси  
Дунья аклубси.

Ху ил анцбукъличи  
Хериклухели,  
Нургъбира гьардикур,  
Гьавра ахъбирар.

Буцили биалра  
Янили дунья,  
Хеблис бузахъес ил  
Абзурли луга.

Сабиур дуцрумлис  
Кадикес сягят –  
Балга талхьягъуна  
Мар мургъила тах.

Занзира дираргу  
Вавнала ургар.  
Хебулѣа илдани  
Чула ургала.

ТабигІят мисал саб  
Цабалгундешлис,  
Агара илизир  
Гъаргъдеш, душмандеш.

ТамяхІкардешцун сай  
ЦахІнавли адам.  
Дунѣа булѣули сай  
Буцес гъаргъдешли.

Бархъбатес дигулив  
Тахла вегІлис тах,

УрхІли буцесила  
Урехилизив?

Гъазализиб саби  
Тах бикахъесра.  
Улхра улхули саб  
Ил гъазализиб.

Мургалра бацІли саб  
Адамдешла тах,  
АцІес вализурси  
УвахІуршули.


Гелакайкили сай  
Адам хІилизи.  
Рахли гІяндхІейкалли  
ХІунтІен хІилизив?

*Шурд. ХІябиб КЪУРБАНОВ*



# Поэзия

Тавсулган СЯГИДОВ



**ГІЯЯ-КЪАКЪАРА, ГАМЪАЛА КІУРКІУРРА,  
КЪАЗАКЪЛА ЧЯГЪИРРА**

*(Гъархебизур масхара)*

*Гъарбарес вираллира  
БекІ буцили чичІала,  
Бархъли башахъес хлейрар  
БургІялра къакъла чІала.*

*Писки МяхІ*

Агъ, дурхъали кабизур  
Рарскъа гамъала кІуркІур!  
ХІушаб хабар бурисну,  
Барая камси сабур.

Дубурлантас дурхъаси  
Мер саби ГІяя-къакъа,  
Деникинна цІубаби  
БакІахъиб илаб къакъа.

ХІунтІена партизанта  
Гъабзадеш чедаахъиб,  
Тупи лайдакІахъили,  
Къазакъуни бешахъиб.

Хъяшни булан дергълизиб  
Лебри, бикІар, бургъули.

I.

Къазакъла, бикахъили,  
Цали киб урчи хъули.

Ханжайчил дуравхъунси  
Тупангличил чарухъун.  
Лебилра чархебухъун –  
Алхунтира уббухъун.

Игитунала уми  
Халкъли уркІбази делкІун.  
ХІямидлис, ГІялибеглис  
Чумилра далай делчІун.

УрчІемъибил майличиб  
Гъаннара ила башар.  
Гъубзни гъанбикахъили,  
ГІур шимази бирар чар.

2.

Дашира, дурхИни, жагІял  
Нуша ила аркъехІе,  
ГІяя-къакъала къярдлаб  
ГІяхІси байрам бирехІе.

ГІяяла базарличиб  
Щерхъси кигъа асира.  
Держести ва держести,  
Лерил хІядурдарира.

КІел машийчир шел адам  
АрхІяли датдихъира.  
АрхІя гъарбилзниличи  
ХІекъли умутбихъира.

Нуша ила даибхІейс  
Митинг таманбирулри,  
Партизантала гІинзир  
Далуйти зайдикІулри.

Мер-мерличир цІамири,  
Байрамлис адикъурти,  
Чишликуна буцІулри  
Ца-алав тІашбизурти.

Нуни кигъа белгъунра!  
– ИкІар нушази НурмяхІ. –  
Шангра саби руржули,  
ХІеръая цІаличибяхІ.

Гулилизи бергур диъ  
ЦІалиу убатурра.

Рамазай лебхули сай  
Чишликунала хала:  
«МухІлубази гес хІейрус,  
Кадирхъис хІушаб гъала!»

МулебкІанти, микІхІенти,  
ХІурхъанти ва мухІенти...  
Бураягу, ишбархІи  
Марли ишаб агарти!

Савлира чІишлик барес  
Ца урдурра батурра.

ХІялисирисан жявлил  
Балкъаурли сабину,  
ГІинзирти шишни хая,  
МиъдяргІили дургарну!

ХІунтІена башлихъла вегІ,  
Митругъуна ханжайчил,  
Шушкаличил вайлиуб,  
Хъаталаб мажарличил,

КъяртІделкІун супелтачил,  
БирцІлумар сукъбанчевси,  
Деган БяхІязи сайгу,  
Къзакъуни бячІунси.

Илала михъирличиб  
Дявила орден саби,  
ГІяя-къакъа багъандан  
Илис бедибси саби.

Нушачи лявкъулигу!  
Гъари, чархара бирцІис,  
Биркусив партизайчил,  
КъутІбатурли, бержес чис?!  
«Гъарахъларад ляркъути  
Чаргас урчала мурдни,  
Агарав гІяхІла хабар...» –  
БучІули саби дурхІни.

3.

«ГІялибег Багъатирлис!» –  
Ахъбурцули сай цали.  
«ХІямид тІахІятлис!» или,  
Бужули сай цархІилли.

«Муреган Айдимирлис!» –  
Бержиб илаб мукеки.  
Бержалра, кепируси  
Аги илав аммаки.

– Иш нушала поварла  
Бужулла арадешлис! –  
Ахъбуцили, нергъла вакъ  
Бужули сай Бятлили.

Учитель Сайгидулла  
Ужули сай чягъирли:  
«Хъулив чили хІелтара  
Ужахъес гІяркъили?»

УбкІусилира, узби,  
Ишди чягъир дужагу!  
Айдимир, бархъли бура,  
Ишди чинар даргири?»

Някълизиб чІишликличил  
Ташли сай Каймаразов,  
ХІунтІена партизантас  
Далай булан хІебучІав!

Дудешличил вакІили,  
Чаракра къаршиикиб:  
«Дудешла дудеш Мусас  
Цубабас дяхъес бикиб!»

«Галмачил ва къялкъначил  
МикІхІила хъунри лебри.  
Бяхъибти къазакъуни  
Илда таманбирулри»,

Чардухъи ляркъухІели,  
ГІяжаибси бетаур:  
Машина хъячІаили,  
МяхІли гІяра «арцахъур».

Вегаили, ил нуни  
Къалабали белгъунра,  
«ГІяхІси хинкІ барес вирар!» –  
Багажникла игъубра.

Ит кигъала урдурра  
Герайбси гІяра,  
Савли хурег барахъес  
НурмахІлизи дедира.

Дила хала дудешли  
Илгъуна хабар буриб», –  
БицІиб умеГІ Чаракли  
Бержили таманбариб.

Къазакъунала пайтун  
Бири дила шилизиб,  
Илала калун хІула  
КІеб дила азбарлизиб, –

Пигъала ахъбурцули,  
Буриб цархІил лябхъукай,  
Чягъир имцІадиубли,  
Дирхахъули бара гъай.

Цубабала халал дам  
Бикахъилри хажакай,  
ГІур чумилра мекъличиб  
Калун ил бикІули зай!

Ванашикан уилри  
Хъяганаг бикІул хъяша,  
Пулемет хъусбяхъили,  
Чарухъунсири ил ша.

Рашидли иличила  
Абзур поэма белкІун,  
Дарган Гаврош уилри  
Ил багъадур уршикІун.

4.

ХІери гІергъи НурмахІли  
ХинкІличи жидарира.  
Адушибти делхъайчи  
Кагъуртира дугІира.

– Селичира диркъути? –  
ХІейкІару Сайгидулла.  
– Цудара кІуркІур лебку  
Дила унра гамъала!

Партия таманбиуб,  
Хъа вегІ удихІеркуру!  
Гъарбизесара уюн:  
Нушаб кІуркІур биркуру?

Гьарзали ганзикѴли,  
Угьнукьличи ветаиб,  
Хямкдарили, угьнукьла  
Унза булан гьаргдариб.

Кьяшмаубад, пархбухьи,  
Ца дагьа дурабикиб.  
Хьямикунгу, НурмяхІлис  
Ил буцес бикхІебикиб.

Кьузрира кІуркІуртира  
Угьнукьлизир дуилри.  
УркІдухьунти арцанти  
Ахьли вьв-чІярдикѴлри.

Накьра-хана аргьили,  
Гамьара дурарухьун.  
Галара хапбарили,  
Угьнукьла рухІнарухьун.

Дагра ца кІуркІур бигИи,  
ИшбархІира вакІилрив?!  
Гурда бургар бикІигу,  
ГІярГИи дилГІян уилрив?! –

Кьегали хьурсерикѴли,  
Гамьа сар вьврикѴли:  
«Гьанбикили хІебиэс,  
Гамьа сари ребкІили!

Дуги беркун кІуркІурра  
Канилабад дурайис!

Машиналичив пакьбир  
Хирургличи укира.  
Се биубли кибсил ил  
Тухтурлизи бурира.

«Хьябшдиубти дахьал лер.  
КІел сар дурадикибти.  
КІел жумягІли сагьирар.  
Датаб мехІур уюнти!»

КІуркІур гьанни вебкІалри,  
ДукаркІи лебил шанти.

Кьягала кьялубачир  
КІелра хІули дурайис!»

Кани буцили, нуша  
Гьаргалар дукаркІулра.  
Театрличи кьяйда  
Лерилра хІердикѴлра.

– ХІуша дукаркІахьули,  
Гамьани таманиру!  
Тамай духуси ахІен,  
Илис танбихІ хІебиру!

Гьаргалавад тІяхІухьи,  
МяхІ иличи ветаиб.  
Гала бархьбатахьурли,  
Ца шайчиряхІ ратаиб.

Шали буцили «хьулки»  
Угьнукьлавад дуравхьун.  
Ил чеибмад гамьала  
Гьар секІал черкадухьун.

«Гурда саб» бикІухІели,  
Рижгубли черухьунра.  
КІуркІур бигІес льявкьяну  
БегІлара гьамси унра?..

– Цала мерлар, нуни кІел  
Лугира! Диха адри...  
Хьулки льявхІякьи, бикІи,  
Гурдала пишни сари...

5.  
Агь, дурхьали кадизур,  
Нушаб илди масхурти.

Гурра чуйна дякьунрал  
НурмяхІличи хинкІличи,  
Хьарбиули дирехІе:  
«ДуртІутира селичи?»

Секьяйдали илхІели  
Виркурал ил жунжрази:  
Ханжал касес ветулхьан  
Ил бихІуси тавхайзи.



Гъайла къантIа, ит ярга  
Гъарала хинкI хIебикиб.  
Ишаб хIушази бурес  
Гъурра анцIбукъ гъанбикиб.

Хъарахъуни чедаэс  
Къызларлизи дякъунти,  
Чумал журналист гъуйчир  
Сарригу тIашдизурти.

Бялихъчибани гибси  
ХIентIена бялихъ лебри.  
Чишлик барили, беркес  
Нушала иштIа лебри.

БиштIаси шила дублаб  
Урдубяхъес мер бикиб.  
ЦIа абикъес даари  
Урцул даргесра бикиб.

«ХIунтIена букIун» бикIул  
Газетала хIянчизар

ГъатIира чягъир асес  
Дякъунра ит ухъначи.  
ЦIиваили хIулбира,  
ХIеризур ил нушачи:

– ХIуша чинарадтира? –  
Ил сай суаликIули.  
– Сергокъалалантира,  
Рахли хIуни баладли.

– ХIушаб чягъир хIелугас! –  
Чумали кайзур ухъна.  
– Дирцути чягъир хIегес  
Лебу хIела багъана?

– Багъанара ибХIели,  
Дебали халаси леб.  
ГIяя-къакъа бикIул мер  
ЛавашабIа гъуйчиб теб.

6.

Нушачил варх левсири,  
БикIуси сунес Назар.

«Нуни, – викIар – шилизив  
Серхурси ухъна валас,  
Илалайчир гIур гIяхIти  
Нуни чягъир хIедалас.

Машиналичир, дурар,  
Нуша хIерли датурли,  
Чягъирла балон хили,  
Дурайкиб кIел минутли.

ХIера, чIишлик сабаиб.  
Чягъирра сарри гIяхIти.  
ХIязлис ахIенри илди  
Назарли гапдарибти.

Шел килоличиб халал  
Лебри хIунтIена бялихъ,  
Авлис ахIенну, вецIлис  
Бии илала азихъ.

7.

ХIунтIена партизанта  
Итар дикахъиб нушаб!  
Чуйнал ханжал хъурсбариб  
Пайтуйчи кайруси наб!

Лерилра гIямрулис ну  
ВалкIа ветаахъурра.  
ХIушаб держяхъес чягъир  
Гъурра картIа дикIулрав?! –

Курагъуна муцIурра  
Лебри нясла вяхIличиб.  
Шушкара чебаира  
Баршили хъа бяхIличиб.

– Советунала душман,  
Гъаннара хIу левалрив?  
Лебил юртлизи булан  
ЦIадушили дигулрив?!

– Гъари, вигъая, дурхІни,  
Урхънази урхъехІену!  
Ихав ужахъес сунес  
Чармара бурхъехІену.

Держес чягъир касили,  
Нуша дурадухъунра.

Нушала урдализи  
Машийчир чардухъунра.

ГІяя-къакъа ил нясли  
АхІенри хъумартурли,  
Нушара душмантази  
Ил къзакъели дуйГулри.

8.

ГІяя-къакъала гІурра  
Байрумтачи дашехІе,  
Дубурти дерцахъибти  
Гъубзни гъанбиркахъехІе.



Хамис МАЛЛАЕВА



У гъанбушалли булан  
КІантІардикІесли нургъби,  
Севан къяркъти дарилл  
Дигайли набчил дургъби.

Арслан-къаплан дузули  
Къуватлаварибсиван,  
Бац-берхІи гІяшдиубли  
Суратлаварибсиван.

\* \* \*

БекІхІебиахъес или  
БархъдешгІебси дила жал,  
Алавчар ласли саби  
ЦІяр-цІярбикІуси ханжал,

Гъимили гъигъдикІути  
ХІулби лер хІердикІули,  
Агъули тудикІути  
Тупи лер гурдикІули.

\* \* \*

БацІили руржули мегъ  
Сурелизи картІниличил,  
Загърули ламбикІуси  
ЦІализиб улхниличил.

Жагъаннаб баргайчи халкъ  
Ишаб бяхІигулигу,  
Ахиратла имтихІян  
ИшбархІи дурцулигу.

\* \* \*

Дила дурхъал ВатІайзир  
Дигай милигли руржи,  
ВатІан агнар, ши агнар  
Шарабли руржесличиб.

ВатІан мискинбиалли,  
Низбала чуду бирис,  
УрхІличибси чумиздаг  
Низван чебяхІхІебирис.

\* \* \*

ЗухІяла зубартиван  
ХІулби ухули сари,  
ЧатІала вичІ-вичІгъунти  
Дугъби духули сари.

\* \* \*

Мургъила начи или  
Ахърурцулра някъбачи,  
Дила нешла у или  
Шадлира ПатІимачи.

\* \* \*

Сен Дунъя гъанни уркІи  
Изусил бураягу!  
Ажалла дислиубван  
Бисусил бураягу!

Бархбасла зугъадешу  
ХІулба чехІебиуси?  
Масъалала декІдешу  
Гъачам гІерхІериуси?

\* \* \*

Дила уршила рурси  
АхІенрив ит ребшибси,  
Сирияла шикадли  
ТутІу-къякъябарисси?

ХІериалли, ит чІярли  
Сен уркІаилра ишцад,  
АнцІкъи чедиберхесли  
Шалбузла дубурацад?

\* \* \*

Халкъла дард бала или  
Раркъирара абани?  
Рургънаба рии или  
Арикъуррав адани?

Дигай? Дигайличила  
БегІгани селра хІеиб.  
БакІили цІала бурям  
Улгу-мина парчаиб.

\* \* \*

Се адам сарсира ну,  
Хъусли чаба-кІанара,  
Ши-алавкадцун рашес  
Уркиули кІанрара.

Ретаэс хІериурси  
Бяхъибти-бубкІутачи,  
Нешван гІяшхІериурси  
Дунъяла алкІутачи?

\* \* \*

Вайнун жагъаннаблизиб  
Теб бикІар жалладуни,  
Кадирхъути инсайзи  
Загърула гІулудуни,

Итадли иша гечли  
БакІилив жалладуни,  
Чучил дарх гечдали  
Загърула гІулудуни?

\* \* \*

Къугъали регІриз ну  
Байрамличиррав гъатІи?  
ГІялам-халкъ ясличигу  
Агарли гъатІи-катІи.

ДалайрикІули рулхъес  
Саблив 9-ибил май,  
Къукъуван иргъухІели  
Кахти ярагъла маймай?

\* \* \*

ХІябдарш дус деркІадлира  
Дусмира селра ахІен,  
Хъулли вируд ватухъес  
БетІили дунъяла пай.

Зерьили руржахъули  
ВерцІхІерцІадли дигайли,  
Чакарван чакиули  
ЛявхІерадли карцІайли.

\* \* \*

Ахъти дубуртачивад  
УвахІихъани къаплан,  
Мурхъти къадурбазибад  
Ав айсани аждагъа,

Валкъаи дакІуухъен  
Алкес адамдешла цІа,  
Алавла бицІилину  
Гурднягъуна, хІявбуцІа.

\* \* \*

Чебиули пякъирти  
Шиналра хІедиркути,  
Гушдешла гІянд аурли  
Къагътиван кабиркути.

Шадлихъличи хІякъяс, я  
Лебдешла регІ хІериурс,  
Дергъла янтихъван ахІи  
Азадли гъайхІериурс.

\* \* \*  
Тамашаріэслицун  
Кайзуррая, Ванза-зак,  
Бархъдешлис, чебяхІдешлис  
ХІелугули мубарак.

Къикъимай къуртмабицун  
Жибирули мекъличи,  
ХІяясиз хІярамтицун  
Дурайули делхъличи.

\* \* \*  
Дигайли лагъбикІуси  
Кабуцасли жузлама,  
ГІяшхІейэсгу жан асес  
«ХІалайсул хІалислама».

УркІи кІантІибакІили  
ХІейэсгу жан дурасес,  
Лябкъути гъанаурли  
Дигайла маргъ гІебасес.

\* \* \*  
ХІунтІен хІили диркили  
Улкни, чула баракат,  
Аллагъла къадар дикІес  
Бирулрая хІяракат.

Висусигу Аллагъра  
Улхалли сунна дурхІни,  
Кадилзалли халкъличи  
Шинкъян цІудара бурхІни.

\* \* \*  
ХІеркІличи уряхІрулхъас  
ЛямцІбикІулину арцван,  
Шилизи черяхІрулхъас  
Чебиулрану бацван.

Нешла някъван хІялимти  
КІантІикъар хІясибдирис,  
Дудешла яхІван цІакъти  
Лусенти хІисабдирис.

\* \* \*  
ДурхІни бирцантачила  
Ва лайбикІантачила  
Шинкъян цІябси, цІударси  
Нуни жуз дурайула!

Аллагъла ва идбагла  
ЛягІнатуна бицІибси,  
Урезили буцибси  
Нуни жуз дурайула.

\* \* \*  
Цундешлизи духІнаиб,  
Батирай, хІела гІямру.  
Аллагъли барибсиван  
Ламартдешличи амру.

Амма сабира илцад  
ЧебхІебикІиб Аллагъли,  
ШипІла бяргІили бегъуб  
Буунтиван балагъли.

\* \* \*  
Шила шантас ахІенри  
АнцІукъунси Батирай,  
Халахартас, хІякимтас  
Душманри бархъси далай.

Усалти шикъ далдуциб,  
Батирай вячІес, кавшес,  
Амма цІахси ламартла  
ХІебикіиб арши диршес.

\* \* \*  
Бац-берхІи мурт акІубтил  
БурхІебуру цалилра,  
Илцад декІти имтихІян  
ДуцхІедуциб чилилра.

АлкІули рургус нура  
Гъарил даршдус сагали,  
БегІ гъав чейухІеливан  
ХІеррикІахъес жагали.

\* \* \*

Хелла сурат бетхейхъур  
Чархлизи бархбарибси,  
Херла нурван ахерли  
Рухлизи кIапIбарибси.

Урхъни ахъиб дирихъван  
ХIайран хIулби дисахъес,  
Хъяни аргъла сирисван  
Цуб цулби пашдиахъес?

Ил сурат саби дила  
Насибат русухели,  
АхъIехъибти дигайла  
Мусибат рисухели.

\* \* \*  
КяIбала хъалигъуна  
Дубуртазиб дила ши,  
Хезирван чинаралра  
Хедерхъиб дила арши.

\* \* \*  
МяхIяммад Салаллагъван  
Ахъуцили заклизли,  
Дигайла кунги гили  
Вархъаилрив муснази,

АнкIи дерхъесли хъалли,  
Кумек музахIебухъун.  
АнкIи гIяхъес, дег бергес  
Унц агарли уббухъун.

\* \* \*

МехIурриублирив? – бикIар алавти,-  
Чарбухъути ахIен ита бякъунти.  
Ташмишгъайзирра ну – чили далути  
Зугъра зубарила ахъти къанунти?

Дирихъван рамкъурли ретхIел аркъулра.  
Белгиагар дунъя гIелаб балтулра.  
ИшабяхI лябкъули сабашутази  
МягIниагар хабар гIяшли бурулра.

\* \* \*

Марли мехIурлирав? Къадуби-ургар  
ХIябрала мякъларад ласкарикIулра,  
Гъар къарла чIиълизи, гъар цIелдализи  
Неш мякълар лерсиван гъайкарикIулра.

\* \* \*

Итцадра къугъаси хIела кабизла  
Дагъистайзиб сурат леббиэс или,  
Ахъти лусентачил гъалмагърикилра,  
ДугIрухъван шурмачи хъябруцрикулра.

\* \* \*

АхIерси, хIелара зубари буру,  
Мусназиб гъар инса галгара буру.  
Зубартала ахъдеш сархес хIерирус,  
Галгубала ургар къарван харжрирус.

\* \* \*

Се барилра вара нуни къисматлис,  
КъацІ сабину или гІячи гъабуциб.  
Шарабли ралхули, къагърирахъули,  
Дунъя саби или дард гъалабуциб.

\* \* \*

Баласлири, ахІер, гІур декІардиркни  
Зарратла мехІларад агъули ружни,  
МавулхІяятличи хупІхІерилкира,  
УркІила гІянайчи гъяжхІериркира.

\* \* \*

Дагра кайкилри ит кепси далайчи  
ДехІибайчивадван ахъра вирули,  
ШипІябаргІили лехІси неш ванзаличи  
Нешличиван уркІи гІинибирули.

\* \* \*

Къакъалаб къачини чугур бяхъилри,  
Бисаличил бархли далай бучІулри.  
ВесмягІни, гІямрули ил къутІварилри,  
Чукурбикибтани нясси бурулри.

\* \* \*

Чиллра иргъулив поэтла тІама,  
Арц ва давла или вахберднилизиб?  
УркІила мургъи-арц лямцІдикІаллира,  
Селра къяббареси агу илизиб.

\* \* \*

Дигай дихънилизиб се гІяхІдеш леба?  
Къялкънани къехІвируд, хІуркІбани кяйгІуд.  
ХІяйна хІябал ибси хІисаблизивра  
Лер-лерти лугІурби дурули вирхуд.

\* \* \*

Иш юртличи чили мегъ чедихъиба,  
Шанда къапуличи каили хІяра?  
РухІнарикилра ну цІала курлизи.  
Чарриэс, ахъриэс ахъри агара.

\* \* \*

Адамгас къадурти лукѹси манзил  
Дигай делкѹнтала пикрила къяркъдеш.  
Гъамадли дургигу пиргѹвантала  
Дисла, къякъла удир ахъибти лагъдеш.

\* \* \*

Ну чини ахѹенра, гѹянжи сарра ну.  
Хѹура сайри гѹянжи, иш тугъ бучѹси.  
Дунъяра мирхъила тѹакъагъунагу,  
Гѹянжилис барсбарес варъа бурчуси.

\* \* \*

Чебаа их къада имиулала,  
Хѹеръа иличи – севан бузулил,  
Халкъла бузерилис гѹибрат аурти  
Хѹуни ганздирули, чина диркулил.

\* \* \*

Анкѹили дирѹѹти гъаб-убла халкъли  
Сандуг-уси дигиб гѹякълули дирѹѹес,  
Улкала ва халкъла къисмат ирзутас  
Сяхѹ-сяхѹли гѹяйхъули савгъатван дуртѹес.

\* \* \*

Лебилра иш дунъя сархули дуѹѹси  
Зулкъарнай булан хъули чарухъун,  
Лебил дила дунъя къаѹбуѹилрину  
Гъанна хѹура хѹела хъули чарухъен.

\* \* \*

Дахъал дусми дикиб. Ралхѹералара.  
Чи сарира или ташмишли калзад.  
Харрангла мурчѹала дукѹла тѹулби  
Хѹясибхѹедиубли, хѹяйранни кавлад.

\* \* \*

Агъ, Аралла урхъу, байхъу бегъубси,  
Ургъангъунари хѹу декѹли вяхъибси,  
Яра уркѹирив хѹу марси шягѹирла  
Бархъдеш буриб или лезми балъунси.

\* \* \*

Ахират, алжана гъарахъли или  
Хѹядурбирути леб миѹѹир жагъаннаб,  
Ахиратра саби иличил бархли,  
Чис или виѹѹадли – итис, хѹед ва наб.



\* \* \*  
Къакъалав ца пькъир  
Ухъна висулри,  
Ахара дургъбани  
Къяраиб урши,

Ил рахІятвареси  
Чилра ахІехъиб,  
Шанти, ши батурси  
ГъанкІлизи ахъиб.

\* \* \*  
Улка умцІухІели  
ПоэтунагІиб,  
Ну русулри мурхъли  
Нешла канилар.

Поэзияличи  
РетаибхІели,  
Аь-мауна буциб  
ШигІрула лабар.

\* \* \*  
Багъла хъяр ибхІели,  
Гъанбиркур Багъдад,  
ХІяжликъуни булган  
БикІули «мадад».

Урхъназиб лебвара  
Яра урхъазиб  
ХІечи лайикъси дев,  
уркІила Мурад?

\* \* \*  
Чичи кабилзада,  
Лайлатул къадри?  
Сецад ит дигулрал  
ХІуни багъадри,  
ХІяйран-хІякбизахъес  
Алавти гІялам,  
Чарвиради набчи  
Дурхъаси адам.

\* \* \*  
ВацІализи аркъяс  
СаламрикІули,

Ургуба кІапІбурцис,  
Умуси гІиниз,

ХІушани ахІен наб  
Шишимти хибти:  
Хур, жяр, ахътерек,  
Исбагъи бириз.

\* \* \*  
Дахъ гІядабти имтихІян,  
Хъардарилригу, Аллагъ.  
Дуцес риьхІериубли,  
Дархъдалтас нуни, валлагъ.

Аркъяс ну, хъардали  
Лябкъутази арзахъес.  
Илданира урдалта  
Лябкъутази арзахъес.

\* \* \*  
Дила дигайла нур  
БерхІили касиб.  
Инса савгъат или  
БацІли бедиб  
БацІли зубартачи  
Цугли паршбариб.  
Шихъла дугилизиб  
Набчи чарбариб.

\* \* \*  
Багълабии, уркІи,  
ТерсмабикІудну,  
Гъужумла ургиван  
Тирхъра бикІули,

ДахъалдегІ лертину  
Мусназир уркІби,  
Сабину гІяламра  
ПикрибикІули.

\* \* \*  
Иш дунъяла рухІнар,  
ГІяламла ургар  
Машгъурриэс ибси  
Пикри хІебакІиб.

Цагъачам бакѠибу,  
Ахара къукъя  
Машгъурли лебрину,  
ПяхѠли кѠунбаѠиб.

\* \* \*

Ванза гъятѠаэсцад  
Ярагъ дучили,  
ГѠяхѠдешличи хѠерли  
Леб кабиибти,

Илдала хѠяясиз  
Хъулани декѠар  
Дарсдирув дугъбани  
Нуни дурибти  
Гъармука улкнала  
ГъараѠѠ пикруми?

\* \* \*

Поэтла дугъбала  
Къугъаси чѠянкѠи  
Бирсили ванзалис  
ХѠева бирбалра,

ШурхѠебухъес вара  
Ил гѠяхѠла шайчи,  
БарсхѠебиэсара  
Ца бараалра?

\* \* \*

ХѠяясизунира  
Адамти сабли,  
ДигхѠейгули ихъур  
Чула дяхѠ дуэс,

Илдира чули ну  
ХѠералутиван  
Къайгъилизиб саби  
Тяйдили калес.

\* \* \*

ЧичѠала, хѠу чебберхи  
ХѠейгибарниличибад.  
ХѠезиб хѠясиббарибти  
КѠибяхѠянти уббухъун.

Агъули ругъдикѠути  
КѠикъяран лезмуначил  
Къясдешли къяраибти  
ТамяхѠкарти уббухъун.

\* \* \*

КарѠѠи духънилизиб  
Се гѠяхѠдеш леба?  
Къаркъала гала ѠѠа  
Чекъурли игув?

Къайикес гѠякълула  
ЦѠакъ хѠебиули,  
Ахара хъяшаван  
ХѠу висра висуд.

\* \* \*

Вари, нешанала  
ХѠурмат барая,  
КъаѠѠ берѠѠни багъандан  
ХѠурматбарая.

Хъумкартадаллира  
Даркъни, адикъни,  
КъаѠѠ багъанданалра  
ХѠурматбарая!

\* \* \*

Гъаб-убла наслубала  
ЯхѠла къала бехъасли,  
Ламус хѠяжарбарили,  
ХѠярам гъуни ахъасли,

Ахъси у сархес или  
Уруздарасли адаб,  
Цалра дурахѠебухъи  
Жузи гѠутѠули калаб.

\* \* \*

Азир къуруш мургъила  
Лерти диалри дила,  
ГѠямал-дарман буунтас  
Кумекбарес циила.

Умут лебкъи, цІакъ, гъунар  
Агарли уркъІрухъунра  
Пайдасиз Дунъялизи  
РакІили уррухъунра.

\* \* \*

РахъІи агарли хІечи  
Ариулра, дила ши,  
ХІунтІен тІайлизир сари  
Дила умутла арши.

ВацІурби чедидирхъис,  
КарицІус УбяхІ гІинзи,  
Ургубали дурайсу  
Дураар калнила занзи.

\* \* \*

Хъям-къацІла, хъулкидешла  
Пукъа буилригу иш,  
Дигила, дигудешла  
Дунъя саби рикІули...

Пякъир, нура руилра  
ХІялалдеш, мардеш или,  
Къянбала дубхъиличир  
Лагъаван къумрикІули.

\* \* \*

Адамти буцІазибад  
Бетаурал хІебалас.  
БуцІи адамтазирад  
Детаурал хІебалас.

Балас, рахлдилра бецІли  
Неш-дудеш кахІебуршу,  
Рах-махли биаллира  
Адамтани кабуршу.

\* \* \*

Дунъяла къатавтаур  
Сарли ну лергІер макъли,  
Халкъли хІясибрарайчи  
Кабурхар дила ахъри.

Зубартани къирдиру  
Дила къират, улибхъа,  
Дусмани буюрбиру –  
ХІекъдешлис бекІ кабихъа.

\* \* \*

Ца чулахъ къаршикиб  
ДекІти дергъла дусмала,  
«Кумек агара,- вики,-  
Абикъурти уршбала.

Бухъна чІакаван сайра  
Чиббикибси дукала,  
Ил аги саби нуша  
ХІердируси улкала».

\* \* \*

МягІрипатлизиб лебси  
Дурхъадеш багъес дигиб,  
Аллагъла гъунгелаван  
ХІези талихІ гес дигиб.

Вавнала дубуртикад  
Къеллизи къяш кайцІули,  
МяхІяммад идбаглисван  
ГІеларад рашес дигиб.

\* \* \*

ХІейги хІякимдеш, ари  
ГІягІинили ахІенну наб,  
ХІяя цІали игуси  
Жазаъ михъирла бухІнаб.

ГІур – шабагъат, хІярамли  
ХІерриънилис гибси наб,  
Нуни ну гІяндруршнила  
Вайнагъуна саб гІязаб.

\* \* \*

Агъ, неш, гъанриркулри хІу  
Хъу ирцІуси, иршуси,  
ХІебирар хІянчи-гъуни  
ГъатІи имцІякъ даршуси.

Гъанна агуд, чаррарес  
Набзи цакъ гили ахѐн,  
Неш шадраресцадалра  
Гъямру диули ахѐн.

\* \* \*

Пайтбушиб гъязиз Ватѐн  
Цудхъурла курегаван,  
Зугѐлуми зумадариб  
Зумаси дурегаван.

Ца итавяхѐ, ца иша  
Берцес дуцѐбухъун гъялам.  
Хѐярамгас хѐяз бетаур,  
Бирули улка кѐалам.

\* \* \*

Къакъавакѐилри поѐт  
Вегѐбекѐ гъяхѐси назмула,  
Гъязжварилра, -викѐи ил,-  
Арц агнила излума.

Жузлис назмурти хили  
Вакѐира хатирличил,  
Жузханали бур гѐкѐиб  
Шанданна сятирличил.

\* \* \*

Хѐяжланкѐила къукъриван  
Игути ламцѐиличир  
Гъар биркѐан чакаибти,  
Дигай, детмайхъудая!

Маркѐачѐила манзилну,  
Баилину чардухъес,  
Черрерхи ибти дугъби  
Набзи мадуридая!

\* \* \*

Жузи дурадухънили  
Я назмурти лукѐнили  
Ахѐенра поѐтлизи  
Нуни ну халрирули.

Карцѐриубли цаличи,  
Гъяшикъли гъяламличи  
Сархѐелира нуни ну  
Адамлизи руйгѐуси.

\* \* \*

Имиала бубкѐулри  
Чилирил къяш чецѐили,  
Хѐулби тѐутѐудикѐулри  
Амъур арцван, дацѐили.

Кѐантѐдухъунти нургъбазиб  
Бацван алкири гъира,  
Гъямру сецад гъязизтил  
Гъачам гъатѐи аргъира.

\* \* \*

Тѐимкъ сабира хѐела у,  
Уркѐи тимхъбикѐулигу,  
Цѐализи иргъусиван  
Гѐела тирхъбикѐулигу.

Хѐейгулра асли дугъби  
Дунъялис къянадирар,  
Дугъби къянадиалли,  
Дунъя хѐялалхѐебирар.

\* \* \*

Гъямру сагахѐедирар,  
Я ну жагахѐерирус,  
Белчѐунси гъямрула жуз  
Сабирхъукъи гѐелабахѐ.

Ахъес калунси манзил  
Чебуцили кѐанаван,  
Пяхърикасли хѐебалас  
Къадализи кѐанраван.

\* \* \*

Жунглила чирхлизирти  
Жанивартала сипта  
Чили гѐебасибвара  
Халкълизи мерлабарес.

Цали ца къяббириуси,  
Къьрибириуси цали ца,  
Душмандешла мусибат  
Адамгачи хасбарес?

\* \* \*

Зумаси вацАлизиб  
Дугила цЯбдешлизиб,  
Дунъя, пяхИли буунси  
Булбул къяйда рисулра.

Кабуршутала тАмри,  
Улхутала дяхъурби  
Дисбиван кадуцили,  
Дила уркИи усулра.

\* \* \*

Хела кьугъаси курца  
Карцайли чяхъбирути  
Хулби хЯйрандарадли,  
ХЯйрандирар хЯбал ши.

Дарили хъярхъти хъябхъя,  
Хъябхъяли тУтУдиру,  
ХунтИен тАйлизирХели  
Шими-алавти арши.

\* \* \*

Юзла кАпИличиван  
Хечи хЕрикАхъули,  
Къуръанна хатИличиван  
УркИи лагъбикАхъули,

Севан хЕрирусирив  
Ца уркИила дякъличив?  
Ванзаличив сайрину,  
Вет-садухъен халкъличил!

\* \* \*

Дила дай уркИила дех,  
АхИенри наб зугъали,  
Арцанта, вавни, ваца  
Дархдалгири жагали.

ВакИри лагъбикIуси  
БуцIар цIала къяливан,  
РацIира пIужмализиб  
Шам-хИиндала хIяливан.

\* \* \*

ДекIардиркуру гьатИи  
Дунъя ва берХИла ца,  
ДекIарбиркуру гьатИи  
Ванзализибад ваца?

Ятимра ну ва цIуръя,  
ГIяхИил кален викIули,  
Бара гъарахъикадра  
Ралли архIерукили.

\* \* \*

Муэртазив кавладу  
ГIяшикъли уркИиличи,  
Бурямван сахIейуду  
Айили урчиличи?

Ашрапултазир мургъи  
Сарра хIядурдали,  
Ял-къамаличи даршес,  
Дунъя сагабарили.

\* \* \*

Агъ, дила дигайла жуз,  
Калам, кIа, се-дигара  
БелкИи гIергъи, белчIунра,  
Илаб селра агара.

Дигайла шала бурес  
Шали баили ахIен,  
Шалала мягИни багъес  
Шаладикили ахIен.

\* \* \*

Анар-ханарлира ну,  
Урузсиван, уркIсиван,  
УргIерти дугъби дурес  
Риубсирара севан?

Ца гъаялра хIеибкъи,  
Гъайрухъунра рикIули,  
ХIулбани чехIеибкъи,  
Чеваира рикIули.

\* \* \*

БиркІан кІибайбиэсли,  
ГьакІбарира балуй някъ.  
Мегьла бетон барили,  
Белшунра уркіла дякъ.

Амма дигай хІедуиб,  
Чучи сари лехІдизур,  
Уркіла цугдайлизи  
ХІила тумван кадизур.

\* \* \*

Се гІяхІси бетаурал  
Дигай дихъни итхІели,  
Дели ибси у лугиб  
Дихъаллири ишхІели.

АвдикІути буцІани  
Алавчар бицІибхІели,  
Шанглизиб зела къякъван  
Асилдеш дацІибхІели.

\* \* \*

Чили паршбариба иш  
Дунъя бицІари дяхІи,  
Чили севан держиба  
ХунтІена вавнала хІи?

Гьава ауру гьатІи  
Дила къяшмала кункдеш?  
Гьагултани касибу  
Дирсиб палтарла ункъдеш?

\* \* \*

Дугъби хІерхІедирули,  
Делила гІердирули,  
Мажнунниван дубурти  
Къадурби къяйцІдирули,

ШипІла ряргІили къалла  
Назмурти хІелукІули,  
Чарличибси далгаван  
Дай уркіи хІелукули.

\* \* \*

БегІ гьабла гІяхІ багъурти  
Бурги, марли, нешани,  
ГІямрулис аслу-хьулчи  
Кадихъибну илдани.

ГІевдухълис убза-къякъван  
Халкълис чараагарти,  
Дунъя мицІирли бихІес  
БекІес баги агарти.

\* \* \*

Бархъдешлис дяхІ агарси,  
Къянба хъячІли бицІибси,  
ХІу буилригу, Дунъя,  
Аманатлис хиянат.

Адам мяхІкамхІейруси,  
Мегьла заб камхІейруси,  
ГьатІира хІу буилри  
Аманатлис хиянат.

\* \* \*

Балгни гІелумдизуру  
Нешанала черяхІти,  
Дирглуми кадизуру  
Халкъ лукъути, уряхІти,

Дявти таманхІедиэс  
Бургъути хІярхІхІебиэс,  
ХІярамдешличи белгъи,  
Бархъдеш хІялалхІебиэс.



# Жадырты

---

Аминат ХІЯПИЗОВА



## БИСУСИ АРГЪ...

Янили хапли сунела гъарли-марти дяхІ чедаахъиб. БугІярбиуб. ГІяхІцад дяхІи бариб. Амма ца-кІел бархІили дяхІи бацІиб, ургъес даимбиуб, шагъарла къакъурби, хаслира дачабала мер-муса гъарли-марси билхІлаличи шурдухъун. Илгъуна аргълизир хъулибра анцІбукъи, гъалмагъуначи гъарракІира, ва ишгъуна анцІбукъла бикъри ретаурра.

Хъалибарг – ил мяхІкамли ва дигиличил хІербарес гІягІниси нушала давла саби. Хъалица дехъни халаси мусибат саби, хаслира биштІатас. ИлдаскІун нешра дудешра цаван дигахъути саби...

Мурадра Маринара цалис ца дигули хъайчикабибти саби. Авал дус гелешмешунили калун.

– Дила цайли цаси уршилис Аллагъли пархъибсигъуна сари... – хІилнариркъусири Мурадла неш Аймисай, Мариначи мурталра разили.

Чула рурси талихІчерли риъниличи Маринала бегІталара ташмишдеш аги...

ХІера, ишбархІи, тІагІямагарси, бисуси аргъ... Уршира рурсира кІапІбуцили рисуси Марина. Чичилра хІерхІерикІуси ва лезми къяраибсиван лехІкахъибси Аймисай.

– Буралра бураягу се бетаурсил?! Лерилра мицІирлира, ара-сагълира, се яс-биса сарив ишди? – дугъарилзулра Мурадличи.

– Селра биубси агара. Нуша декІардиркулра. Нушачибад бехІбихъили хІебиэс хъалица делхъни. Диур... Селис гІягІнитив имцІати гъай... Чумали гъайикІес, хъунулра дурхІнира лебси шайчивяхІ хІерхІейкІес къайгънавиркъули хъалли, чебаэслири сецад декІлирил мурул адамлис.

– Наб Мариначил декІарли гъайкарухъес, рирусигъуна маслигІятбарес дигулригу, амма илдала хъубешли тІама хІебакъеси декІарси хъали агарсири. Гъарзаси жанияІ фанерали декІарбарили барибси, бусес кабилхъуси хъали халхІебаралли.

«Нушала ца урши сай, илра илала акІубтира нушаб барх биубли дигулра» или кабизуртири Мурадла бегІти, уршилис мекъ барибхІели...

Бетаурси биалли ишгъунари. Аргъ вайтIабикибIели, дурхIни садиклизи бикубли ахIенри. Янила сессияличи хIядуррикIуси Маринали, сунесра набичиб дигули сари или, дурхIни хъубешличи хъаркабарилри. Аймисайлис дурхIнала тIама-гъама анцIдулкъулри.

– Валлагъ, дила уршили гъачамалра иш хIебирис, иш хIебиги ибси ахIенри. Шанти бумсахъугу ишдани. ХIуни, Марина, дурхIнас бяркъ бедес балули ахIенри. Илис буилигу ишди хIуни ясли-анхълизи къужкабарибти. Агъагъай, гъаннала хъунрала макру! Сегъуналра уркIецIи агарагу муйлачи...

– Неш, хIязтахIебиркъули хIебуаргу дурхIни, аргъ гIяхIбухъунмад, садиклизи башар. Ишдачил рургъес я дирхъес гIягIнидеш чебиули ахIенра, Мурадли ихтияр баралли, ца-чумал бархIилис дила бегIгачи аркис.

– Юх, чилра чичилра архIекид хIуни, къянчикъ, дила уршили бекIличи аратурли, хIед дигута, гъандикибта риркъес ихтияр бикили балан! ХIед дирга-лабулхъухIели, дурхIнас дирхъулицун ахIенрину, урехили тIутIубикIахъулри илди хIуни. Нуни гъайибхIели, сен кахIебурцусив?!

Илдигъунти гIядатла гъайличибад бехIбихъили, уршила хъунара хъубеш нешлара ургала тамай бяргIиб. Къалмакъар агарли ца бархIи аркъули ахIенри.

Мурадлис кIелра хъунул адам цаван ахIерлири... Биалра, неш ца сари, хъунул рарсрасес, цархIил раргес асубиурли. КIел цIала ургав вамсурси Мурадли цархIил селра пикрибарес вирули ахIенри. Наб декIаркайкес дигулра! Абикиб къуллукъ!...

– ДурхIни набзибад чилилра кебхIейсу. Илди набчил бирар, – чIумали каризурлири Марина...

Нуша ихтилатдикIули лерли, виштIаси урши хала нешличи гъамиуб:

– Аттаба, ва аттаба, малулгъудгу неслис, Асини бячунсигъуна пигъала хIед нуни халаваибхIели гъатIира жагаси исис...

Нуни виштIал кIапIуцира ва рисириира:

ХIушазиб цализибалра иш уршилизибгъуна гIякълу буили ахIен. Иш-бархIила гIергъи адамтази халхIейрурая нуни, хIушала хIушани, сегъуналра багъана агарли анкъилабси цIа билшахъулрая.

Халаси ВатIанра ца хъалибаргличибад саби бехIбирхъуси. Нушазивад гъарилличиб чебла саби маслигIятла яра гIякълула гъай чейсуси мерличиб бурес. Белики, дигиличил дуцибти хъалицIа дерцахъес чула сабур, дагъри хIедиути жагъил хъалибарглис, цархIилтала пикри багалабиэс?

Мурадлира Мариналира декIарбиркнила масъала гъачамлис судлизи хIебедили лебал.

### ДАРШУБИЪНИ...

Иш хабар бурес хъулриубхIели, сен сарил хIебалас, ишди дила назмула тугъи гъансадикиб. Дарганти бикIули бирар: «МаслигIятла гъайли абитIунси ханжалра къяртIайзи чарбиру».

Жявли гъалаб хIербирули калунти нушала пасихIкарти, сабурла бегIти, селрайчир гъалар адамдеш чейути бухънабачила нуни бакъибсиван хIушазира бурулра.



Нушала унраличив ГЯлипашала ГъазимяхИяммад бикIуси хIурматла ухъна адам вири. Ну шуибил класслизир ручIухIели, илис унруби 120 дусличивра имцIали виубли сай бикIутири. ИтхIели ил вацIализи урцуйчи вашулли. Юртла мякълабси халали ахIенси анхълис гIяхIси къуллукъ бирулли.

Илини дашахъути гIинцби, хъярби дирцули хIейри. Чис гIягIнидикаллира, ГъазимяхИяммадла гIинцби ва хъярби дири. Гинизла мякълабси илала биштIаси юртлизиб мурталра бизити цIедешла тIем бири. Илдала азбарлабси карилар лебилра унруба къацI дуцIутири. Илар бара дерцIибти къуцIриван тIагIямла, гIямруличила хабуртира дикъутири...

ГъазимяхИяммадли хабар бехIбихъиб:

– Ит замана нура гъанна хIушагъуна хъяша вираси. Гъалар гъанналагъунти дабри, палтар- къяш дирути ахIенри. ХIебла шаладикалри, дуки цайкъяшмачил вашусири, дабри мяхIкамдарес багъандан. Илкъяйдали – вава-къарличичаибси шах чертIайчи. Ит бархIи ну ярга хIясибли хIенкъличил дукив сайри.

ХъубяхIрумала байрамлис гIергъи чумал бархIи ардякъири. Ванза ванабиублири. Амма къяшми, хъачли дицIибти кабцла дабрилис гIергъи, сагати хIебличи бурсидиубли ахIенри. Къяшлизи атIунси занзи абитIес кайирагу – лебилра шила шанти набчи хIербикIули! ЦабехI хъулчрачибад, цабехI улкъайтазибад, хIятта гъуйчи тIашбизурли, хIербикIулри.

ХIенкъ рахIятли гIяйкабиубли саби, алав-гъалав хIеризурра, селра биубси агара. Селичи хIербикIути шанти?

Мирхъила тIакъаван Нуссе бяхIлизи белшунси ши Мухъраула диркъаличи бяхIчили сабхIели, илцадра гъамсиван кабилзули бирар. Ахъли гъайикIусила тIамала бикъули бирар. ИтбархIи биалли шантала бачабархни багъеслири. ХIерикIулрагу, удиван, хъуми далцути кIел хъубзара. Удибси хъура чедибси хъура ца-кIел ганзлагъуна хIярили декIардирулли. ВиштIали виаслира, нуни балусири, илди кIелра хъу гъанна чумал дус чилилра дацунти хIедиъни. КIел къамла ургар кадикибти къалмагъар гIердашули, чумал дус дикилри. Душмандеш дебали мурхъ ардякъири.

«Жагъилтала хIехарадеш багъандан кадикибти душмандеш сарри», – ирули бирар шантани гъанна, ил анцIбукъличила гъанбикахъалли. Ишаб наб бурес дигуси, илди кIелра къам секъяйда даршудиубтирил саби.

Чедибси хъула вегIла гъамтазивад гIямрули бегIлара халаси адам дуракавхъи сай хъу бацес. Вайлиур ири-ханжалра лер, хунжазир – гъарушра берклумира.

Илкъяйдали, удибси хъула вегIла къамлизивадра гIямрули бегIлара халалгъуна дуравхъи сай хъу бацес. Шанти биалли лехIли саби. ЛехIли саби гIямрула вайра гIяхIра балути, гIямру деркIибти бухънабани се бирул. Илда арзес гIягIнисири ца шилизибти кIел къамла душмандешла гIянд.

Ил бархIи дукивси наб дебали гIеркъасиван билзулли. Ца хIули къачначи хIербикIахъули, ца хIули хъубзурачи – ну илавад гъарахъхIейкира.

Ахирра, хIери гIергъи, баци таманбиуб илдала ургабси ванза. Ца-кIел ганзла бягIуси, бухъяна ургала. Итил дубла тIашаили унцира, ца ухъна ватихъиб, ишил дубла тIашаили унцира, ил ухънара иличивяхI ватихъиб. Шанти лехIлири, илди кIелра хIурматла бухънабани, саби-ургаб хIила – душманта,

ири-ханжал ирзул, хунжи гьаргдирул! Илдазибад дигахъусиригу шантала кьисмат булан.

Илди кIелра хъубзар цаличи ца гьамбиуб, цала ца хIулбази хIербизур. Някъби цацIадариб. Багълали ванзаличи гIяшбиубли, хунжи арзиб...

Лебилра шанти (биштIати ва халати) разидешла тIамрачил дуцIли майда-йчи бакIиб. Белгъун халаси хIяйван, бариб даршубиънила мекъ...

## УРКIЕЦИЛА ДЕХИБАЛА

...ИтхIели шилизиб урга-даражала школа агарсири. Набчил барх бучIу-ти хIябал рурси белчIуди даимбарес Хайдакъла районна Мажалислизисби «Дубурлан рурсбала интернатлизи» хIядурбикIулри. Набра илдала пикри гIяхIбизур.

БегIти дураб хIербирулри, хала неш биалли рухънакараилри, ил багъандан интернатлизиб белчIуди даимбарес ихтияр гахъес районолизи рукъес гIягI-нилири. Дила гIямрулизиб илгъуна архIя цаибил сабри, ну дебали гьалакса-урлири, къакъаракIилри...

Районола халал школала директоргъуна яра учительгъуна увхIевхъун. Илала тамашали къяркъси, суал бухIнабси хIерли къужрарисиван гIела чаррияхъес гьиррарира...

– Таш, тIаш, рурси, хIу иша чили арацIахъисири?

– ?!

– ХIела къуллукъ, мурад?!

– Дубурлан рурсбала интернатлизиб белчIуди даимбарес дигула...

– Чидил шилизирадсири, бегIти чихъалив, сен дудеш яра неш хIебакIили, хIу ракIибсири?...

ХIушала шилизибад гъанналауб хIябал рурси къабулбарилра. Гьарил урга-даражала школа агарси шилисра хIяб-хIябал мер чедаахъили ахIен. Калмыкиялизибти букIунала рурсбас ахIенну, бегIти агарти, бахъал дурхIнала бегIтасра мерани диули ахIен!...

Гъай тамандиъни иргъахъули, илини наб унзаличибяхI гъуни чебаахъиб. Сурс-къакъарлизи барцбикисби гIяндли набзи гьар секIал хъумаргахъур. Белики, нушалара бахъал хъалибарг лебниличила, наб белчIуди даимбарес чараагарли биъниличила бурасли, кIантIивакIес? КъакъаракIибси дила пикруми къябаили, ургарти гIямрула мурул адамли унза гьаргдариб:

– Асубирару?

– Ваши, ваши ХIяжи, ваши, дагличивад хIечи хIерликайилра, иш хIушала шан рурси бусягIят аркъули сари. Районола халалли набзи дурарухъахъес гIурра лишанбариб. Саламла мерличиб нушала шаннис бекIра гьакIбарили, ил нуни бусагIят вагъра хIегъурра, набчисби хIял хIебагъахъес, биса чехIедаахъес къалабали дурарухъунра.

ХIулбала гьалаб дунъя цIяб-цIударбиублири, наб бекIлил гъанаги, бакъиб-сира ахIенри, чузирад адамтала гIямрула шуртIри дигахъути, чис-дигара кумекбарес бирути халати хIякимти илдигъунти къяркъти биэс бирниличила. Бисуси уркIиличил жузала тукейзирихI ратрихъира, Уркарахъиб дила цархIил

бареси аги. Чула къуллукъ барили, шилизи чарбирути цашанти баргес гЯгГ-нилири. Хапли гЕлабад чилирил жииб.

Нушала унраличивси, Ибила ГЯйшатла узила урши ГЯбдуллахЯжи нуни бусягЯт вагъхЕгъурра. ИтхЕли ил, электросетьла начальникли узули хъали-баргличил райцентризив хЕриурли. Райнола халалличив къаршиикибси дила унра ГЯбдуллахЯжи сайри.

– Маремла рурсе рурси, гъари тАш, азис рат. ХЮ нуни бусягЯт рагъурри, гЯйибмабирид, у хъумартурлира. – Ил дила някъбазибси гЯсаличи хЕризур. – ХЕра, ит юртлизир нуша хЕрдирутира. Гъанна раши нушачи хЕрейс рукесра бамсри ахъесра. БархЕхъ Зайнабра нура шилизи аркъутира, нушачил рарх хала нешличи аркури, хЮ интернатлизи руцниличила гЯхЛа хабарра бурес рируд.

Дила разириубдешла, тамашариубдешла ахир аги. ЯхИдучес хЕриубли рисирира.

– Вари, вари, узис рат, рисес гЯгГнили ахЕн, хЕд далайрикЕс гЯгГнили саби. ХЮни балули хЕругуд наб сецад разидешал хЕд кумекбарес виъни. ХЕла хала неш багъандан се-дигара барес гУрра хЯдурлира. Бахъли-деклар хЕбала се адам сарил ил... – ГЯбдуллахЯжила тАма барсбиуб, зак-ранга хЮлбала хЕр мурхъбиуб.

– Неш-дудеш жявли бебКибси цУрЪа урши сайри ну. ИтхЕли дубурланта-ла гЯмрула бегЛара жапати дусми сарри. Гаши-дягИ, дургъби... цУрЪадеш атхЕдацИбти анкЪурби дебали камли сарри. ХЕла хала неш дургЕлабала (колхозла анкИла) къараул рири. Нуша чумал цУрЪа дурхЯ дашутири, колхозла дургЕлабас алав, гашали хЕдебкЕс багъандан анкИла къукъри луцес... Бай хъатгъуна къацЛа кесек биркути гашали хЕбебКили калун. Наб цайналра хЕла хала нешлагъуна бизиси къац берки гъанхЕбиркур. Чумра цУрЪа дурхЯли илгъуна хабар бурес бирар хЕла хала нешличила... Илала «уркЕцИла дехИбайчила!»

Сунечила игъуна хабарли, хала неш гъайгъайра дебали разириахъуб, кАнтИракАхъиб:

– Ва дила, цУрЪа дурхИназивад вегЛара назикси, вегЛара виштАси, чуйна-чуйнара дяргИбти къяшми хЯкализи дергурли катурсири... ЦУрЪа дурхИнасцун ахЕнри, хала нешла, итди дусми къянти. Лебтасалра цаван буцАрлира сабри бугЯрлира... Амма итхЕли адамти декАрти бири. Гъанна бахъал чагъли саби, илдас селра биули ахЕн. ХЕрбирули саби букесцун! Лукъули ахЕн. ИтхЕли, адамти итцад къянти, гушти дусмазиб, хЕрбиэс багъандан къацЛа кесек биркухЕлира, уркЕцИчечбти, цаличи ца дигичечбти бири...

– Хала неш, сегъунти дирутив уркЕцИла дехИбала? Нушала унрани, хЮни уркЕцИла дехИбала дирутири или буриб.

– Итди дусми, дила рурси, къянтицун ахЕнрину, къяркътира сарри, – хала гъигъбатур хала нешли. – ХЕрагу ца, илра хъумхЕртурли валан... Лебтири итхЕлира цацабехИ хЯкимти-ургаб, чули гаши се сарил хЕдалути, дурхИни гашали хЕбебКлахъес авлахъличирад анкИла лугни далцунхЕли, дургъбазиб муйли алхунти гамъаби сибирбирути...

Дургеллабазирти колхозла анкИла къараул рираси нура, шила цIуръа дурхИни дургела алав бакIалри, «кася анкИи, кисми дицIая» рикIес хIерираси, сенкIун или рикIахъес хIералтаси, ихтияр агарсири. Рахли илдазивад цалилра, «Нушаб къараул Маремли анкИи гиб» алри, наб хIядурси туснакъ сабри. Илбагъандан, дурхИни дургелаличи гъамбируси замана дахИбайчи карилзаси. «Аллагъу акбар» или, анда ванзаличи кабахъили, пакъиртала кисми дицIайчи бекI ахъхIебурцаси, илди чехIебаэс. «Касая, ахIерти, хIушаб даари, хIушала дурдибти шалбургала диштIати кисми дицIая, диубцад хъярхъли, гаша хIедебкIес бажарди-барая...» дигIянали рулгаси уркИи-уркИларад. Рахли чили-биалра чебаили, жавабличи ритIакIасли, ну дехИбайчир саррину, чехIебаира рикIес...

### РАЗИЛА КЪУЗРИ ...

... Черрерхи набчирад, дурхъаси, гIязизси хала неш, мурт ва чуйна хIу гъанрикадзира, нуни бекI гIяшбурцулра. ГъачамхIели гIяшли рисулра, сенкIун ну хIела гьалар ахъес хIерируси чеблалиурра. Ну, се барили хьалли, хIечи мешуси ретаэс хIерирус.

ГъачамхIели, халаси уркИила бухИна кахIебурцуси пахруличил наб ну пишрирхъулра, дунъяличир бегIлара пасихIкарси, цIакъси, уркИи-хIял умуси хала неш рири дила или. ХIуни кадохъибти дурхъати адаб-хIяяла дурсри хъ-умуртули ахIенра. Къанни биалра илдала къадри аргъилра. ХIечи бараалра мешурикес къайгъназирра...

ИшбархИи хIечила дила гъанбикуну, рирхулра, чис-биалра чараагарли багаладирар или. ХIела гъарил баркъудилизиб наб гIякълула хъумхIертеси дарс... пасихIдеш гъанарули сари...

Ил рикИи:

«ХIярамзада ретмарад, дила рурси...»

...Ит бархИи ну хала нешла вьав-гъавли чераргъахъира:

– ХIела гIямал-дарман буъла харабат, цIахалра хIебилзулив хIед? Эй, чинавси хIела аллагъ?...

– Варсур ургъусила бикъули ахIенра. Амма хала неш рамсниагарли черашули сари. Рургъули, хIебурибси балтули ахIен. Харчризурли, гъаргала гъаррикIулрагу, кIел къазра гъардашахъули, хала неш шипIряргIяхъес тиладилличил, кIунтIбачи тIулбира чедурцули хъули къалабарикибси нушала тухум – хала нешла узикъарла рурси Разият.

Къапула гьала раибмад, Разиятлира мухIли батаиб:

– Гъу, диур, диур гъанна. ХIед-деклар се гIяхIси бариба ихдала анкИила децIлизи рикес?! Вайла вай хIебалан гIяхIла гIяхI хIебалан сарри хIу, адала рузикъар! ХIед сегъуна-биалра кумек гIягIнихIели, набчи дуцIрикIуд...

– Эгъ, урезиагар, дабагъ ряхI! Барибси кумек уркъбирхъулрив? Илгъуна убяхIси, цIахси баркъуди бирули гIурра чемарааби нуни хIу! Рукили дайша, шантала гьалар цIаххIерарили хIеруус!

Шаладикниличил къалмагъар тIашдизур. Бара черсаргъили риаслира, нуни гъар-се секIал дакъира. Сунела къузри унраличирси уршила хъулрачи хIер-

рикIуси гIянциIа Пирдазла анхълизи Разиятли дугели кадеркIилри. Иличила дигIян-гIяшти хабурти цабехIли идилтази шутIдирулри...

ХIери гIергъи, нушачибад ца-кIел юрт ургали мерлабиубси Разиятла хъ-алчирад вера ахъдиуб. Алавчарси къатIлизи чуднала бизиси тIем гIяйбиуб.

– Гъари, дила рурси, – рикIар хала неш, – убаса иш дертур ниъла хъаба, Разиятла чуднала тIем хебну, ихичи аркъяс.

– Гъуя, хала неш, савли жявли итди гъай дурили гIергъи?!

– Эй, дила ахIерси, бархъси ахIенрив нуни бурибси? Сунела гIякълу хIе-биули биалли, чили тIашиусив абдал бируси хъяша?! Наб ил баркалларикIес гIягIниси саби, гIимрукIес ахIенну. Ну илала нешгъуна адам сарра. Гъари гIимрукIаб гъари, се бирисал нуни сунес!

Пур набчи чарряхъили, мурхъли хIерризури, ишди дугъби дуриб:


– Вари, дила рурси, хIу хIярамзада ретмарад. Савли бурибси вайси гъай уркIилизи кабуцадли, гIимрукIадли, хIерриэс хIед дебали гIядаббулхъан. ХатIаличивад чи-дигара чевурхар. Амма Разиятлагъуна баркъудиличивад Аллагъра чевхIерхар.

Ит анцIбукъ, тяп саби кабикибси бархIиван, дила хIулбала гъалаб лебал.

Разият, ахIерси! У барсбарили хъалли, хIела къузрачила белкIунси хабар-личи шакрирни балула, иш хабарли чисалра зарал хIебиру, ва илбагъандан тиладибирула набчирад черрерхи. ИшбархIи хIу, итхIелла дила хала нешла зилан ретаурлири. ГIиммаруркIуд набчи, наб бурес дигула: хала неш дебали рирхусири, хIу гIимхIеруркIниличи ва хIезибад итгъуна баркъуди гIур тикрархIебирниличи. Тикрарра хIебиубгу, биубу гъатIи?

Дила гIямрулизиб биалли ит дарсла къадри бархIиличи бархIи дурхъа-бикIули саби...





**МяхІяммад КЪАРАТОВ**

### **ГІУР ДИЪ ХІЕБУТІИБ**

Жяндуртала мер-мусаличиб Мугъур къякъ бикІуси мер лебли саби. Чумра адамлизи хъарбаира ил мер чинаб сабил багъес дигули, амма ил балуси адам къаршихІейкиб наб.

Ил мерличи дила халаси хІяжатдешра агара. Илаб биубси ца анцІбукъ-личила дила хала дудеш Къаратов МяхІяммадлизибад бакъибси хабар бурес дигула. Ил илав букІундеш дирули калунси сай.

Итди жявти дусмазиб букІунала беркала мурталра хинкІ биубси саби. Авлахъличир дарибти букІа хинкІира диъра набра деркес къадарбиубси саби. Илдала бизидеш бурес хІейрар чула тІем хІебагъурли. Тем багъес дигути леб биалли дила гІяхІти юлдашунала ургаб, ил барес вирар. Илдачи ну бурсивиубсира, Калмыкуназив гъаланачи букІуй, гІур халабукІуй узули калунси замана. Чумра урус ва калмык юлдашлис гІяхІдизуртири нуни дарибти гъарушра.

Мугъур къякъличиб биубсилечила бурис.

БукІуни ца къумурлабад хинкІа букес бехІбихъес гъалаб гъариллис диъла пай бируси гІямрули халаси адам уили сай. Къумурла гъалабти лебилрара-сера илала пишначи къабулли буили ахІен . Амма, халаси адамлизи гъайэс хІейгули, валтули буили саби.

Илини диъла бутІни дирухІели сунела гъала лига агарти бутІни кадирхъули уили сай.

Гъачам, диъ илкяйда бутІнадбарилли бекІиубси ил гІелавяхІ шурухъунхІели, дила хала дудешли хинкІа-диъба бицІибси кІабатІ ласбатурли сай.

Букес бехІбихъибхІели, диъ буртІан айзурли, бисмилла или, итилла гъаларти диъби касили сай, къялши бицІили. Чариубли сунела мерличи кайрухІели, кайруси убихъала, мякълавсини убасили уили сай. Ил убасни хІебагъурли, кайруси диъ буртІан къакъличиикили сай. Илала някълизирти диъла бутІнира кадикили тІутІудиубли сари. Ил анцІбукъла гІергъи, ил адамли гІур диъ бутІили ахІен.

## ЧАПЛИНХЪАЛИГЪУНТИ

Нуни гЯхИил балути кЕл адам адамтала цулбазиб биркьути саби. Илдазивад цали илди адилтУли сай, «арадарес хЕйрар» викУли. Ил вархълил ахЕнал, аратира адилтУлил чили бала? КИибилли, цулби дарили, адамтас диршули сай.

Цаибилли – цулби адилтУсини, сунени цулби адитУнти адамти, валлагъ, гЯхИти цулби дируси уста сай или, цулби дирусилчи бурхули сай. «Ихичи дукъеная» или.

Цулби адилтУсира, илди дарили диршусира саби-ургаб гъамти адамти саби. Цулби арадируси, адилтУси дудеш сай, дируси ва диршуси урши сай. «ГЯхИси тухтур сай» бикУли дудешличила гапла гъайла хЕргъира. Уршиличила цулби гЯхИил дируси сай бикУли, гапбикУли аргъира.

Илди дилара гъамдеш лебти адамти саби. Гъачам илдазивад цаличил, – дудешличил кадиилри, илдала юртлизир чайла бужули, ихтилатдикУлри. – ХИуни, кинобазив чейахъуси Чарли Чаплин бикУси масхарала гЯртист валаду? – хъарбиулра нуни тухтурлизи.

– Чеибси сай, гъайхЕдикУти кинобазив вирар.

– ЛехАхъи, иличила нуни балуси ца хабар бурисну, – викУлра ну цулбала тухтурлизи.

– Гъари, бура лехИхъусну, – викАр ил.

– Ил Чарлила дудеш улкъайтала шишни кадалтуси уста уибси сай. Мурталра-декАр хЯнчи дуили ахЕн илис. ХЯнчи агарли, арц агарли вайГадикибХели, дудешли хЯннутра бедили, виштАси Чарли урхули уили сай улкъайтала шишни дялчяхъес. Урши, шишнира дячи, хъули чарухъунХели, илизибад сасили хЯннут мурталра чебяхИхъуси мерличи чебяхИхъули уили сай, гУрла ярга сабаайчи. Шишни дячунтала бегТани Чарлила дудеш жирули буили саби, шишни кадатахъес. Илкьяйда хЕрбирули буили саби илди, Чарли халаваили, машгурси кинола гЯртист ветаайчи. Бакъибсив илгъуна хабар?

– Гъанна хЕзибад ахЕнси хЕбакъира. ГУр се бетаурлив?

– Се бетаэса, илди чаплинхълайчи мешудиркулрая хУша – дудешра уршира наб.

– Секьяйда?!

– Секьяйда ахЕнну, хИуни цулби черудулри, уршили диршули сай.

Нуни ибсилчи ил уркУхъун.

## МУЗЫКАЛА ЦАКЪ

Нушала шилизивадси ца ГЯбдуллагъ бикУсира булгунала Кумухла шилизивадсира тянишбиубли, урга-ургади ГЯяла базарличиб кършибиркули буили саби. Гъачамра илкьяйда кършибикибХели, булегини ГЯбдуллагъ сунела уршила мекъличи живарили сай, «юлдашунира кили вакИ» или.

Мекъла барХи, кЕл жагъил адамра барх букили, арякьи сай ГЯбдуллагъ булегила мекъличи. Мекъла вегГ гЯхИлас разили гъуниваили сай. ГЯхИли

гІяхІсигъуна мерличи кабатурли сай. Деркести-держести сегъуна-дигара журала дуили сари. Амма мекъла вегІ ца дубла тІашкайзурли, гъунчи хІерикІули, хумарли кайзурли уили сай. Илар музыка агарли дуили сари. Балубли-хІебалули бяхъибси жикъила тІама дакІудирули дуили сари рах-магли. КъантІли буралли, кІинайс якъинбиубли саби, музыка дяхъес балуси адам агарли виъни. Булугуни биалли, илгъуна мерлаб баткабухъунти далай-делхъ, музыка, разидеш дигути адамти саби. Илдала мукърачив, хъубяхІрумачив, бай-румтачив чуйнара къаршиикес чебуркъибси саби набра. Ахъушала районна ЦІулихъяна бикІуси шилизив кІел гъатІи гъалмагъра нура къаршидикибтири ца мекъличир. Мекъ шила школала директор Къамутаев МяхІяммадла рузила рурсила сабри.

Илаб жикъи бяхъибси леври, булхъес дигутира лебри, амма дам бяхъес балуси агарли уилри. Жикъиличил барх дам агарли делхъла аги сегъуна бируси?

Сасили, нуни дам бяхъира. Жикъила агиличил балбикахъили. Бусаунтиван кабизурти мекъла агълу чебаргъиб, мер-мерличибад абизурли муйли, хъунри, жагъилти делхълизи кабулхъули хІяз бемжур.

Набчил бархти ГІябдуллагъра Элдарра тамашабиубтири нуни дамдыхъиб-хІели. Ахъушаб къаршибикибхІели масхаралисрил, марлисрил илди бикІутири набзи: «ГІур мурт аркъехІев булугунала мекъличи?»

ЦІухтакан ГІябдуллагъли мекъличи букибти кІелра жагъил адамли жикъи бирхъусири. Илдазивад цали хІекъли къугъали бучІахъес балуси урибси уста сайри.

КъацІлабиубли гІергъи, «Набзи чагъана хІелугадав?» или сай СягІидли. Илизи итмадан музыкала ваяхІ бедили саби. ХІебалусини бяхъилихъалли зайхІебикІуси аккордеон балусила някъбазиб хІекъли жагали бучІуси саби.

СягІидли жикъи буцили, илала хъарличирад удидяхІ къакъгъарли тІулби хІяршдарили сай. Илини мурталра илгъуна бирусири жикъи някълизи касиб-хІели. Жагали зайбухъи ца декІарси тІама дурабулхъусири.

Ил тІамала аргъибхІели, мекъла вегІ хапли гІелавяхІ шуряхъили сай. ИлхІейс гъайбатси далайла тІамара зайбухъи саби. Мекъличибти лебилра ил шайчи шурбяхъиб. Мекъла агълула дяхІ-някъ шаладиуб ва дила юлдаш СягІид алавуцили мява бариб.

– БегІ гъалав иличи саиб мекъла вегІ, разили гъинчІяхъили. Мекъличи жибарибти музыкантуни хІякъули, мекъ батхІебулхъухІели уили сай ил хумарли кайзурси ва музыкантуни лябкъуси гъуйчи хІерикІуси.

Илала гІергъи зайдухъи сари мекъличир далуйти, демжурли сари делхъани. Илав гъарли-марли ватухъи сай мекъла хужаим ва мекъла лебилра агълу.

БакІес чесибти музыкантуни хІебакІили саби.

Булугунала мекъла куй бакІахъили сай цІухтакан СягІидли. Илди гІергъила бархІира, илис гІергъиси бархІира хъули арбукъяхъес батурли ахІен мекъла вегІли.

ХІерая, гъалмагъуни, сегъуна цІакъ буилил жагали дяхъибти музыкала.

Нушала гъаннала чІинкІиргани биалли музыка, делхъ, далай, разидешла анцІбукъуни бунагълизи халдирули саби. Нуша-адамти акІахъубтира ГІямру разили ва шадли деркІахъес. Амма...



## РАСУЛЛИЧИЛА

Калмыкуназив хала буклуй узуси замана опыт гЕбасахъес или районна жакънала хIункърала лебилра халабукIуни дукибтири «Западный» бикIуси шилизисовхозла, Лавашала шилизивадси Багъауддин бикIуси хала букIа хъарахълизи. Ил шилис гъанна бикIули саби «Бого -чонос» Каломыкунала мезли «Бого-чонос» – ибси «халал бецI» ибси саби.

Опыт гЕбасахъили гЕргъи, нуша шилизи ардукира. Илабси клублизиб Давыд Никитич Кугультиновличил гъунибаъни бетерхес гIягIнисири. Клубла зал гарчли бицIилри букIуна ва шила халкъли. Давыд ва цархIилти адамти гъайбухъи гЕргъи, Кугультиновли багъахъур суалти хъардаэс дигута кагъарлизи делкIи гес дирудая, нуни жавабти лугас или.

ПяхIцад адамта суалтачилти кагъурти дедиб, илдала лугIилизиб – нунира. Дила суал сабри Расул ХIямзатовличил бегI гъалав хIу секъяйдали тянишиубрив ибси.

Лебталалра суалтас Давыдли жавабти дедиб. Дила суал жаваб хIегили балтулив или гъанбикиб наб. Ил замана ил викIар: кали саби ца суал, бегIлара гЕргъиси. Иш суаллизиб ахIи, цализибалра белкIунсила у аги. Ишизиб леб. Ил белкIи саби «ВатIан» колхозла хала букIун М Къаратовли. Асубиралли, айзурли дигахъаси, лебтазилра чеахъес.

Ну айзурра. Заллизибти набчибяхI шурбухъун. ГIур ну кайира.

М. Къаратовла суал наб лебтачибалра гIяхIбизур, ил багъандан батурсири ахирличиб жаваб бедес. Илини дила суал ахъли белчIун ва жаваб гиб.

– Дагъистайзив Расул бикIуси урибси поэт левни балусири. Амма наб иличил тянишиэс бикибси ахIен. Москвализиб писательтала Союзлизиб совещание бетерхес гIягIнисири. Ила жагъил поэт нура живарибсири. Москва гостиницализиб наб хIериахъес хъали чебаахъиб. КIел кровать лерри илар. Ца чилирил буцилри. КIиэсил наб чебаахъиб. Илав мерлавиубли камси бамсриихъес или геризурли левли, хъули ухIнаухъун ца мурул адам. Ну харчизурли айзурра, ил чи саял вагъурра чеибмадан. Ил Расул сайри. Илини нура вагъурра. Ил дила гъала тIашизур: «Салам, сын калмыцких степей!» – или набчи гъамиуб. Нура иличи тамашавиубли ва разивиубли гъамиубра, Расулличи хъябруцикира. «Салам, орёл Дагестанских гор» – или. Гъайгъайра, илар нуша дебали разидиубра, илар бегIла гъалар къаршидикниличи.

ИхтилатдикIули лерли, Расул гIяшиуб, кроватьла удибад чемодан дурасиб. Абхъиб, илар коньякла шишни лерри. Чемодан илди кадирхъес хасбарили барибсигъуна сабри. Ца гъалабал касилри, кIиэсил касили столличи кабибхъиб. ГIур чемодан сунела мерличи кабибхъиб. Чемоданнизиб 8 шишалис мер лебри. Ил анцIбукъ нуни мурталра хъумхIертис.

ХIера, коньякла шиша бержира, кадиили ихтилатдикIули. ХIера, гъалмагъ Къаратов, илкъяйда тянишиубсири ну урибси поэт Расулличил, – тамандариб илини ил анцIбукъличила гъай.

Клублизирад дурадулхъухIели илини ну сунела мякъла живарира, гъамли тянишдиубра ва илала гЕргъи урга-ургади къаршидиркира. Сунечи хъулира чуйнал живарира. Элистала почтампла мякълаб илис Кирсан Илюмжиновли барахъибси жагаси кIидерхIла юрт леб. Духъби-уркълазибадцун барибси. Дом-музей. Ил вебкIибхIели набзи багъахъур. ХIярирхъухIели нура деври хIябрачив.

# Повестъ

---



**Гяли-Асхляб  
МЯХИММАДОВ**

## КЪИСМАТ

...Тарих бала шимала, тулкни дучла Кьуръанна, табу сай дацти гъайла, – Табухъ, – буклун минала. Тутила бухъван велси сай Табухъ дурхІна-рурсба, хала дудеш биклуги бахъ ахІерти никлаба. БекІличир сирис-дяхІи диалра лямцІдиклули, аргъала шалали саб, савливан гъала хІебла...

– Ваши, черяхІдулхъехІе Шунудагъличи, икІа, икІабну дила уркІи, – викІар Табухъ арукес бурцули юлдашла някъ.

ЧеряхІдулхъула чеди, кагибихІи зубарти, байдиклугхІи вавначи чибара къабулданти... Чедиб зак – хъанцІа читла, удиб ши-Шушияла, шила чедиб шяхІрила цІуба кІана-дирихъла!

Кадиилра пачниван къалтинничу варакъла, аргъала кепбирули азир тІемли вавнала. Гъалар – хинкІи ва гъаруш, уркІбала къутІ ва лехІдеш, иш жагадеш, балгундеш, азадеш ва амъурдеш!..

– Хабар бура хІейкІадив? ЛехІахъи хабарличи, бачабархеси уркІи, – викІар Табухъ, хІяршбалли муцІурличибад даки.

\* \* \*

...Шунудагъла шулгІибси Шушияла шилизиб шала аги, шинкъяван цІяблири дураб дуги. Шабшила къукъригъунти заб каркулри шиличи, шила шулгІиб балгунси жагаси шараличи.

ЛямцІла гІярчумаг чегиб цІяйхъбухъи вацІализи, тят къицІбарибси къяйда хур гербухъун бяхІлизи.

Къукъули уркІаибти, лямцІли гъанкІ бемцІахъурти шанти шишбухъун хапли, дурабяхІ хІербиклули, цІали игул галгала цІачиран чебиули.

ИлхІейс аргъ шалабиуб, забла къири кІунбацІиб, цІа кадатурси шайчи шанти къалабабикиб.

Ила раэс хІерирар Шанданхъала Шагъризат, шишим-децІли руцили, чарх бячунси, иш шалал дунъя, жявилл жагъаннаб бетаурси, чинар сарил, се сарил сунени хІебалуси...

\* \* \*

Халараиб цайли ца, урцали ва цуръали, бегти бигубли цали.

Аги херъэси гъамси, аги вакеси херси. Херкариулри сарил, сарли хъа рухнар халал. Хъу бузахъи бегтала мулклис гелаб калунси, хъула сабухъ-гябала исусилис бирцули. Бигубси юрт балбариб, бегтас целдуби катун. Багъуди касес имкан бакхлебаклиб пакъирла, багъуди хлебиалра, гякълу лебри мадарла.

Шила халкъли гибратлис гъар даим рурусири, шантала рурсби-ургар куц-бекла жагасири.

Дигай дихьибти бири иличи чумра жагъил, жалбикли саби-ургаб, урклибазиб бихули хул. Амма илдазив аги цалра шагъ, Шагърис дигул, шяхри бацла шалали шяхледареси хулби, цуэрила цакъ дугъба хлеберцахъеси урки, клилалра марти дигай делсахъеси-луклукли. Шагъризатла хясибли, ва, гякълу хисабли, чеввиклири гъалавал Шамил – Шагъидла урши.

– Кабулрики, жан рурси, къадарличи Аллагъла, кабулхерикадли ху, дирар гямру балагъла, – тиладиличил раши сукникъяна Рашидат, раклиб чуйна азбарлаб цумдирули цадехи мез:

– Шугяб бизнесмен сайгу, шала сай Шушияла, шел азир кигъала вег, Шунудагъ дубурла вег... Херрируд алжайзирван, тьп пачала рурсиван, мургъилизир, маслизир куртрикуд шараларван... Херризи, хед дархьибти чедаа савгъатуни: клел клана-никлалайла, чянкли-бялчун махмурла, уркли уркли ахенну, нургъби сари зубрала, кулеха ва тулека – сари хъула зурхябла... Хера, ишар арцра лер – дубху-дубхути лерил... долларти ва евроби-чебаа бекла халал. Нешла узи Нуруллагъ сай депутат Думала, кайибси бегла чеди мас-хазнала дубурла. Дудеш даража ахил хяким сай удив халал... Жан рурси, кабулрики шери рукъес ху илис, лехмайхъудну сунечи, пяхли буахъен илбис! Клел хъунул бихусини рихуну хябъэсира, Шамил вати, жан рурси, агара я хед геси, жагъли виалра илцад, ахенну хяздохъеси...

– Хела хурматбирули, нешван ху чериули, гъархели лехихъулра, Рашидат-неш, ну хечи. Вецина гъалабра бурра, гурра бурулра: хези хейги наб Шугяб, я мас, дила дев саби – къулбас!.. Дила Берхи сай Шамил.

\* \* \*

Дуклума даршибтиван чибара кабулданна, арцур Шагъри лесличи Шунудагъла дубурла. Илав шударш шамличил дуки вашулри Шамил, дурзам сабри Шугябла, агарил селра камил. Хябал дус виубси ил калунсири цайли ца, неш-дудеш алхунхели, чегили машина ца.

Вецину гехра дусличив батурли дурхнала юрт, ваклибсири шилизи жагъкайубси Шамил-нарт.

– Дус хянчи бара, къучагъ, лугас шуцали кигъа, илди диалли цахнаб гяхлибарар хела аги, тьякъаркабиклар сагъли илхели хела анкъи.

...Кигъми дицадли гур дус арц дирар гялам-балам. Линклидихъули хулби, лимклидихъули клунтби, гурдаван силтирухъи, ляхъаван ляхкучухъи, макрула шайтанничил, мукукрар илбисличил арукибсири Шамил Шугябли дубурличи... Декларбарес дигули жагъти хъунул ва мурул.

... Бара жагъриубхели, жанай вававан хлебла, жайзир дургъесдахили дигайла ца алкунти, гяшикъриуб, гяширла дугъби дару дарили, Шунуда-

гъла лесличи дукъби гъаман ихъули. Шагъид дудешла урши, шалал бацгъуна Шамил, шалалис гъунивии ил Шалдагъуна Шагърис. Шам мукъри думхІяхъули арзила сагализир, карцІайла цІа алкахъи хІилизир, биркІунтазир. КІел къаралди цадири вава-къарла къалтийчир, кІел уркІи цаван дучІи чатІнала чугурличир...

Чебиути илди барх-чибара вавни ва къар, чубки чирхъдизахъурли, хІердикІар, гъакІардикІар, уруздиубли цахІнар, цацахІели гІяшдирар, цацахІели ахъдирар, цаличи ца ласдирар. Вавнира къарра – алав, вавнала варакъ – гъалар, варакъла тІем бихути къабулданти алавчар.

\* \* \*

... Хамдешли къагъварибси, харидешли вагъурси, хункар пача сайсиван сайри ШугІяб шилизир, шала сайра викулри, шараб сайра викулри, шушиланги лебил бирчис-исис викулри.

– Шарра наб хІеракІеси агара хъунул-дабри, тІамадара ацІили Шунудагъла бекІличи, бусягІят музабулхъан чумал хъунул итсегІят. Рати, урши, хІякъуси, Шагъри-нуша хІейгуси, бугагину бекІлизиб гІякълу гІяхІдеш дигуси. Гъанна багъхІебагъалли, бала кІинайс, некІубал, хІугъуна мурул-гъабза, хІугъуна мурул-кабиз хІергни, умцІалра Кавказ, – рикІулри сукникъяна, чардирули мас-хазна

– Илизиб ахІен анцІбукъ, сукникъяна Рашидат, анцІбукъ саб иш дила дев – чаркабарни итсегІят. Ну мучлахІерни саби Шагърила ил баркъуди, илис жаваб хІегасли ну ШугІяб сайрав гъатІи?

\* \* \*

... БархІи ахъили, бархІехъ бетакъибхІели шала, шихъла бац улкухІели, гербухъи бара хІилхІи, кІел къаралди кадацІиб дубурличирад уди.

– Къиянбулхъули саби гъанна наб икІ лаг ихъес. Гъари иша някъ биха, дигалли сабаб багъес, – Шагърини Шамилла някъ гъамбариб каниличи, – дигайла ва карцІайла алкунси ламиличи.

– Агъ! – дурабушиб хапли, Шамилли даргъарухъи, – марли рикІулрив, гъари?! – КІапІруциб гаргарухъи. — Дила БерхІи, дила Бац, дила мургъи-арцІа лац! ЖягІяйс дус диркутину ну букІунна вягІдалис, дярхъ-гІяялаб мер ибга наб гибти шам-хІиндалис.

«... Дукудая диъбани, лугъули шам-хІиндаби, дукудая хинкІани» бикІули чус гІелабад гІергъи башуси дяхІцІи цІябдешлизиб бетакъиб. ЦІудара шай-тІанрив ил, шишим-анцІкъи дихуси, цІябдешла илбисрив ил адамтас вай дигуси?

... Шагъри шилизи кили, байрарили ратурли, Шамил Шунудагъличи, дуцІухъун мазаличи. Лесла унабулхІличи ветакъхІевхъи левалли, серил хапли пІянкъбухъун.

– Улас, се анцІбукъара? Авкъяшанна аварав? Яра-а, яра-а... кІикъяшан хъулки барес вакІилив? – УркІухъунси Шамилли дуцІли ахъиб лесла хъинж, къуш бяхъибихІиб лебси хахамбариб буркъа хунж. Хунж бацІлири, бугаги бухІнаб лебси пІянкъбикІан, я дурзам хъарбарибси угаги никІа букІун. ДуцІикІули лаг-катхІел, дуахъун дурзамла къел, вявикІули, ургъули, буахъун уркІила хІял... ИлхІейс аргъ шалабиуб, шалалис ШугІяб вакІиб.

– Гъу, сейкІуда, дугІрухъ хя?! Чинаба дила дурзам?! – Ябуличивад кацІиб, гІярчумагли гъакІбариб.

– ХІебалас... Ишаб сабри-и... ил-л...

– Ишаб бурги, агара! ХІу леври, хІенкъ агара! Нурби-къими дицили ахъ-

ри-мага бириду? – ШугІябли витІакили чІярхъбухъахъун гІярчумаг.

ГІур аскІур кІел къаралди, хуриван багъдиубти, цали итил ца гъакІли агарварес хІядурти. Убиили калунти, бакІиб лампа ушканти, пяхъхІебикІару илаб Шамил витахъес кибти?

– Уцаяну дугІрухъ хя, гъамарая хъинжличи, лигубани бицІибси шурухъахъес хунжличи! Гъу, чинара иш дигул, ШугІяб чи саял хІелул, чебиахъис бусягІят ишав вегІбекІ чи саял!

Урчила къакъличибад убяхІасиб бергараг, Шагъри рухІна рергурси цІуба харала гавлаг.

Чераили Шагъри-бац, някъби гІела дигъунси. Шамил тямхъухъун хапли, гъаялизивад ухъун, авличи гушси бецІван ШугІябличи ветухъун.

Уциб ШугІяб, гервариб, гералиуб башниван, ГІур ахъуциб някъбачив чякала пухІялаван.

– Чевверхи, хІериубра, цІакъ аги къаршидешлис, къаравашуни кили, гужбариб ну цІахарарес, – Шагърила хІулбазирад гердухъунти нургъбани Шамил вергур левилра. ШугІяб шалкІувли, дуцІли лесла дубличи ваиб, «гъанна хІяйванти, нажас!» или, уди тІяхІухъун. Шамил тІяхІухъунихІи Шагъри дуцІли сараиб, «ХІу агарил иш дунъя хІейги, Шамил!» – рикІули, къадализи тІяхІрухъун.

\* \* \*

– ВяхІ, бебкІибу хІябалра? – викІула Табухълизи, уркІи бачабархили, ахъили пІапІруслизи.

– КІел бебкІиб, бугагину къаркълумазиб сагъси мер, кІел калун-ца адамла байбну уркІецІи, хІер.

– КІел бебкІили, кІел калес секъяйдали бирути, кабикибти къадала хІябал ахІенрив гъатІи?

\* \* \*

...Мурхъ къадала шайубси ВерхІе гІянжила бехІкад гъуни леб ца ябулис, агарси кІел гъункъялис. Ил гъуникад дуцІлири цайси мурда гъалавяхІ, мекъличи унра шилан тІалабварес Чугур-МяхІ. Чинадрил чебихуси цІумла тІама аргъили, мурда тІашизур хапли, анцІбукъ багъес дигули. ЧяхІ-чяхІила чедибси къаркъала кІабатІличир лерсиванбизур илис рехъуб-рургІябси адам... Адамличи мешудеш баргес хІейри чилилра. ГІур гъатІира тамаша – Къудратла вегІли гибси! Мурдани хапбарили касиб нешра виштІалра, хъумартурли мекъличи жиирул Чугур-МяхІра. Урчи дуцІбариб хъярхъли, сай хІерирул махъила.

\* \* \*

– ГІур-гІур... се бетаура? Калун бургар мицІирли? – ГъалакикІулри Табухъ ахир багъес дигули.

– Ге, юлдаш, хІу вархълири-калун кІелра мицІирли, къадар илгъуна бурги-батур саби Аллагъли.

СагъхІериуб Шагъри-неш, дагъриличи хІеракІиб.

Урши левни хІебагъур, нешличи хъямвашалра, неш чераргъи викІули, дусмадли хІерикІалра...

– Урши леву мицІирли?

– Ге, юлдаш, мицІирли сай. Ит урши – хІера, иш ну... – Табухъ айзур, къунзухъун, шилизивяхІ хІеризур. – Чедаа ихди хІябри. ХІябрачир хІябал цІелда: ца цІелда-Шагъри-нешла, цархІил-Шамил- дудешла, хІябъэсил цІелда адли-илра дила дудешла-ну варгисси, вихІибси-ВалкІахъала ГІисала.

## ХІЯРГА

### Назмуван кархьурси роман

...ДяхІила чаба саби дубургачиб СирхІяла, дяхІиличир кьел сари цайси гьункья ХІяргала. Дех агара илала гІелахъес я хьусбяхъес виьхІейубну шел дусли дураб мас-хазна бучес. Дех барари пикруми лер илала бекІлизир.

– Вашулри ил гьалавяхІ, ласхІяхъили гІелавяхІ. Гьалабрину сунела ши, сай акІубси Арзи.

Шурличи сай саайчи, дядла аргъиб гІелабад, тІамали уркІаибси сай витІакІиб гьалавад.

«Хаммэр»-халал машина гьалабад шалгІеббухъун, тІамали бяхІлизибад пухъ-дяхІи хІусбухъахъун. Цайси гьункья чехІетур, цайли дай гьуйчив ватур... «Чина кьалабасира, чичи гьалакли вара? Сайрира ил дила шан яра унра дурашан?..Чи виалра, велкьунси хІяким тайпала ургар, хІейалри илцад хьярхъли хІебикІахъи хІула гер.

\* \* \*

ХІера, иш ши-Арзила: алав хІяри вавнала, чедиб зак зубартала, кьяшла дякъ зурхІябтала, кьани-берхІила, бацла! Ишав халаваиб ил, умхІули мукьараван, гьаваличиб азадси закла пача-чІакаван. Ишаб белчІун школа, багьудилис мадарла. Дудеш-Даудла ГІяли сайри минала букІун, михикІ дугьбала уста, мажлисла убза-ута. Дурхъаси идбагла у – МяхІяммад бихъиб илис, «Урши акІуб, неш ребкІиб, уршилис гІямру, жан гиб!» – Илкьяйда викІусири шила шантази дудеш, алкьухІели сунени ругагарли мякьлар неш, – «Кьадар илгъуна бурги Разиятла кьутІкьуси»

– Кьадарличи Аллагъла жаляхъес чилра хІейрар, жалхІяхъили ууси инсан жагали вирар, – викІусири гьархІели дудеш МяхІяммадлизи, неш чинара викІули, ахъибхІели симкьлизи.-Нешлис хІела шайзибад бегІла халаси хІурмат саби, урши, хІуни иш бурибси бузахъадли: илбислис виргІямайруд, умцІализив увмаркуд, ибсилис гІергъи машуд.

\* \* \*

«... Агъ, хІябра ветахъири кьалли хІу, дила урши, хІерикІули ил хІечи, диршилрав шуйна арши?»

Баласри хІу левси мер иш дунъяла кьакъличиб, гьуни ихъаси хІечи вашули кьукьубачив .Шинна кІантІрил гьумлизиб, кІантІбухъи бетихъуси, савлила марка сайрил берхІилиуб бицІуси?.. Улас, хІу чинаврира: чиллала аргъли-зиврив, кихъяли, чарх битили, чирагъагар мерлаврив? Чинав виадра, хІела мер багъахъа, жан урши, кьяшмани хІейхаслира ихъисну хьарши-хьарши!.. Виадли дяхІилиув-бархІили хІечи виус, виадли дяхІцІилиув – цІуэрван хІечи салхъас. Бурагу, багъахъагу, жан урши, чинав сайрил, хІу айкьурил дудешла кадерхайчи гІямру-хІял!..

– Дудеш, дуде-ш-ш... льякьулра, хІера, ишавра, ишав!.. – Бисализив, чІяр-лизив, чарх игути цІализив чеваргъиб ХІярга хапли, хІяя-рухІлизив хьипІли. Муэрлизив вакІибси дудеш чезс умцІули.

Гъаннацун ахІенри ил муэртазив чейуси, мякълав левсиван гъаман лякъбирличи кайруси. Аммаки имкан аги дудеш левихІи ваэс, Тайгализив къ-иянси къадарлири хІериеэ. Арцес дуклуми аги, азаддешлис арц аги, къяшми дигъунси мегъла рахарж бердес цаъкъ аги...

– Дудеш, дудеш, ахІерси, дудеш, дила дурхъаси!.. – СимкъикІуси ХІяргани шилизи буциб гъуни.

\* \* \*

...Шаладиркулри бара, Шалда билшулри хІилхІи, шилизибад иргъулри айгъир урчила хІихІи. ХІерикІалли, гъунила дубличир гІячихъти къел, илди къел ардякъири иха, къадала, катхІел. ДуцІухъун сай удивяхІ, каркули ва алзули, чебси гІяба чеббатес хъапІни, ири ирзули.

Каили хІерикІалли, баягъи «Хаммэр» ихаб: къакъ-удиб, хІулри- чедир, каб-жибти, чердикибти мегъла бутІни-къадалар... «Иш бикан сейубара, мицІирли калунара? Эй, уртахъ, хІу чинавлив, мицІирлирив, ахІенрив?!...»

Угъ-гъ- агъ-гъла тІама чехиб иргъуси курлабадван, ХІярга алав жургъухъун, миъличиб жинжирагъван.

– Агъ, ишавлив?.. Варгири... Агъ, талихІ, – мицІирлири... ИкІад иша кай-кили, Аллагъли верцахъилри... Дячун-дургІубти лерил сагъдирар лига-къякъя.

\* \* \*

ВемхІурси ва вясунси, къибкъриаурси хІила, гъункъя чеили лебил шанти дуцІбухъун гъала. Къакъличи гІелахъибсиарзиб, хъули арухиб, хІялагарли кайкибси ХІярга ила арукиб.

\* \* \*

...Ванаси ухъализир даткадухъи биркІанти, цІумхІейкІули дяхъи-хъас гъу-никад чеаскІурти, ускаун ишав ХІярга, бакІили гъанкІлис ярга. Амма гъанкІли гъанкІ ахІен, хІуруцІли хІуруцІ ахІен; байхъу – гъанкІ, байхъу – хІуруцІ...

... – Дила армакидая, наб хъулив ватирая... ГІярмия хІеберкІалра, къиянни саб итира, – тиладили-бусравли башулри цабехІ шанти, шила диванханала жибарибхІели жагъти. – Гаша бубкІахъу итаб, каш бедлуга цурала, бибхІили чаркабиру арадешла, цулбала... ВатІан лебу батахъес – белтІунси лигагъуна? ВатІай луган се лебу – пенсиягу писгъуна?..

\* \* \*

... Оймякон – дунъяла дуб, дяхІи-дугІбала дуруб... Ила баахъес поезд баз байхъала дуцІбиру.

Михъирлизи ургиван атІаллири цІикІси дягІ, къакъла чІалализибад ду-рабирки лигатІякъ. Тударибти шутрала къимкъя бетари миъла, сартиван жагъилтала биркІунти миг-урцулла. СирхІян уршилис ишаб, жагъаннабла ужагълаб, къадар белкІири кІел дус ВатІайс къуллукъ барахъес.

Дубуртазив даргала дебш касибси хІяргала, дяхІи-дугІбала балагъ хІеба-лаллири нагагъ, мажяхІят вииши ил ишав хІериеэ кІел дус, ветаурну сайгъ-унтас гъарахълив гъавкъяна – пурс!

Илис сабри бархтани уличи чебатурли «ХІярга-Мага» ируси, яра у бархъ-батурли, «ХІярга» – къантІли ируси.

\* \* \*

«...Ит нушала бяхИцани хЕд тй баркьибгу бяхИца, хУ вакИибХейс аб-  
злизиб дузаб сархес биэси... Исбатхъала ГЯлини мекъ бариб батбухъунси,  
илгъуна, дила урши, хЕдра бирехЕ сагъси...

«КІабатІ» хІябгила чеди биршули саб антенна, ил барибмад гъайдикЕс  
кумек леб телефонна...»

Шилизирти хабурти дурхъусири дудешли, кагъар сабиусири иша кЕл-хІя-  
бал базли...

ХЕра, ардякъун кЕл дус, агъ, хІябилра дигІун хъус, ... ХЕра, гъанна  
азадли, хъули ваэс гъалакли, мегъла гъуйчиб поездли гІамадарайчи хЕрли.

\* \* \*

– Сержант Даудов, хЕзи жиа викІар полковник, – буйрухъ хиб рядовойли.

– ЛехИзи, сержант, набчи хЕд гІяхІси гІякълуличи... Дубуртази хУ карцІти  
укъядли «Хаммэр»-личив, разихЕйрару дудеш хЕла баркьудиличи? Вирар,  
нура вираси, дила урши агара. Иш депутатли хЕчи хъарбиру пулан хІянчи,  
хІуни ил бетикахъа хЕласун ахирличи... Арц саса, «Хаммэр» аса, варъалис  
къулса буца, кІибуркІхЕйкУли бекІлил, дусла алапа каса... ХЕбла шала ди-  
кайчи хЕбашар иша поезд.

– Нуни барес гІягІниси хІянчи сегъуна сабив?

– Мерличи даибХели, чебиид, яхІбара, – иб

ХІярга дура арякъун, хъулибти сабил калун. Ил минут чинад сабрил шел  
жагъил дакУбиуб, хІисаб-суал агарли, ХІярга уциб, дикахъиб. Уару ХІяр-  
га-декІар увли илдала бяхълис?

Шел минутли лайбакІиб шелра жагъил цагъакІли.

– Нуни асира ХІярга, – викІар депутат хапли. – Абхъа дурабяхІ улкъай,  
сабину гъава хъипли.

– Нуни вицира ХІярга, – викІар «полковник» ахъли, – хЕра, иша кабихъа  
арцла наб къачІа хъярхъли...

Улкъайлабад дигІянни хЕрбикІутири илди, ХІяргачи гъирбарили хІяя  
агар шел къачагъ.

– ХЕра, документуни, дурав хЕрли ХІяргара, гъатІи дила дурести чизилра  
дугагара. Нуни хъули вархъира, хІуни хЕд дигулвара.

«Вицес, асес хІяйванрав, адам сайни хЕлулрав? ХІушала вяшатІала нуни  
далхЕдалулрав? ХЕрдикІехЕ чили чи вирцул, исул, нясани, чили чи гІем-  
чикІахъул агъу дархти хясали?» – Улкъайувси ХІяргани дакъиб хъулибтала  
гъай.

...ГІяйниб, дураб, бемжурли саб шантала ихтилат, сен сабил хъарбиули  
хъулибтала хІякъикъат.

– Саби-ургаб мешути, кЕл кІантІгъунти маркала, узбигъунтигу илди ца  
нешла, ца дудешла, – бикІулри жагъил наслу.

Ца музала гЕлабад дакУбиуб вертолет, бебшахъили биштІати, уркІаили  
махлукъат. Сайдилавла хъулрала гъала, гъуйчи кабииб, кабацІибти тухтурти  
хъули дуцІли абацІиб. Байхъу сягІятла гЕргъи, зягІипти абатурли, бетахъиб  
гав датурли...

– Муслиматра аррукиб, пакъир, нушала тухтур, чебаила зягІипти сагъли  
гъигъ атХЕбатур... Районна хІякимличи зангъдяхъибтири нуни, кумекии  
викІули, жагъилти бубкУлину, – дурабтачил ихтилат бемжахъур Сайдилавл.



– ХІуша се дикІадалра, кІилизивад цаибил, баягъи ляжиличиб бушкъубси хІянала вегІ, хІябилра мешуикиб наб нушала шанничи, ит Даудла ГІялила ахІмакъ МяхІяммадличи, – ихтилатла авидла гъамиуб Гутан-ХІяжи, берцІибси гІяб ишхъули, гІябли бирцІули ляжи.

– Эй, ит виэс вирару, ветахъибси, агарси, шел дус гІур сунечила балуси бугагарси? – бикІулри цахІнаб шанти.

\* \* \*

– Чумал бархІила гІергъи алзан дяхъурбала вегІ, дягІира къиянтира чесилину дахъал дегІ. Къаркъала иш гъабзала саби марли шанданна, чехІебалта сунени бибгІян-хъяшси изала. Ишил уршила аги ахІен гъеч гапбареси, агарану чархлизиб лига сагъли калунси. Аллагъла уркІецІили ва ишала къайгъили мицІирли калахъи сай.

ГъайикІуси тухтурла аргъили гъайла тІама, ахъиуб ХІярга хапли, ибкъдизахъурли туми. Айзесухъун, къардухъун, тухтургани чевуциб, сагали койкаличи, сунела мерла каркъиб.

«Дудеш-ш, дудеш-ш, ляхкъулра...» – шивкІивбариб илини, ляжиличибси хІяна шинкІабариб нургъбани. Аргъала детахъили, паргъаткайуб сагали, гъанбикли арукили, калунихІи... гъарахъли.

\* \* \*

... – ВирхІес балулри гІяхІил, дигахъис наб хІугъунти, хункІла цІакъра леб сагъси, хала къякъла бяхъгъуна... Дила чеу «Питон» саб, къяна ахІен, нунира чумилра гІянчІбакІили, бячунра абзаначиб... ХІу наб «Депутат» викІен, нуни ибсира бирен.

– Питон-Депутатрив хІу? Белики хІелхъа ургуд. ХІуни хІела чІумадеш наб чедаахъес къасу? ХІела ил къас биалли, ваши, бази бирехІе.

ГІергъила бархІи, савли, цалабикиб махлукъат, чидил чедииркурал багъес лебил хІякъикъат. Цалабикибти сабри давла-масли белкъунти, тІуйзи тІул хІябяхъили, эркинни хІербиранти.

– ХІера, иш мегъла тІакъа, тІаликъгъуна, къакъаси, мегъла тІакъалав адам – къаркъайзивад къуватси.

Ил чеили хъатдяхъиб хІербикІес бакІибтани, хІулби линкІдикІесаиб байхъу гъаргти рурсбани.

– Китайлантала ургав чемпион хункІ чІумаси, хункІ бяхъили хІябдусан жиндрар бугъа бубкІахъан, хІушала гъалав хІера, Юу Ую – шанхайлан.

Хъатра шятІра дархдикиб, алавла мицІирбиуб, ургадирахълис кархъути долларти имцІадиуб.

– ХІера, хІед ишав ХІярга вяхІес баибси ярга.

ГІяргІни-ургав дагъаван хамли къикъимикІули, чебулхъуси бугъала лишанти вяшдарили, савхъун китайлан хапли, ХІярга вячІес дигули. КІел дубура чегили, зерзербариб алавла, цахІнаб кабикиб кІелра. Чедивсили удивси уцилри вай тІимкълизи, мегълагъунти някъбани гІянд бигъи къакъарлизи. Чедив шанхайлан сайри тІимкъличи шурухъунси, удив дубурлан сайри гъигълис гъуни гІекІибси. Удивси хІерикІулри дурадиркул хІулбачил, чейулри пишяхъили «Питон» дукелцІиличил. Ласдарили кІелра къяш чедивсила хъябличи, ил валкІахъун хІулаван, зузвариб ванзаличи. Серил тІякъбухъун хапли, тІимкъ арзиб, ХІярга айзур, гІур, даргъухъи, геризур.

Мегъла тІакъала дуцІли чумал жагъил абацІиб, шанхайланна жаназа тІакъалабад дурасиб. Чарбиубли сабухъи, чегахъиб ХІяргас цІакъели, биркІан вѣшбаресалра ахъри агарси хІекъели.

– Ватирая викулра, ил дилану бусягІят, – мегъла тІакъала ацІиб илав «Питон-Депутат». – Бурирав далтас или хІела рухІлизир хІерзи, айзи гъанна вирадли, иша набчи хІеризи!

ХІерцаллира къяшмани, хІейраллира хІерикІес, ХІярга айзур, тІашизур, тѣп лесла бехІван кайзур. ХІили руркІути хІулба чехІебиъни балули, «Питон» дигІяй, багълали къакъла гІела вегѣиб, вершаниван ХІяргала хъантІализи бикахъиб. ГІур дяхъиб дулекІлизи.

Таргъаван увверхурли, «Питонна» някъбазивад, ванцІухъун, къяш чегибси ухъахъун аргъайзивад.

ХІяргазивад ухъахъи хІялагарси Депутат, къаравашуна дяхъиб ХІяргас лебил чебухъи.

– ЛайвакІая ухили тайгала гушти буцІас! Яра ведая иткъи китѣилантас савгъатлис, суд биру сунес бархъси чула Юу кавшнилис, – буйрухъбариб «Питонни», дяхъи бигъи катанни...

\* \* \*

Кѣхси гъанбикли ХІярга тІатІухъахъун сагадан. Илар палатализи арацІиб хъунул адам, сарухъи уммайвариб ХІярга, виштІал хъяшаван. «Дила рухІ, уркІила цІум, дила хІи, дила БерхІи, бакІиб къанни биалра, наб хІу варгибси бархІи!» – рисули цІумрикІули, аргъайзирад рулхъули, хІял гъалакли, хІер къагъли, сари пакъир ил хІекъели.

ХІякъикъат хІебалули, чи сарил хІералули, хІяккайзурли сай ХІярга, гъайэс агарли ахъри.

«ХІила узи верцахъес Аллагъли дуцІарибси, нешла дяхІ чедахъес къисматли чарарибси...» – Муслиматли сар нургъба ХІяргала дяхІ ицули, дяхъубазирти някъби ХІяргала байдирули.

– ХІу рикІуси ... ну – у хІергус... – дурабушиб ХІяргани.

– ХІу сайри...гІе, хІу сайри – кІилизан узбала ца.

\* \* \*

... – Дила, рузи, Муслимат, къисмат саби къутІкъуси... Къудратла вегІ Аллагъли бунагъкар наб белкІунси... ГІямру кадерхурли сар, балулра ил ашкарли, ишбархІи яра жягІял аркура ну Аллагъли, – рикІар тухтур ГІяшура, бакІибхІели гъаббакІес Муслиматра уршира. – Ракла изай руцилра, бурхІни сари калунти, дурахъес кариигу дила лерил дигІянти...

Гъанбиркуру ит дуги?.. ХІела кІилизан уршби акІубси жумягІ дуги? Дила бунагъкар дуги...

Ит дуги... арзишилан ребкІиб жагъси Разият, канилавал вебкІибси касирану виштІал нарт...

Висур илала мурул, чяхІикІули нургъбани, хІебалули бареси, къяржикІули цулбани... Дила уркІецидухъун, рисусири нура рарх, зерзердирули децІли аргъала ва лебил чарх. Илбисли гъиррарира, шайтІай риргІяриргира, ит дуги нуни набчи халал бунагъ чесира...

«Сен висурли, рикІулра, урши левгу мицІирли, вебкІиб рикІули хъалли, уилину уцІарли... КІилизантазивад ца ведира илис урши.

\* \* \*

...ХІякьухІели урши ша, биубли кьисмат верша, дудеш ГІялини вецІна чедидяхъиб шагъар, ши. ХІякимтази делкІахъун кагъурти ита-иша, хІяду-рикІули укъес ита, гъарахъли, таша.

Гур тамашала кагъар бакІиб иличи хапли, кайкахъили сай, пакъир, ин-сультли гъала хилтІли.

«ХІушала урши ХІярга, (ХІярга бухъи, чеди МяхІяммад чебатурли), ВагІайс кьуллукъ барили, гІебшил хъули вархъира. Чинав саял, се саял нушани хІебалехІе, багъес имкан бакІалли, сагадан балахъехІе» – белкІири кагъарлизи. Илала гІергъи ГІяли гур атхІейзур кьяшмачи, чумал жумягІла гІергъи арухиб ил хІябрази...

\* \* \*

... Муслиматла анцІкьи-децІ сагакадиуб гурра, ламартбиубли хІярхІя, кавшиб мурул Гусманра. Гусман сайри бизнесмен – шагъарла хъулри лушан, гур кІинайс арцла бегІгас илди багъалис дирцан. Яшав лебри баари, яраш сархесра вири, уркІби дерхІибти кьясти алавчарти буалри. «Арц диха, пай лебсину нушалара илдазиб, хІегадли балагъ лябкъян хІела хъалибаргличи», – гъала-гъала илкьяйда зангъ дашахъи хІяжурта, мутІигІхІейрни багъурну, жан кьябаиб мажурта...

Урши левихІи иша, Арзи шила янаша, ракІибсири Муслимат батурли шагъар, яшав. Ишаб багъур ветахъни, урши шилизив агни, ил айкъурси, вяркъурси ГІяли гъалавал вебкІни.

«Ветахъес пухІял саю, вацІес дяхІила пису, гъигъ лебалли хІекІили хІе-рирули уусив?» – ПикририкІи Муслимат, сунези сари ругъи, «Ма, арбуха, цІуэри, цІябихІи дила уркІи, цІябдеш вершадиубли, леввиэсну чеввалкІи. ХІейалри, чарулхъи ша, хІяна нешла янаша. Ма, ардуха цІуэри, цІа лерихІи цІуб сирус, ма, ардуха, цІуэри, цІум бикъуйхІи дукелцІи, цайли цІум-цІум-микІули, леввиэсну цІуръали. ХІейалри чарулхъи ша, чаргаслан тазиличив... хІяна нешла янаша...

КІилизанта итил – Камил, камси агарил, дудешла хІянчи-гъуни хъуцІру-мачи чесибил, ит дуги неш чераэ шилизи хъулухъунил, къадарли къадализи къаркъаван гературил. Ил верцахъес Аллагъли кибсири ХІярга-узи.

\* \* \*

... Дубагарси Тайгала, дай агарси гъаргала, лайвакІибси ХІяргала, берка-лари лигала, галгуби дирхъянтала гІела-гъала декала. Вигъунсири рахажли, ахІенрину сай ражли, кибсирину уцили вайберхунала гужли. ВацІа бирхъ-янти сабри китаиланти сакІубти. Ишаб илди Тайгала вегІбекІунигъунтири, дирхъули Китаилзи галгуби ардихулри. Гажала мерличиври ишав ХІярга вихІуси, ца гъямхІейкІни ахІенси аги селра бехІсурси. ДяхІиличи игъубси синкала гулиличир дуркІусири дугурби, гъандиркули дубурти. Дугурбазив чейули дубуртазивси дудеш, чІумадикІи биркІанти кайсули шанданна дебш.

«Сеннира ляхкъяс, дудеш, бихІен хІуни арадеш, дирхІедирисну нуни ишди буцІас ляхъадеш. Рахажлизив виасра, дяхІили дяхІра ицис, дяхІила шахІриличир дехІбалара дирис». Сунези сай гъайикІи, дяхІилизи хатІ лукІи, дудешличи дархъесван кІапІилизи черлукІи.

Ита-иша бирхъуси шанда рахажла ца дуб, ца дуги хІярхІбиубли, бул берди-ли къяббердиб. Дяхъибти галгубала дехчерти машинтала цализиб хІясиббиуб галга, умха бягуси. Ил умхала кайили вебшиб илавад ХІярга, верцес багалабиуб вацІала бухъна галга. Гъуни лебихІи ваиб, гъава кункли гъигъбариб, гъарбизличи вирхули, гъаладяхІ гунзри кацІиб...

... Аргъайчи чарухъун ил къушлизив мешебейла, тІемли гІемчикІахъули, ташкІила гІяхІти чяйла.

– «ГІемч бакІалли рухІ дулхІан» – бурала леб илгъуна, – викІар мякъла кайибси ухъна тяп дудешгъуна. – ХІера, ишди чяй держа, сарину изайс дарман, рухІлисра биркІантасра чарбиру чули алжан... Валлагъ, уртахъ, мегъ-шанда уилригу хІу убза, някъбани кІел хъунцІбар бецІ гІянддакІибси гІяхІгъабза...

Таманни сагъиайчи ХІярга вихІиб ухънани тяп, дудешван угъули духути гІякълумани.

– Балулра, хІед дигулри чеббицІес вай хІяжуртас. БикІулигу, бархъси саб: чеббицІни саби бунагъ. ХІу вицибти, асибти саби илбисла узби.

Аллагъли танбихІ биру илдас жагъанаблизиб, хІед талихІ гъарбилзахъу ишхІелла гІямрулизиб...

\* \* \*

... ХІярга айзур, хІеризур, – дураб савли – шаласи, дай уркІилаб рурцІули, – децІла урги-бижгурси. Бусули саб зягІипти, никІабиван паргъатли, хІера, итав ит Камил, катай алавварили. БехІ гумлачив вашули, гъигъ булан гІашаили, ХІярга ила гъамиуб, хІусси-юргъан балбариб. Камилла дяхІла сурат хІерли касиб, тІатІизур, тяп дяхІимцІа гъалавван сай сунечи вякъизур. ЦадехІ дяхІ, цадехІ хІулби, цадехІ нудби дирсибти.

– Дудешличи укаба, Камил дудеш дигулра, – тІама чехиб виштІалла, удибад улкъайтала...

«Набра дигулра дила дурхъал дудеш кІапІуцес, дудешла хъяблис-алав велси хъяшаван усес» – Улкъайлавад таргъаван ХІярга дура тІяхІухъун.

*(Хъарахъуд бирар)*



## Очерк

---

**Къасум-Бег  
МИГЪРАБОВ**



### **ВАТІАЙС ВА АДАМТАС ГІАХІДЕШУНИ ДИРУЛИ**

Тамай декларти, чІянкІли нушачицун хаста гІядатуні дузахути сарра нуша – дагъистанланти. ГІядат хІебуэс багъандан, яра ил гІядатличи хъарахъили, илала тІалабла шухІярилизибси баркъуди дураберкІес багъандан, закон булъулра. МягІничебси ахІен или къуллукъла такъсир бирулра, гъачам яра кІина барнили барсбируси агара или.

Ил ца хІерлис лебгІеб биштІаси, хІятта пикрилра бяхІчихІеалра асубирусигу эси масъайчила нуни гъай дехІдихъибси чуйнара нунира «такъсир» барибхІели сайра. Ге, сегъунтилра ташмишдеш дакІухІедарили, хІела баркъуди халкълира, хІятта тарихлира балли, марбарести авторгала белкІани кахІедерхахъурли издательствола тематикала планнизи, бара гъалавван лукІес вехІихъибсила яра бучІантани дурадухъунти жузачил валусила кабурхахъира. Илди гІеббуцес дигули, ил баркъудили илди гъирачеббиру или пикриикІули. Ил баркъудили илдазир тІалабкардешра, гъирара, учІанна гъалар жавабкардешра алкІахъу или.

Гъарли-марли илкъяйда биэсра гІягІниси саби – ца жузличибад итил жузличичи кайцІуси ганз тІалабкардешла къадри-къимат аргъили, цархІил чІалаличи ахъиъни гІячихъли багъесли бучІантанира, ил багъардеш къабулбирадлира, ил даражаличил хІу гъачамлис баришли хІейъни уркІили балули узадли. Амма хІякъикъат ургІебсила уббулхъути чумра анцІбукъ диуб. Гъарилли-деклар иргъхІергъи сунени я устадешла я пагъмула шайчиб гъалабяхІ ганз кацІили хІейъни.

Я хІуни барибси гІяхІдеш аргъхІергъили, я сегъуналра насихІятличи сунела хІяжатдеш агни иргъахъули, машгъурси уставан чІумали гъайикІули ил чейухІели, агъ, сецад пашманирарал ну! Севан набчи ну гъимуркІирал!

Ге, илдигъунти сарра нуша, чичилра мешухІедикили, нуша дегІси дунъялизир хІердирути. ГІур ил хатІа тикрархІебарес гъай гилихъалли, чачумал ванати тиладила дев ва уркІецибарести пикруми аргъхибхІели, гъар секІал хъумкартурли, сагали хатІа тикрарбирути.

Илбагъандан дурадухъун нушала литературализи сари дурадухънили чІянкІли лугІицун имцІабарибти жузи! Я рухІла, я мезла, я дардси-далайла, я декІси дунъяла дяхІ вирхаэсли сипатхІедирути тугъи кІапІрази минадиубли, цІуба кагъар бугути жузи!

Илдала мерличир биалли цархІилти диэс дири. Даргала халкъла мухІлила, Батирайла, ГІябдуллахІяжила, ГІяхІмадха, Амир Гъазила, ХІябиб ГІялиевла, Газим-Бег БяхІяндовла, Салимат Исраповала, Хамис Маллаевала ва цархІилтала.

Илди пикруми гъар замана дашар набзи. Гъаннара, ишди нуни гъанбушибтала жузи дуракайули виаслира. СенахІенну гуждан литературализи гъудурбикІути, саби агарли литература хІебузниличи ну вирхаахъес дигути я камбирули ахІен, я илдала чула пагъмула ахъси даражаличила пикри баралра хІярхІбиубли ахІен. Се биру? Илгъуна саби литературала гІямрула ва культурала дунъя. Мурталра паргъатдеш хІебалуси, даим умцІуси, сезаманалра гъалабахІ башула или пикрибикІуси.

Амма, хІела дунъя тамай анар-ханарбиубли, хІу тамай цархІил даражала хІяйчи виркахъуси аги алкІулира бирар. Бирар хІу тІатІулхъахъули ва хІела пикруми-баркъудлумала дунъя гъанни хІед децІигахъули. Гъайгъайра, хІу ил даражаличи виркахъуси, цархІил хІед чедихІяртли тянишси адамла дунъялизив узуси адамличила багъадли саби. Илала тІабигІятличила, уркІила дунъяличила ва адаб-хІяяли дицІибти баркъудлумачила багъурхІели.

Илгъуна хІяйчи викира ну гъалавван, наб хабарра агарли, ца адамла гІямрулизир чисалра гъанхІедикести анцІбукълуми диубти диъни аргъибхІели, сарира авцІали дус гъалар кадикибти мягІничерти, дунъяла улкнала политикунни, хІятта гІядатла адамтира, пикрибухъахъунти анцІбукълуми кадикибхІели:

1979 ибил дус. Афганистан. НДПА-ла бекІ, улкала президент НурмухІяммад Тараки кавшили, илала мер вице-президент ХІяпизулла Аминни буцилри. Амма нушани, Советский Союзла халкъли иличила балуси аги. (Чи вебкІалра яра агарваралра, итхІели имцІаливан лукІули бири: «ВахъхІи декІли зягІипикили Гергъи, хабарагарли, заманалис гъалав гІямрулизивад арякъун...») или. Яра: «УркІи вайтІа бузесбяхІили, хабар агарли шалгІевухъун...». Бири ишгъуна багъахънира кабирхъули: «ВатІа гъалабси дурхъаси чебла чебихъули, игитла бекІали алхун...»). Гъайгъайра, КГБ-ли гъар секІайчила балулри, илбагъандан илаб бузути, Ю.В. Андроповла бекІдешлиубти жавабла хІянчизарти гъанкІ агарти дугурби, бамсри агарти бурхІни дуркІули пикрумазибри, сенахІенну дин-исламла вакилтани замана-замана гъужумти дирули, чябхъинти дурадуркІули, НДПА-ла вакилти кабуршулри, правительстволочи къаршитала лугІи имцІабикІулри, гІярмиялизиб къуллукъбирути камкабикІулри. Саби Афганиста халкъла-демократ партияла къяяназибти ургабра къуллукълуми багъандан бижгурдеш сабри.

1978 ибил дуслу апрельличиб бетаурси революцияли итхІелла бекІ Дауд увяхІушибсири. Таракилис Гергъи НДПА-ла лугІилизив Бабрак Кармаль кІиибил сайри. Амма Афганиста оборонала министр Амин сайри. Илини Тараки вирхаахъурсири партияла бегІла чихъти къуллукълумачибти, революция дурабуркІухІели Таракила мякълабти хІяракатчиби хІянчурбачибад убкасили, мер-мерличи гъахІябяхъялли, улкалис гъуни чебиахъес илди диргалабулхъан или. Илбагъандан НурмахІяммад Таракили, Аминничи лехІахъили, Бабрак Кармаль Чехословакиялизи, Нур – Англиялизи, Анахита

Ротебзак – Югославиялизи посолти барили бархъиб, Кештманд, Халил, Рафи ва гЯхИцад цархИлти – Пули-Чархи бикГуси туснакълизи. ЧЯнкИли Гул Ака сайри верцес виубси. Ил дигЯникибсири ва посолти барили бархъибтачил илини бархбас даимбарибсири.

Аминни Тараки президентла «Таж-Бек» КЯлгЯлизив бегЛа чевяхИси пачас алкИлахъути шуртИри гЯрдилахъули, тЯп, бикГуливан, «хъатлавван» хЯериусири. Амма илав, «нерхлизиб нусиван», Тараки вахъИи кахИелун. Гялала-гялала сентябрь базличив Аминни ил туснакъла катур, гГур биалли машрикъла политикуначи хасти илбисти гЯмулти дарили, «чархИелхъуси архЯяличи» вархъиб.

Советское правительствотоли, гяйгяйра, гяр секИайчила балулри, сенахИенну президентла кумекчибала къуллукъуначиб КГБ-ла хЯнчизарти бузулри, хЯтга хурег бирути балли. Илала дурабад, правительствотолис бегЛа хЯейгуси гЯрмиялизибси анарханардеш ва НДПА-ла хГурмат бетихъни сабри. Ил бижгурдешли якъинни ахИенти цакъанази улкала ари бикести шуртИри алкИлахъули. Илди СССР-личи къаршидеш дирниличира сегъунтилра ташмишдеш аги. Илала дурабадра, КГБ-лис якъинбиуб урегцали ибти дусмазиб ЦРУ-ла жасусуначил Аминна бархбас биубли калниличила. Илала эмиссарта биалли ил бархбас гяанна гятИира уржахъили даимбарилри Америкала департаментлизибти чихъти къуллукъуначибтачил.

Гяр шайчибад кабизурли лебси ибкъси аги хЯербарили, бегЛа чихъси даражаличиб хГукму дурасибсири Амин «увкасес» ва илала мерличи СССР-личи лехИхъуси адам катес. Ил сайри Чехословакиялизивси Афганиста посол Б. Кармаль. Ил Андроповли гЯвурцусири.

1979 ибил дусли ноябрьличив Аминни Советский Союзла посол А.М. Пузанов варсварахъес дигни багъяхурхИели, Андроповлира Д.Ф.Устиновлира пикрибариб, гЯлайзи архИебухили, хасти цакъани пайдаладарили ил «увяхГушес».

ДуцГрум хасли хЯдурбарибти офицртазибад «Зенит» бикГуси вецЛал адамлизибад цалабикибси къукъя полковник Бояриновла бекИдешлиуб Кабуллизи бакИибсири.

Пикрибарибси бетерхахъеси кумекла шартИли урдухъун Советское правительствотоличи Афганистайс ва сунес кумекбарахъес или дархъибти Аминна дугъабизунира. Декабрь базличиб, «Зенитлис» гЯргъи Баграмлизи бакИиб ГРУ-ла хасти масъулти ирзуси, Средняя Азияла ва Кавказла республикабала вакилтазибад цалабикибси «Бусурмантала батальон». Илизиб 520 офицер лебри. Илди «бакИибтири» Амин ва илала кЯлгЯ «датахъес». Ила бархъибсири даршал адамлизибад цалабикибси десантникунала ротара. Лебилра – 660 адам. «Таж-Бек» балтахъулри кИел азирлим хЯядаршцад адамли.

Ишаб, хасти операцияби дурадуркИути нушала офицртачила хабар гИашаили, наб бурес дигулра «бусурмантала къукъялизивси» ца кубачилан гяабзаличила.

Ил сайри, сайра 1951 ибил дуслизив акИубси Мисриханов Мисрихан Шапиевич.

Школа белчи гЯргъи илини 1974 ибил дуслизиб Москвала энергетикала институтла элетроэнергетикала факультет таманбариб ва Москвала Пачалихъла университетла вычислительная математикала ва кибернетикала факультетлизи керхур. Багъуди касиб илини Ивановола энергетикала институтлизибра. Дахъал гЯмру хИедеркИили виалра, ил чумал санигЯт касибси специалист

сайри: инженер-математик, електроенергетикала системабала инженер; инженер-кибернетик. Учлуклели самбола шайчив СССР-ла спортла мастерра ветаур. Илбагъандан сайри, ил 1979 ибил дуслизив бара 28 дус виубси жагъил «мягИничебси операция» дурабурклуклели ВагИай живарибси...

Итхлели Советунала улкала лебилра халкъ пикрибиклуклели нушала гЯрмия Афганистайзи бухИнакаъни чараагардеш сабри или. Цагъаклели чумал мягИни-черти масъала арзес багъандан кацИибси ганз саби или: югла шайчирти нушала улкала дазурбас урехи хЛебиахъни; Афганистан нушала улка гЛеббурцуси улка бетаахъни; узиси улкала халкълис кумекбарни; Афганна правительствола тилади бартахъули, илис кумекличи музабухъни.

Ге, имцИаливан газетабала бяхИянази итхлели луклуклели илди пикруми сарри, теле-радиобазирад дурутира, гъайгъайра, илди пикруми сарри. ИшбархИи нушани балулра, ил ганз нушала улкала Правительствола хатла биъни, сенахИенну вецИну хИябра азирличирра имцИали нушала бургъантала жаназа цинкла къунбазир ВагИайзи хибтири.

Бурес чебиркур, илгъуна мягИничебси, зурба баркъудили чИянкИли балагъуни, нургъби ва дардани ахИи, селра хИехиб викИнира бархъли хЛебургар, сенахИенну ит манзилла бетуцлизир дергъла-тактикала, сагати ярагъла хИялумцИнила ва нушала улкала хаста подразделениебала устадеш имцИа ва дугадиубтири, хИятта илди лерилра нуни гъандушибти далилти багъандан ца адамла гИямрура къурбандарес гИягИнидеш агарсири, (Къ. М.), сенкИун адамла гИямруличиб дурхъаси селра агара.

Ца гъатИи секИайчила: 40-50 ибти дусмазир Америкали ва СССР-ли атомла ва водородла бомбаби даргаили, гъарил улкали цализи цали аргъахъибсири сари датахъести шуртИри гъарилли акИахъниличила.

Баягъи илди дусмазиб нушала гИялимтас якъинбиубсири Памирла дубуртазиб уран лебни. Ил секИал Америкала разведкалира багъурсири. Илдачи гъуни биалли Афгайзибад ва Таджикистайзибад сабри. НАТО-лис дигулри Исламабадлизива ила, дубуртар Бадахшайзи гъуни кабердес. Афганистан чузиб биалри, ила гъуни гъаргбирулри.

Илдигъунти баянти дихИулри нушала специалистуна чула дигИянати папкабазир. Халкълис, хИятта бургъантасра илди дагъес гИягИнидеш аги. Я далахъути ахИенри, хИятта чихъти къуллукъуначибти военныйтазира.

Илди дигИяндешуни гИур сарри гъаргдиубти, Ельцинни нушала улкала дигИяндешуни Западлис гъаргдарибхлели. ИшбархИи ит 1979 ибил дула декабрь базла гъану верхИраличиб нушала хаста подразделениебани дураберкИибси операция институназиб, хИекъси мисалван чебаахъеси, лерилра спецподразделениебала уставтази гИибрат касесван ва специалистуни руркъухлели илдас гИур сабигъуна хЛебиэси гИяширван кабирхъули саби.

Ил операцияла у сабри «Шторм-333». Бурес чебиркур, декабрьла 15-личив Амин кавшес барибси чябхъинни селра хибси ахИенри. Ил ва илала къамлизи-вадси контрозведкала бекИ Асадулла Амин бяхъибтири... Асадулла, операция барили гИергъи самолётличив Москвализи арухибсири. Баграмлизив хИерси Бабрак Кармалра Ферганализи чарварибсири.

Ил бархИил, сегъуналра мугълат хИегили, Баграмлизибси бусурмантала батальонс буйрухъбарибсири «урегцИали километрла дуцИ» дураберкИахъес ва Кабуллизир «Таж-Бек» кИялгИяличи дяхИчитти къазармабази мерлабиахъес. Илкъяйда барра барибсири. Амин вирхусири ил бусурмантала батальон



сай валтахънила ва ахІервирнила далдуцуни гъатІира чІумадарес бархъибси биъниличи.

Бурес чебиркур, «Шторм-333» батальоннизибти бургъанти къияндешуни чекасес бирути биъниличила, 450-500 метрла гъарахъли иртес цІябдешлизибра вяхъибкІес балути биъни. ИтхІели бегІла бурибси «Шилка» пулеметра илдани бузахъес дебали устадешличил балусири.

Нуни дила иш белкІла ца мерличиб гъанбушира ил устадешличил дураберкІибси гъужумличила. Гъанна биалли дигулра ил гъужумлизир бутІакъяндеш дарибси Кубачивадси Мисрихайчила бурес.

Ца далилли балли бурули саби ил адамла устадешличила, багъудиличила ва гъар шайчив хІядурси, сегъуна-дигара масъала арзес имкан лебси специалист виъниличила... Ил далил саби чІянкІли таджикуназибад, узбекуназибад, туркментазибад акІахъубси «бусурмантала батальойзи» ил дарган дурхІя керхахъни.

Мисрихайс иличила гъайикІес хІейгахъу. Илис селичилалра, сунечила гапла гъай хІейгахъу, илбагъандан наб дигулра хаслира иличила тІинтІли бурес.

Гъужум бехІибхъибсири цІябдешлизиб, бикІуливан, «бецІ мурулла дуги». Ила бархъайчи хІябал базра-сера дурадкеркІибти учениебани илди бургъантазир гІяхІти устадеш акІахъублири: цІябдешлизиб, гъярцІа къакъурбазиб, хъулразиб бургъес. Цалис цали кумекбирес, гІеббурцес ва вегІ улхули виалра, юлдаш уцахъес. Илди устадеш багаладиубтири ит дуги Таж-Бекла ца хъули бухІнабухъунти Мисрихайсра илала юлдаш Володя Карцевлисра. Цализи ца кахІебушахъес багъандан парольтира пикридарибтири: Яша – Миша. Урус мезли няс дирглумира далли дурутири гъужумчибани.

КІялгІяла кІибиб дерхІичибси ахъси бурхала бегІ ца хъулиб илди кІелра Аминна гвардеецуначил дяхІ-дыхІли къаршибикиб. Илди иртесбяхІибхІели, Карцевличил ил бяхІлици цІапІакес бекІиуб, гІур биалли, къисбарибси къарла чІиъван каркули, гъаваличив левалли, хІярхІуби чекъур. Кабикитгала гІелаб, хабарлизибван, цархІилти гвардеецунци дакІубирулри. Илдазивад цали илданчибяхІ граната игъуб. Мисриха бекІлизир сеннира верцес ибси пикриличил дарх, сунес ахІертгала сипатуни аргъайзирра гъаладизурли детахъиб.

Улкъайлици гъамси Мисрихай Володяла някъ чІумали бурцули сай ва, урус мезли «Держись» или вявъили, ишил някъли улкъайлизи бяхъили, сунечил варх арухили юлдашра, удивяхІ урцули сай. Спортла мастерла техника чархла къуват ва саркъибдеш лергІер багаладиуб илар илис.

ИшбархІи Карцев Узбекистайзив хІерирули сай ва Мисрихан илини сунела хІила узизи халирули сай.

«Нуша зурба ВатІа солдатунци сарри, – ирули вирар цацахІели Мисрихай, – итхІели нушани ВатІа гъалабси чебла чебихъулри ва чедибдешличил ахъесра диубра. АвцІали дус нуни иличила бурибси ахІен, юх, хатІаиркулра – хІябцІали дус селра ибси ахІен. БегІ гъалаб Афганистайзибад нушала бургъанти дураибхІейчирад гъал дус дикибхІели бурра...»

Мисрихай итар дурадкеркІибти гъабзадеш ва устадеш багаладиуб 1999 ибил дуслизиб Басаевла ва Хаттабла боевикуни Дагъистайчи чебухъунхІели. ИтхІелира илини жигарла бутІакъяндеш дарибтири илдани ясирбуцибти халкъ азадбатахъес.

Чуйнарил цархІилти мераначира вархъибсири ил, амма илди архІябачила илини селра бурули хІейрар, сенахІенну дигІяндешуни дихІес гІяхІил бала.

МяхІячкьалала 2006-ибил дусла августла 26. Редукторный поселок. Ак-Гельла шарала дуб. Ишаб бахьал халкъ учибикилри ит бархИи, сенахІенну урус учительниџас барибси памятник гьаргбирулри. Ил веџІал метрла ахьси жармала скульптура саби, сунезирра жагьил хьунул адам чериуси. Илала балуй някълизиб гьаргси жуз саби, алгьай – глобусличичи кабихьили саби. Ил урусла халкъли дагьистанлантас багьуди бедлугули, культураличи бегІбирули гІямру харждарибти бахьал хьунул адамтала бузери иргьахьуси ишарат саби. Ила, учительницала скульптураличи, кьаркъала ганзухьличивад айџІуси сай. Илала удиб МяхІячкьала шагьарла исторіяла музей саби.

Памятник гьаргбирнилис хасбарибси гьунибаъни ибхьули шагьарла мэр СягІид Амировли урусла халкъли Дагьистан гьалабахІ арбукъяхьес кабихьибси пайличила ва илдала кьайгьначила, хІятта 20-30 ибти дусмазир цацабехІтани чула гІямру кьурбандарниличилара буриб. Илав гьайухьун итхІелла Дагьиста президент Муху ГІялиевра.

Ил балбуџличичи вакІибси, итхІелли Федерацияла Советла спикерли сайси Сергей Мироновли иб: «Иш баркъуди Дагьиста халкъли инженертас, учительтас, агрономтас, тухтуртас чула шайзибадси баркалла багьахьнила лишан саби, чунира чула кьисматуни республикаличичил даимлис дигьунти. Дагьистанлантани илдала таваккаласи бузери хьумуртули ахІен ва ил хІякъикьат марбируси ишарат саби иш учительниџас барибси скульптура...»

Илаб гІяхІцад цархІилтира гьайбухьун. Илдала лугІилизиб ил проекта авторти ГІ. ГІямаров, Т. Капугина, А. ГІялимова. Гьайбухьунтани халаси баркалла багьахьур шагьарла мэрлис, скульпторлис, архитекторлис. Амма ил барахьес багьандан дахьалтигьунти харжани дарибси Мисриханов Мисрихайс илаб баркалла хІебагьахьур. Ил секІал барахьес сайра иштяхІли ахІен, ил. «Халкъли хІебагьалли ЧевяхІилли бала. Чили хІебагьаллира – халкълис пайда биху» – илдигьунти пикруми хаста сари илала тІабиГІятличичи.

ИлхІели Мисрихан Шапиевич Россияла ЕЭС-ла филиалли сабси МЭС-ла центрла генеральный директор сайри, суненира ил кьуллукьличичи айкайчи бузерила халаси ва тамашала аңџбукълумани биџІибси гьуни ахьибси.

БелчІуди таманбарибмад, илини бузери бехІбихьибсири Алма-Атала энергетикала ГІилму-ахтардила интитутлизиб. Гьала-гьала ГІилмула хІянчизарли. ГІур ил инженерли калун ва камси замана дикибхІели, ил бекІ инженерла кьуллукьличичи шуратур.

1977 ибил дусла май базличив Мисрихан шурухьун «Башкирэнергола» упрвениелизи. КІел дус дикила, нуни гьалабван буриливан, – Афгайзи. Бурес чебиркур ил «Таж-Бекличичи» гьужум бирухІели ил вяхьниличилара... Аравиубли, Дагьистайзи чарухьунхІели ил 1984 ибил дусличи бикайчи РЭУ «Дагэнерголизив» декІар-декІарти кьуллукьуначив узули калун: старший диспетчерли, ЦРС-ла начальникли. Ил дуслизив ил катур тІашбалтуси Миатлила ГЭС-ла начальникли, ГІур биалли – Ирганайла.

1987- ибил дулизив Мисрихан Шапиевич Чиркейла ГЭС-ла директорли катур ва ил кьуллукьличив калун 1997 ибил дусличи бикайчи. Ил дуслизив ил Северный Кавказла дархдяхьибти лерилра энергосистемабала бархбасла диспетчирскоела управлениела директорла цаибил заместительли узулри. Ца гьатІи дусли, 1998 ибил дуслизив, Мисрихан Пятигорсклизи «Россия РАО ЕЭС-ла», «Южэнергола» генеральный директорли – цазаманализив бекІ инженерли катур ва ил кьуллукьличив 2000-ибил дусла август баз бикайчи

узули калун. Ил базлизив РАО «ЕЭС Россия» МЭС-ла Централ Генеральный директорла къуллукъличи шуратур.

2010-ибил дуслизив ОАО «ФСК ЕЭС»-ла Правлениела председателъла советникла хІянчиличи шурухун.

Бурес дигулра, Мисрихан Шапиевичла гІилмулизирти гунзрачила ва ил шайчирти сархибдешуначилара. 2003 ибил дуслизив ил узули калун Иванова пачалихъла энергетикала университетла «Энергетикала системабазиб автоматикала управлениела» кафедрализив. 2010-ибил дуслизив технический гІилмуртала доктор ветаур ва баягъи ИПЭУ-ла профессорла у сархиб.

Мисрихановла бекІдешлиуб хІябал адам гІилмуртала кандидат ва шел доктор бетаур. Илдала санигІят ва бузерила бяхІчибиз сабри «Электростанцияби ва электроэнергетикала системаби».

ИшбархІи ил Москва энергетикала институтла кафедрала заведующий ва цазаманализир дурсери кадирхъули сай Ивановола энергетический институтлизир.

Илала адамтас, улкалис гІяхІдеш барес дигниличила, адам зугІяизи викибХели къалабали музаулхъуси виъниличила Кубачир, МяхІячкъалализир ва сай узути мераначир хабурти жявлил гІинтІдиубти сари. Сай акІубси шила мижит баресра илини харжани дариб, школа ва больница ремонтдарахъиб, хІябри къулайси агиличи душиб.

Илала бузерира чихъли къиматла бариб. 2007-ибил дуслизив ил «Россияла Федерацияла урибси хІянчизар» ветаур, «Дунъяла жамигІятуни информатизировать дирнилизирти сархибдешуни багъандан» бикІуси премияличил шабагъатлавариб, «Дагъиста урибси энергетикла» у сархиб, РАЕН-ла академикра сай ил.

Лер илала дахъал цархІилти шабагъатунира, амма бегІла илис ахІерси ва дурхъаси награда – адамтала дигила сари.

Бахълис тяништи сари илала ишди гъай: «Ну мурталра къайгъилизив вирус набзибад лябкъуси Россиялис барес!»

Илди гъай илала гІямрула бекІси къилли ва уркІилис буйрухъбикІуси жили детаурли сари. Гъайгъайра, илала къакъаси, паргъатдеш хІебалуси ва уркІицІичебси уркІили ва цазаманализиб ЧевяхІилли картІибси гІякъули илис паргъатти гІямру ва къисмат хІелугни якъинси саби. ЦархІилтани шел дусли бучІухІели, илини МЭИ хІябал дусли белчІун.

Бурес дигулра, чечентала кІиибти дявти тамандиубХели Мисрихай ил республикала энергетика мицІирбарес, илди гІягІниси даражаличи душес халаси хІянчи барниличила. Илала кумекличил дузесаиб Таджикиста ва Киргизияла республикабазир электростанцияби ва энергетикала системаби. ДелкІунти авдаршцад гІилмула хІянчи, шуцІалицад монография улкала энергетикала сурсатуни Гердуцес, илди иш манзиличи далдикили дузахъес лергер кумеклидиуб.

Афгайзирти дургъбазир ва илкъяйдали цархІилти мераначир бижгурдеш алкІухІели, къяйк-къуйкла анцІбукъуни камХейрухІели, илдазир бутІакъяндеш дарибти бургъанта акІахъубли бузули саби «Дергъла бутІакъянчибала узидеш» бикІуси жамигІятла организация.

Бурес чебиркур, ил ца ити гІядатла цалабик хІебиъниличила ва илизиб каберхурти леблра бутІакъянчибас илди хІябал дев, урус мезли клел – «Боевое братство» – гІядатла дугъби хІедиъниличила. Ил илдала хІербирнилис ва

даим адамтили калахъес жибикуси, буйрухъбикуси ва гѣббугъуси дурхъаси дунъя саби. Илдани чула адам къияндешлизив хѣлта, къанни-жявли хѣили, музабулхъан, Вагѣа хъарбаркъ чедибдешличил хъарарахъу, селрайчиб гъалаб Вагѣа ва чула хѣя гъалар чедиу. Илдала умудеш гъанни жанра ахѣрхѣйру.

«Адам-энергия» бикуси халаси статья кабяхъиб иличила «Единая сеть» бикуси энергетикунала газетализи, Мисрихан 60 дус виубхѣли. Хѣра, се бурибал иличила ОАО «ФСК ЕС»-ла правлениела председатель Олег Бударгинни: «Хѣурматла Мисрихан Шапиевич! Мурталра-деклар ца адамла журугси юбилей гѣямурузиб сай юбилярлисра ва илкъяйдали бахъал цархѣилтасра мягѣничебси анѣбукъли убулхъули хѣбирар. Союзла ва Россияла энергетикалис харждарибти гѣямура хѣла веѣлани дусмала манзиллизив хѣу илгъунали увухъади хѣчил бархли бузутас ва хѣрбирутас, хѣла гѣямура дурсри гъар бархли кайсутас».

Чевяхѣси Леонардо да Винчини ибсири: «Талихѣ биуси лебгѣб бузути адамтас саби». Талихѣ, сунези гѣямура устадеш, гъарбизуни, юлдашунала ва барх бузутала ва ученикунала хѣурмат, гъамтала диги.

Нушани балулра, илдигъунти сархибдешуни диэс дирни чѣянкѣли умсхѣмсули узусила, сунела бузериличи иштяхѣсили ва даим сагасилигѣив умѣули, сунела устадешра гъаладяхѣ дикуюли, илдачил цархѣилтира бегѣбирусилицун.

Хѣлацун юбилей ахѣен иш! Ил саби хѣла хъалибарглара. Хѣу пергер дудеш сайри, илбагъандан бегѣла чихъти гѣибратуначиб руркъулри хѣла дурхѣни ва дурхѣнала дурхѣни.

Арадеш, разидеш, хъалибарглис талихѣ булгулра нуша ФСК-ла Правлениели хѣед ва хѣед дигутас!»

Илдигъунти ванати мубаракла гъай илис дуриб илкъяйдали Югла МЭС-ла генеральный директор Ф. А. Дьяковли, Западная Сибирьла МЭС-ла генеральный директор С. В. Стрельцовли, Сибирьла МЭС-ла генеральный директор С.М. Зильберманни, Востокла МЭС-ла генеральный директор С. Г. Смирновли, Волгала МЭС-ла генеральный директор Е. Н. Жуйховли, МЭИ-ла профессор Ю. Н. Балаковли, Центрла МЭС-ла генеральный директор В. И. Садуновли, Уралла МЭС-ла генеральный директор Г. А. Никитинни, Северо-Западла МЭС-ла генеральный директор В.В. Ачеели.

Цауркѣли арадеш ва талихѣ булгули илдазивад гъарилли марбирулри Мисрихан Шапиевич Россияла энергетикала хѣяракатчи, илала гъавкъяна, умсхѣмсуси хѣялумѣлан ва умути адаб-хѣяяла адам виъни.

Гъарли-марли талихѣчевси адамла къисмат саби ил.

Тяп сайван адабчебти абикъур гѣямура рархкъя Галина Мефодьевначил Мисрихай дурхѣнира: урши Александр ва рурси Эльвира. Илдани гѣямурузир саби бегѣти гъундури чердикѣили сари. Александрли халадудеш Шапила гъуни чеббикѣили, мургъи-арѣла бизнеслизи ахъили сай, рурси Эльвирани «Жагадешла салон» абхъили, хъунул адамти талихѣчеббирули сари.


Илгъуна гѣямура гъуни ахъили сай ва ил гъуни даимбарили, иштяхѣличил ва гъирачевли, Вагѣайс ва адамтас гѣяхѣдешуни дирнилизиб талихѣ баргили узули сай гъарли-марси дубурлан, пергер дарган гъабза, кубачивадси Мисрихан.

Дерхъаб хѣла хъура гѣямура, сенахѣенну хѣушагъунтачи хъарси саби иш дунъяла балгундешра дунъяла адамтала паргъатдешра.

# Фольклор

---

**МяхІяммад  
ТАХСУРМАНОВ**



## САБУРЛА ВА САХАВАТДЕШЛА КЪАДРИ

*Буили саби, лебли саби дудешра илала уриши Самадра. Илдала неш вабаъла изайзирад ребкИли сари.*

*Илдала 500 маза дуили сари. Дуки дикули хІердирули.*

*Мазала хІенкъ дусличи-дус халабикІули саби. Самадла дудеш сахаватси уили сай.*

*Илдачи зумали гІяхІли баши. ГІяхІял вакІалра, илини маза лугъули уили сай. Буки гІергъи калунти лерилра диъби гІяхІяйс хъули чарулхъухІели савгъатлис кадирхъули уили сай.*

*Илкъяйда гъар вакІибсилис мазара лугъули, калунти савгъатлисра кадирхъули уили сай.*

*Заманала гІеркъадешли, Самадла дудеш изесеяИли сай. Уриши къакъа-вакІили,*

*дудешличи дугъаизурли сай:*

*– Дудеш, хІу агарли нуни се бирусира? Секъяйда хІерирусира?*

*Дудеш викІули сай:*

*– Дила уриши, иш нуни се бирули уирал, хІунира иш нуни бирусии бирен.*

*ГІяхІцадхІи изули кали, дудеш вебкІили сай. ДурхІя цункавхъи, шишим-ан-цІкъили уцили сай.*

*Дудеш вебкІили хъалли, Самадличира гъаман гІяхІли башули саби. Уришили дудешла аманат бетурхахъули сай.*

*Дудешли къяйда, чи вакІалра, мазара лугъули сай, аркъухІели гІелар калунти диъбира кадирхъули сай.*

*Ил сахаватдешила гІяламат чебиуси Алагъли ил уришиличи Жабраил малаик вархъили сай:*

*– Дурдибти палтарра чегъурли, гІямалагарси мискинна гІердарили, ил*

уршиличи вякѝ сай. Самадли вакѝбси гѝяхѝяйс лебал лебси маза белгѝ сай.  
Аркъухѝели гѝелар калунти диѝбира илала хунѝжази кадихѝили сай.

Жабраил малаик урилизи викѝули сай:

– Ну малаик сайра Аллагѝли хѝечи вархѝибси. Бура, хѝела урклѝилис се дигулил  
хѝела мурад бирисну.

Урши викѝули сай:

– Или биалли, наб ихтияр га се гѝяхѝсил унра-хунрализи, тухумлизи хѝар-  
бисну. Малаикли урилис пурбанбарили сай.

Урили ца давлачевси адамлизи хѝарбаили сай, се гѝяхѝсира или. Ил викѝули  
сай:

– Хѝяй абдал, маза-мас, мургѝи-арѝ, жагати хѝалиѝла тиладидарадри.

Давлачевла насихѝят урилис гѝяхѝбизурли ахѝен.

Урши, дахѝал далуси, дахѝал делчѝунси гѝялим ухѝначи арякѝ сай. Сунела  
мурад бурили сай. Ухѝнала насихѝят гѝяхѝбизурли, малаиклизи наб «сабурчерси  
хѝунул рикахѝа» или сай.

– Агѝ, сунела мухѝли берѝ, ил хѝези бурибсила: иш дунѝяличир ца саригу  
илгѝуна лерси.

Амма Аллагѝла ибси хѝебарес малаиклизиб ихтияр аги.

Баягѝи ил рурси шерс редлугули, мекѝ буили саби.

Аллагѝла ахѝрила халадешли, илдала ургар мез кадикахѝили, бяхѝяхѝили,  
мекѝ бетхѝеахѝурли саби.

Жабраил малаикли магѝарра дихѝахѝили, ил рурси урилис шерс редили  
сари. Сагали хѝаллабиубти яшав барес пикрибухѝи саби.

Ил хѝунул адамли мазала балализибад някѝишли белкѝунси жагаси кѝалтин  
беришли сари. Гѝатѝи сунечиб жагаси хѝебиалра, илцадра адамла хѝяздухѝ-  
если жагаси.

Ил муруйзи рикѝули сари:

– Базарличи укѝенну, иш кѝалтин биѝили, гѝяхѝси жинсла кѝял аса. Кѝяй-  
зибад баркат халаси саби: ниѝ луга, кѝачни диркѝу. Илкѝяйдали хѝердирехѝе.

Ца бархѝи урши кѝалтин биѝес базарличи арякѝ сай. Дахѝал арира дедили,  
хѝямбарили кѝалтин асили саби.

Хѝяйвантала базарличив кѝяйѝкавхѝи, урили гѝяхѝси жинсла кѝял чеб-  
бикѝили сай.

Кѝялра лебкули сайра лѝвкъухѝели, илис ца бугѝала вегѝ мурул гѝевваили сай.

– Эѝ, кѝя вегѝ, бехѝсурбарагу ил кѝял иш дила бугѝалис, бахѝ набра дила  
хѝунуѝсра гѝяхѝбизурси унрала кѝял сабину ил.

Илала мурад барили, Самадли бугѝалис кѝял бехѝсурбарили сай.

Гѝяхѝцад гѝуни ахѝибхѝели, илди гѝункѝябас урчила мурда гѝевваили сай.

– Эѝ, урши, бахѝ наб гулабарес дигули хѝебикибси сабину ил бугѝа, иш дила  
урчилис бехѝсурбарагу.

Урили илалара мурад барили, бехѝсурбарили сай.

Цакамси замана дикили гѝергѝи, урилис кѝяшми изули вашес хѝейрусѝи  
ухѝна кѝаршишѝили сай.

Илинира урилизи тиладибарили сай:

– Дила ишиди келра пухъла глежни ахленси хлед геси агара. Ишиди глежнас бехІсурбарагу урчи. Глежнас урчи бехІсурбарили сай.

ХъайгІи ветас камси гъуни калунхІели, илис глеввали сай ца цІудхъран.

– Эй, урши, наб дебали гІягІнилигу илди пухъла глежни, бухари къапІалис дарсдарагу? Уршили бухари къапІалис глежнира дедили сай. Иличил бархти гъункъяби илизи бикІули саби:

– Се саби хІуни бируси? ХІела хъунуй валтусири в хІу, хІуни дирути секІал дагъалли?!

– Валлагъирагу, ца дубхІейхъу. Нуни барибсиличи разили руар.

ХІебиалли ваши ишгъуна вягІда бирехІену:

– Нагагъладан хІела хъунуй хІечил къалмакъар хІедаралли, ишиди валрумира валрумачи чедихъибти духбира нушани хІед лугехІе. Нагагъладан, хІечи рехІризалли, хІела хъулрира, хъулибси масра, хъунула нушаб гесли.

– Къабуллира, – викІули сай урши.

Шила мякълаб хІеркІ буили саби. ХІеркІличи ши ужес гІяшиубхІели, Самадла къапІа кабикили, хІеркІли арбухили саби.

Гъункъяби уршилис гъалаб илала хъули абацІили саби. ГІур Самад ухІна-ахъили сай.

– ВамсхІемсуррив, дила мурул? Къял асирив?...

Муруй лерилра сунес детауртачила бурибхІели, лехІахъили руули сари. КъапІа кабикили хІеркІли арбухиб ибхІели:

– Гъу, дила мурул, хІу архІевхни игъбар саби. ГІурра се-биалра пикрибирехІе. Нушала насиб камхІебирар, – рикІули сари.

Датурли валрумира валрумачирти духбира, гІяхІли, абизурли, дубхІехъили арбякъи саби.

ХІера, сегъунал сабурла ахир.





**Гяйша КЪУРБАНОВА**

### **БАГЪИРАБИ**

Диштга дурхІна балхуси, балхуцад цѣрхъбикІуси.  
ХІяридрихъбхІели, дузес дехІдирхъути.  
ХІябал тййла ца ургъур, ургъурличиб – тІалхІяна.  
Бугаси саби – дис ахІен, къутІбикІес бала – къякъ ахІен.  
НигІматли бициб хъулиб азир узи бузули, берхІи гъаббакІибмад  
гІяярличи башули.  
Даим урцар, ванзаличи кахІедиръур, гъала-гъала сари шинни дужар,  
гІур чули цархІилти дужахъу.  
Янилизир – ванзала удир, дуцІрум – ванзала чедир.  
Курлаб бяхІгъабли бусан, къакъгъабли дурабулхъан.  
Къяшми ванзализир, чарх ванзала чедиб, дурхІни жибжиркадухъи,  
пишдирхъур гъаваличир.  
Ванзализиб мурхъ хъали, нигІматли парчбикІуси, улкъайларад дакІибти  
унзаларад дуртІуси.  
Шиндахъси саби – урхъу ахІен, шинишбирар – ургуба ахІен.  
ЛихІи – умха, бяхІ – бугал.  
БерхІи ахъайчи бусан, дугели гІяхІладбашан.  
СавлихІели – гъаббикІан, дугели дигІянбиркан.  
БукІун вашна барх башан, ил тІашилзна тІашбилзан, бугІярхІели  
хІергІяхъан, забхІели – шинкІахІейран.  
БугІярхІели чІянкІбиран, хІебхІели палтар челгъан.  
Шинни къидабарибти кІел узи даршубиран.  
КатдяхІ – мурдали, хъярхъли, лагдяхІ – дацІли ва хъусли.  
Дурублаван бехІ бугаси, исбагылаван чарх кегІебси, гІяббасиван бекІ  
журугси.  
Базли бахалли, цѣрхъси, хІебахалли – чІукъаси.  
ДицІалли, илди дашар, дацІдаралли, хІедашар.  
Чарх – журуга, кани – умха.  
МехІурсила, азгынна хъулиб минахІебиран.  
ГІягІнихІели, пІакъбикІан, ахІенхІели – бусалгъан.  
Шин агарси мерличиб хІербиэс бирхІебиран.



Духути адамти сунечи гъуцџси, цархџилти мицџир жайс гъанра агарси.  
 Дикалли гџяргџни дуган, хџейкалли вацна бурцан.  
 Къярдаличиб хџебуар, тапван гербикџес бирар, камсилра къутџбарадли,  
 ил шинни тџутџубикџар.  
 Урхџ бухџнахџебухџахџес урца чарх ибкъаили унзала гџелаб бусан.  
 Алавла – кам, камла бухџнаб – варџа, варџала бухџнаб – уркџи, уркџила  
 духџнар – дурхџни, сагал сабухџ бакџахџес гџянџилизи кархути.  
 Кункси саби – пухџяла ахџен, журугси саби – тџяп ахџен, дуклума агара,  
 урцес дигахџу.  
 Мурдали шадиб башан, хџурали къяш кахџейцџан.  
 Илди гъанна цџа ахџен, гавла гулумти ахџен, сецад пусдикџаллира, илди  
 гџянџира ахџен.  
 Алавла мегџла, кани цџала, дарг-махра къакџруми сар цџудара магџила.  
 Сунечи челхџуси чилра хџейрар, амма саби чичи-дигара, селичи-дигара  
 чебулхџан.  
 Адам вашалли, башар, ил кайалли, кабирар, цџябхџели пяхџили булџан,  
 шалахџели чарбулхџан.  
 Дахџал цулби леркъи «бугес хџебиран».  
 Гидгари саби хџучиб, къар-урга уббилхџули.  
 Бухџянси къуйрукџли хурегуни кайсули.  
 Бураягу, се сабил: бусухџели – бяргџибси, бузухџели – буцџарси.  
 Аргџ бамкъурхџели – урцан, гъаваличиб куртџбикџан, хџятличи  
 кабиалли, нергџличи шуркабулхџан.  
 Илди чедаэс хџейрар, някъбази дучес хџейрар, илди агарси адам гџяхџил  
 хџериэс хџейрар.  
 Шарализиб бизули, авлахџличир къел далтан.  
 Гџякълучевсила бирар, мехџурсила хџебирар.  
 Акџубли бебџларачи марайти палтар дихан.  
 Дурхџяхџели – шиниша, жагџхџели – бяхџ бухџутџа, бухџнабаибхџели –  
 бирсибсиван бекџ чџянкџа.  
 Паргџатли даталли, зарал агарти, чучи къячикалли, балагџ бихути.  
 Шиннизи къузбиралра, берубли дурабулхџан.  
 Дуклумар биалра, ил арцан ахџен, варџа дигахџалра, ил мирхџи ахџен.  
 Зурхџяб рангли ухути жагати пухџлала бегџ, саби шелцад халаси  
 гџянтџикџа къуйрукџла бегџ  
 Шинкџаси хџулиб чумал багџадур.  
 Гъала-гъала цџяб хџулир, гџур берхџила нурлиур, хџяйнайс – буцџар  
 цџаличир, авнайс – мусибатлизир, ахирра кџабатџлизир.  
 Къацџбашули, къябббикџан, къяббарисси лайбикџан.  
 Цџяб хџулир хџердирути, атхџеб сагадикџути, чарх-бекџ дарсдикџаллира,  
 сари цаван кавлути.  
 Арцес дуклумаагар, дуцџбикџес къяшмиагар, булкџули верхџел шайчи,  
 хџебашес гџямалагар.  
 Паргџатли баталли, къяшмачиб башар, рахли уркџаалли, тапван  
 гербикџар.  
 Ил бухџянсира бирар, амма ил гџуни ахџен: ил – бемхурсира бирар,  
 амма ил къачи ахџен.  
 Бекџагар, къяшмиагар, кани бахес хџулагар, сунес диркахџусилис

агурбачил зайбиклар, сунени алавла бурцу, сунела ари чилилра  
 хлебурцу.  
 Сунечи челхуси чилра вирхейрар, амма саби гъарилличи чебулхъан.  
 Ца мерличир делхъ диран, булхъуцад бабзбиклан.  
 Саби гЯрца, кани умха, сурс тЯрхъубарси, уф дигуси.  
 Цуба къапула гЕлаб, цЯб пукъалаб хЕрбирар, селра чехЕбиалра,  
 сунес дигута букар.  
 Ца къяшличиб юрт саби, унза-улкъай агарси, гъар хъулиб хЕрбирули,  
 мургъи-ранг дурхИни саби.  
 Дуклауб хъалила бегI, хъулиб балгундешла бегI, алавти карцIбируси  
 къугъа далуйтала бегI.  
 Хъа дураб хЕрбирули, хъа бухИнабти балтахъан.  
 Чисалра дигхЕйгуси, лебтас къадарбируси.  
 Дуги-хЕри, хIясратли, бурхличичи хЕрбиклан, сецад ганзкабиралра,  
 гымбукIес балхЕбалан.  
 БухъутIа саби, сакIубси саби, галгала умхIлизиб юртла бегI саби.  
 Хъяб бигъунси, чарх батси, бузуцад биштIабиан.  
 ДуцIрум жявли булхIуси, яни бахъхИи бусуси.  
 ГЕбшни гIяхIладдашутI, хIеб хъули чардулхъути.  
 Гъарилли чебиуси, чилилра хIебуцибси, сунечи гъамикIуцад, саби  
 гъарахъбиркуси.  
 Урца гъабза, бекI биталли, ванзализира башар, бигъунси хъяб  
 зузбаралли, дурара булхъан.  
 КатхIел дуцIбиклар, лагбяхI ца ганзалра кацIес хIебирар.  
 ХIева саби лигала, чарх саб цIуба игIяйла, уркIи – бухъутIа рангла.  
 Анкъяагар, къушугар, урхIличичи дигиагар, авличичи хIебашули, хIербиэс  
 гIямалагар.  
 ХIекъли кунк къяшмала бегI, бахъ тахъси уркIила бегI, дугIла  
 мицIираг-ургаб даршуси хасиятла бегI.  
 ГъалабяхI бахъ гъуцIбиклан, гЕлабяхI чархIебулхъан.  
 Сари дахъдаралли тIягIямагартI, сари агарлира гIямалагартI.  
 ДубхIехъили, вявдешдиру, гъайхIеили, хабар буру.  
 КъяшмаурхIели – дашар, ахIенхIели – хIедашар.  
 Халаси канила бегI, дахъ умха лихIбала бегI, сунес хурег бикалли,  
 булхъес бахъ иштяхIла бегI.  
 ХIячми цIализир, чурми гъаваличир, чарх-бекI ванзаличир.





